

NWER ELTUM NI ABATIINGETIB JISOS

1 Teofailus,

Ngbokambang a nwer enyame nyi n nyono no, n nyono bada nsol nyi Jisos limi no, fere t'tib, bomo ngare nyi á bomo eltum ene,*

2 tete bo rod-e tahm a ne go ejahbetul Esowo. Re bo kehm-e rodo tahm a ne go ejahbetul Esowo, á jo tibi abat'toono ebe ba á yehke no go nsahm Etingi Etohko.

3 Bomo goji Jisos kpo no, nfung atahl abal nyi á ko no, tib abat'toono ebe elne, fere jo kpiri bo nkpel a nkpele, fere jo bung bade etul bi Esowo. Ano wo á tibi no re, á lohko li go elkpín, jol nfaabe limm.

4 Eji á jolo a bo, á jo tongo bo re, bo song jol go Jeusalem, bo k'kpe yaame je edi ajehng ajehng, bo ji sik nnoobo nyi Esowo Nsoo nyame re á bahke bo ka, nyio nyi á bungu no tong bo re,†

5 “Jon jo wohngo ane alahb maka maka. Re kang abon afung ntiil, m̃ bahke bele ewohn-galahb ji Etingi Etohko.”‡

Ana bo rodo Jisos tahm a ne go ejahbetul Esowo

* **1:1 1:1** Luk 1:1-4 † **1:4 1:4** Jon 15:26; Luk 24:49 ‡ **1:5 1:5**
Mat 3:11

⁶ Eji bo ma fadde edi ajehng, bo kehm bahbe Jisos re, “Ntul, ngare nyio nyi a bahke feere etul ka Israela?”§

⁷ Á kehm faange bo re, “Jio li ka Nsoo, tibre ye wo kunu afung. Limm re wahn kahn.*

⁸ Wahn bahke bele nsahm ngare nyi Etingi Etohko l'ba a nahne. M bahke jo yiimi atianse ka-m bomo go Jeusalem, rehng go Judea, fere rehng go Samaria, tete rehng ejang njini abehng abehng.”

⁹ Á bungu kan a mal, bo kehm-e soro mehl tahm a ne, eji abat'toono ebe jo seeng-e. Ekparesem-sem kehm soro bul-e, á lahm.†

¹⁰ Eji bo jo seenge go elbung too, eji á ma tahm, bo kehm soro nyehn ane abal ma lohng ba yiimi kohlo bo, ba kake abarebare akpawobo.‡

¹¹ Bo kehm bungu re, “Aneb Galili, jen ji wahnge m ma sa kp'seenge elbung too? Jisos j'nehm a, ji bo m-e rod go egahne ellong tahm a ne go ejahbetul Esowo, á bahke feere ba, ana n nyehn-e no á kp'tahme go ejahbetul Esowo.”§

Nne no bo yehk-e no re, á fere jo lim eltum ni Judas jo lim

¹² Abat'toono Jisos kehm kehme elbadde go ewong ji bo kpo lung re Oliv asongo go Jeusalem. Bomo go ewong jio rehng go Jeusalem rehngem mmal anyehng nob nob.

¹³ Eji bo rehng go Jeusalem, bo kehm song yel ekp'kpa ajehng ji jolo go ero enyong, ji bo jo kono

§ 1:6 1:6 Luk 24:21 * 1:7 1:7 Mat 24:36 † 1:9 1:9 Mak 16:19

‡ 1:10 1:10 Luk 24:4 § 1:11 1:11 Luk 21:27

eljolo. Bo jolo Pita, Jon, Jems, Andru, Filip, Tomos, Batolomi, Matiu, Jems ji mmon Alfeus, a Saimon ji woomo go ellong ane ba bo jo lung bo re Silot (bo ji jo nok re ejahbe ebo for go abo nya anebe Rom), go Judas ji mmon a Jems.*

¹⁴ Bo kpee jolo nnyo nnyo amehng, jo kak ero bi ekakesehk, go anebkal fvfo, a Meri nnyehn Jisos, go abonanyehn Jisos.

¹⁵ Ane ba jolo o kpee jolo ane atahl arakera.

Ngare nyio nyi Pita kehm mehle yiimi, kehm bungu re,

¹⁶ “Abonanee, nwer Esowo eblohko jol go etingitingi ana Etingi Etohko bungu no tong Devid bada Judas ji ko ane song tib Jisos, bo bob-e.

¹⁷ Á jolo nne no woomo go egahre ellong, fere jo lim eltum ni wahr jo lim.

¹⁸ Á ko akpohko nyao nya á limi ebi, song gunu edi egbe. Owo á gbo no sahb l'lohko, ngubjing joodo, akpidla bohngo.†

¹⁹ Ane kpee ba lene go Jeusalem w'wuk. Owo wahnge bo kpo lung edi egbe jio go bo ejahbe re Akeldama, ji lohngo re egbe alung.

²⁰ “Tibre bo nyono go nwer a Saams re,

“ ‘Nong, etahk eje jol na jol, nnene k'woomo.’

Bo kpe nyon re,

“ ‘Eltum ene, nne nondiki wo bahke fere ko.’

²¹ “Nne noo bahke jolo nne no woomo egahre ellong ngare kpe kpe nyi Jisos jolo a nahre,

²² bomo ngare nyi Jon jo wohngo ane alahb tete rehng efung bi Jisos, bo rod-e tahn a ne go ero.

* **1:13 1:13** Luk 6:13-16 † **1:18 1:18** Mat 27:3-10

Nne ana noo wo bahke yele ellong enahre, fere jo yiimi ntianse bade elnyahme ni Jisos.”

²³ Owo bo kehm yehke ane abal, nne noko Josef ji bo jo lung-e re Barsabas, mbing enye nyehko, bo jo kpe-e lung re Justus. Nne noko, bo jo lung-e re Matayas.

²⁴ Bo kehm kehme ero kak re, “Jehova no kp'kahne ntim nyi ane kpee, tib-r nne no a ma yehke, ane abal baa,

²⁵ re á ko eltum nio ni ntiingetib, ni Judas yake no bum, tahm go ege edi.”

²⁶ Bo kehm tubu elfaange, eji bo l'mal yehke nne awohng. Elfaange nio gbo tub Matayas. Bo kehm-e koko, budu go ellong abatiingetib, ewubu a nne awohng.

2

Elbake ni Etingi Etohko

¹ Eji efung bio bi Pentikost rehng no, bo kpee jolo edi edi ajehng.

² Tvtv ona egburu ewahl ji nnen a nnen ji lohng go elbung kehm kehme elwahle ana nfeb nyi nnen a nnen, kehm ba rur go eksp'kpa jio ji bo ji no.

³ Bo kehm nyehne nsol ana nlikagun ma yaame na yaame, kuumu nne awohng awohng.* ⁴ Etingi Etohko kehm ruru bo kpee go atahng. Bo kehm kehme elbundu alum ajahbe nyandiki, ana Etingi Etohko jo lim bo re bo bung.

* **2:3 2:3** Mat 3:11

⁵ Jus jindiki ji lene go Jeusalem, ji lohngo go ejang njini abehng abehng ba, bo jolo anoobo ane ba Esowo jo kor bo.

⁶ Eji ellong ane wuku ewahl jio, bo kehm kame song rur, kehm kehme bo esi kpo. Tibre nne awohng awohng jo wuku abat'toono Jisos kp'bungu go ege ejahbe.

⁷ Eji bo ma nyehn nkpokosi nyio, bo kehm bahbe re, "Anv, ane ba kp'bungu a, aneb Galili sanga?

⁸ Jen ji wahng ka nne awohng awohng ewahre kp'wuku alum nyao go ege ejahbe?

⁹ Wahr lohng go Partia, ane bandiki lohng go Midis, ane bandiki lohng go Elam, ane bandiki lohng go Mesopotemia, ane bandiki lohng go Judea, ane bandiki lohng go Kapadosa, ane bandiki lohng go Pontus, ane bandiki lohng go Esia,

¹⁰ ane bandiki lohng go Frigia, ane bandiki lohng go Pamfilia, ane bandiki lohng go Ijib, ane bandiki lohng go ejang Libia ji li kohlo Sirin. Ajenne nyandiki lohng go Rom, ane bandiki Jus ji, ane bandiki ane baka baka ba, ba kp'limi eljini ni Jus.

¹¹ Egom ejahre jindiki lohng go Gris, ane bandiki lohng go Arebia. E kp'wuku bo kp'bungu ajahbe enyahre bade aj'joko nsol nya Esowo ma lim."

¹² Esi kehm kpoko bo ane kpee, amahr fere jo bil bo. Bo kehm kehme elbunu atemtem re, "Anv, elgan nsol nyia lohngo renan?"

¹³ Ane bandiki kehm kehme bo nyok re,

“Amahm ma bo ma wo kp'buumu.”†

Etib bi Pita tiingi no

¹⁴ Pita kehm mehle yiimi, a abatiingetib bako, ewubu a nne awohng, kehm bungu wahre wahre tong ellong ane bao re, “Juda, ejahbe ejame, a wahn ji lene go Jeusalem kpee, wuungen atung, wahn wuk ji n yahke bung.

¹⁵ Ane baa ana, amahm sang bo kp'buumu, ana n kp'tiri. Tibre anv ebrehng nkaranka es-ehmwubu nyi nyi, nyi efungfu.

¹⁶ “Ji ma lim a, ji ji nnyehnamahr a Joel bungu no re,

¹⁷ ‘Esowo re,
“ ‘Go ngare es'kohro afung m bahke yaange etohko ejame wohngo nne awohng awohng.

Abon ebahne bahke kehme amahr nya Esowo nyehn.

Ajangkun enyahne bahke tob jol abanyehnamahr fvfo.

Anebkul ebahne bahke jo leeme alem.

¹⁸ Alokeltum ebame, aneblum, a anebkal anebkal, bo fvfo m bahke tob yaange etohko ejame wohngo bo ngare nyio.

Bo bahke jo nyehn enyehnamahr ji Esowo.

¹⁹ M bahke jo lim akpokosi go elbung, a ndi.

Bahke jolo go alung, go agun, a at'tohk nya ma sahb t'tehm.

²⁰ Njul bahke fere gbo ejanng, ebareka bahke fere siingi alung, efung bi Jehova bahke bake.

† 2:13 2:13 Mak 3:21

Bahke jolo egburu efung bi Esowo bahke tibi nsahm enye.

²¹ Owo nne awohng awohng no l'gboongo Jehova go ege a mbing, á bahke bele eltahre.' "†
(Ana wo Joel bungu fel.)

²² Pita kehm kpe bung re, "Israel, ejahbe ejame, wuungen atung go alum nya n kp'bungu. Jisos ji Nasaret wo, Esowo ka-e nsahm re á jo lim akpokosi, fere jo tib nliingi go egahne ajahbe, eji n l'kahn re Esowo bi tum-e no.

²³ Esowo go ege elkahne wo, á toobo no re á yake Jisos ka. Wahn ba jabb-e kak abi ane go ebo. Bo kum-e lake go ekros, á kpo.

²⁴ Esowo bi nyahm-e go elkv. Á yehk-e go erem bi elkv. Tibre elkv we maam kpan.

²⁵ "Tibre Devid b'bung bada ne re,
"Ngare anyehng anyehng n jo nyehne Jehova bad bad a name.

Á li go egame eboblum,
eji nnene l'ki-m ma nyeenge.

²⁶ Owo wahng ka eltim jo yeb-m,
n kehme ase yim.

Afi n kpo na,
ekunukpu ejame li re, Esowo bahke tiki lim ka-m.

²⁷ Tibre a nehm yake etohko ejame sa go ndi,
go ellong akvne.

A nehm taame re mbarebara Mmon ewa bol.

²⁸ A ma-m tib mbang nyi li rehng go elkpín.
Eji a bahke jolo a name, a bahke jo ka-m eye-batahng.'

(Ana wo Devid bungu fel.)"

† 2:21 2:21 Rom 10:13

29 Pita kehm kpe bung re, “Abonanee, n kp'bungu gbul gbul gbuul re, Devid nso ejahre kp'kpo mahne mahne, bo kpa-e kak. Elahm ebe bia, kpeke li tete sik anv.

30 Tib eji á jolo nnyehnamahr Esowo, á jo k'kahn ji Esowo nyame tong-e re, ‘Mmon ewa wo bahke jehke go ega eti etul.’

31 Á nyehne amahr bade elnyahme ni Mesaya re, ‘Esowo we yakem, á sa woomo go ellong akvne, ekv eje bol.’

32 “Jisos j'nehm o wo, Esowo lohke nyahme go elkv. Wahr kpee ba li atianse enye, tibre wahr ny'nyehn nsol nyio kpee.

33 Bo mehl-e, song jehke go eboblum Esowo bi ka-e Etingi Etohko ana á nyame no tong-e, ji ji á ma yaange wohng-r, j'nehm ji n kp'nyehne a, fere jo wuk.

34 “Jol yefono Devid tohkem je na go ejahbetul Esowo. Á bungu na bung re,
“ ‘Jehova bungu tong ntul ewame re,
Ji a, egame ejang eboblum,

35 tete n lim anebekv eba etikunakpade eja.’

36 “N kp'sebe re wahn anebe Israel kpee, wahn sahb k'kahn re, Jisos j'nehm ji n kum-e go ekros, Esowo m-e rod lim ntul, fere rod-e lim Kraist.”

37 Eji bo wuku ana, ala kehm teelee bo. Bo kehm bahbe Pita, a abatiingetib bako re, “Abonanee, anv, e bahke limi renan?”

38 Pita kehm tongo bo re, “Gboon ndon go egahne abiafem, wahn ane kpee, wahn fere bel ewohngalahb go mbing nyi Jisos Kraist, eji n l'bel

eltahmek a go egahne abiafem, Esowo fere yar-n ka Etingi Etohko.

³⁹ Enyam bia li ka wahn, a abon ebahne, a ajahbe nya li fee, a nne awohng awohng no Jehova bahk-e lungu tv elne.”

⁴⁰ Pita bungu na bung bung bung, jo tong bo, fere jo kak bo erehke re, “Nobo re wahn for go erem bi bahke gboko tub abi ane baa ba li anv.”

⁴¹ Ane bao ba wuku alum enye fere taame, bo ba bele ewohngalahb. Bo jolo ejum ane atahltahl nkpel esehma ane atahl awubu (3,000), ba Esowo budu no efung bio.

⁴² Bo jo kake esi re bo kahn eltibi ni abatiingetib Jisos jo tib bo, fere jo kono edi ajehng, jo bakke ebred, fere jo kak ero.

Eljini ni aneb Esowo

⁴³ Abatiingetib Jisos jo limi akpokosi gbalee, fere jo tib nliingi. Owo wahnge nne awohng awohng jo fahl.

⁴⁴ Ane ba taame no soro asi, jo kono edi ajehng. Nne awohng l'bel ejum, fere jo jol ka bo ane kpee.

⁴⁵ Bo jo gungu nsol ebo, fere jo baange akpohko, jo ka nne awohng awohng ana nsol m-e lehng.

⁴⁶ Efung abehng abehng bo jo song wane go etahk Esowo, fere jo bakke ebred go bo a ntahk, jo li nsol ebo go eyebatahng,

⁴⁷ fere jo tehk Esowo. Bo jo koro nne awohng awohng.

Esowo jo kpe kpele na ane efung abehng abehng go ellong abat'toono Jisos, ba jo bel eltahre.

3

Mbanne nyi nobo no

¹ Eji ma rehng nkaranka era nyi elgung, ngare nyi bo jo kono ero kak, Pita abola Jon kehm tahme go etahk Esowo.

² Eji bo ma rehng go eti mbu ji bo jo lung re eti mbu ji nno, bo kehm nyehne mbanne nyi kala j'jen bomo eji bo jel-e no. Efung abehng abehng bo jo sol-e ba bum eti mbu jio re á jo gboongo apene goji ane bao ba jo sehng yange go etahk Esowo.

³ Eji á nyehne Pita a Jon, bo yahke yange go etahk Esowo, á kehm soro gboongo bo re bo ka-e akpohko.

⁴ Bo kehm-e seenge too, Pita kehm bungu re, "Seeng-r gae!"

⁵ Mbanne nyio kehm kehme amahr baare re, anv, bo bahk-e kake ejum.

⁶ Pita kehm bungu re, "Asilva, a agul n kpimm. Ji n kpi no, ji ji m bahk-a kake. N kp-a tongo go mbing nyi Jisos Kraist ji Nasaret re, Mehl, wo jen!"

⁷ Á kehm-e jabbe go eboblum, tab-e yiimi. Akpade enye kehm soro tahne.

⁸ Á kehm soro mehl karab yiimi, kehme eljene yanng, soro toono Pita abola Jon, yange etahk Esowo, kehme eljene yanng, fere jo feebe, jo tehk Esowo.

⁹ Ane kpee ba nyehn-e no, eji á kp'jene, jo tehk Esowo,

¹⁰ bo kehm soro liing-e tvtv re, ye wo jolo ngb'gboongo nyi jo ji eti mbu ji li go etahk Esowo, jio ji bo jo lung re eti mbu ji nno.

Kpo bo esi area, eji bo ma nyehn ji ma jol ka-e.

Etib bi Pita tiingi no go etahk Esowo

¹¹ Eji nne noo jo jen bad bad a Pita, go Jon, ane kpee kehm jo kpo bo esi. Bo kehm kame, song kpiri bo go edi ji bo jo lung re etahk Solomon.

¹² Pita nyehne kan ane bao ana, á kehm bungu tong bo re, “Israel wahn, jen ji wahng ka esi kp-n kpoko ana, m ma sa anyo kaa kp'seenge? Anv, n kp'tiri re, go egahra nsahm wo, e ma lim nne noa á ma noba, afi go egahre elkake ni e kp'kake Esowo, ni e m-e lim á kp'jene?

¹³ Esowo bi Ebrahim, a bi Aisik, a bi Jakob, Esowo bio bi babnso ejahre, ye wo ma ka nlokel-tum ewe Jisos ellub ene. Jisos j'nehm ji n senng-e njahm, fere ten-e go esamahr Paillet, eji á tiri re á yehke Jisos yake.

¹⁴ N tene Jisos ji li Nnooba Nne no Esowo, no li go etingitingi, fere taame re bo yehke nwulane ka-n.*

¹⁵ N wulu nfono elkpin. Esowo fere nyahm-e go elkv. Nsol nyio nyi wahnge wahr kp'yiimi ntianse.

¹⁶ “Nsahm nyi li go mbing nyi Jisos nyi wahng ka, nne noa ma nob, ye ji n kp-e kahne, fere kp-e nyehne. Eltaame ni á ma taame tv Jisos, ni ni ma wahng á ma nob, anv, á yim a go egahne esamahr.

¹⁷ “Abonanee, n kp'kahne re, ji n limi no, a atubesi ebahne, n limi ekpehlekpehle.†

¹⁸ Mahne mahne Esowo tongo abanyehnamahr ebe re, bo song bung re, ‘Tiki li re, Kraist bahke

* **3:14 3:14** Mat 27:20 † **3:17 3:17** Luk 23:34; 1 Tim 1:13

tiki nyehn erem.' Ana wo Esowo lohko lim enyam ebe re lohko jol go etingitingi.‡

19 Ano wo fvfo nobo re, wahn gbo ndon, fere senng'e njahm go egahne abiafem, eji Jehova l'fvvdv abiafem enyahne, ngare nyio nyi eye-batahng nfenfe ji lohng goji Esowo bahk-n kpiri.

20 Á bahke tob tum Jisos Kraist ji á yehke no ka-n.

21 "Jisos bahke tohko jol go ejahbetul Esowo tete ngare rehng nyi nsol kpee bahke yaange, jol nfenfe, ana Esowo bungu no tong abanyehnamahr ebe, bomomo mahne mahne tete sik anv.§

22 "Moses bungu re, 'Jehova bahke tumu nnyehnamahr no bahke lohngo go egahne ellong, ana á tob yehk-m tum. Jo wuungen ye atung go ellum anehng anehng ni á l'tong-n.

23 Nne awohng awohng no tohko wuungu nnyehnamahr noo atung, Esowo bahk-e yabe go ellong ane ebe, fere ranng-e.'

24 "Abanyehnamahr bao kpee, ba ba no, bomomo ngare nyio nyi Samuel tete sik anv, bo kpee jo bungu bada ngare ny'nehm ana.

25 "Wahn ba li abon ba abanyehnamahr bao, a ba babnso ejahre, ba Esowo limi egbanngalung a bo, ana á bungu tong Ebrahim re, 'Nne no bahke lohngo go ega et'tohngo, ye wo bahke wahng ka nnahb anyehng anyehng go njini bel elfuulu.'

26 Wahn ba li agbokombang ane ba Esowo yehke nlokeltum ewe tum tv-n re á ba fuul-n, fere

‡ 3:18 3:18 Luk 24:25-27 § 3:21 3:21 Ell 21:1

lim-n wahn ane kpee, í senngge njahm go egahne ab'bi."

4

Ana Pita abola Jon yiimi go esamahr elam

¹ Ngare nyi Pita abola Jon kpi mbungu mbungu a ellong ane bao, owo abalimajom, a ntubesi ane ba kpo baabe etahk Esowo, go aneb Sadusi fvfo kehm tob ba kpiri bo.

² Eltim jo rake bo, tibre Pita abola Jon jo tibi ane re, Jisos ebnyahme go elkv, ji ma lohng re, akvne bahke fere nyahme, bel elkpin.*

³ Bo kehm soro bob bo, kak bo go ngbekobo tete etoono efungfu behko. Tibre elgung b'ba ngare nyio.

⁴ Ane gbalee ba wuku alum Esowo nyao t'taame. Nfange aneblum jolo ejum ane atahltahl nkpel ewubbal ane atahl awubu (5,000).

⁵ Etoono efungfu behko atubesi, a anebkul nfam, go at'tibi ba atahm, bo kehm ba kono edi ajehng go Jeusalem.

⁶ Nkon nyio nyi bo song kono a Annas ji jolo ntubesi abalimajom, go Kayafas, Jon Aleksanda, a ane bako ba tob woomo go nnaahb nyi ntubesi abalimajom.

⁷ Bo kehm koko Pita, a Jon song yiimi go bo esamahr, kehm kehme bo bahb re, "N limi renan ejum j'nehm? Nsahm anyi í ko no? Mbing nyi nyehne nyi í ko no?"

⁸ Pita ji ruru go etohko ji Esowo kehm faange bo re,† "Atubesi, a anebkul wahn,

* 4:2 4:2 Elt 23:8 † 4:8 4:8 Mat 10:19-20

⁹ lela bo kp-r abahbe bahb bada nnoobo nyi e ma lim, eji e limi mbanne nyio á nob.

¹⁰ Nobo re wahn kahn, a anebe Israel kpee re, nne no yim go egahne ellong a, yebnob kpee go nsahm nyi li go mbing nyi Jisos Kraist ji Nasaret ji n kum-e go ekros, Esowo fere nyahm-e go elkv.

¹¹ “Jisos j'nehm ji nwer Esowo bungu no bada ne re, Ye wo li ‘eltal ni wahn asehketahk tene no, ye wo ma fere jol etingitingi eltal ni nnahb ekahme.’‡

¹² Eltahre li go ege wo wo. Mbing anyehng anyehng limm go njini nyia, nyi Esowo ma ka ane, nyi e bahke koko bel eltahre.”§

¹³ Eji bo nyehna no re, Pita abola Jon, bo bele esahb, kehm kpoko bo esi, tibre Bab Pita jolo ane baka baka ba ki kahn nwer. Bo kehm soro seb kahn re, bo jolo a Jisos.

¹⁴ Eji bo nyehne mbanne nyio nyi ma nob, yim kohlo Pita abola Jon, mbang anyehng anyehng kpeem jol nyi bo bahke kpe ma faabe.

¹⁵ Bo kehm tongo bo re, bo lohng go ekp'kpa elam song elatahk. Bo kehm kehme eltoobo re,

¹⁶ “Anv, e bahke limi ane bao renan? Nne awohng awohng no lene go Jeusalem ebkahn re, bo ba li ane ba limi egburu nkpokosi nyia. Anv, e nehm kpe ma gbaame.

¹⁷ Nong, wahr rehke bo, bo k'kpe bung tong ane go mbing nyi Jisos, eji eka jia l'k'kpe yeere nkpel anyehng anyehng.”

¹⁸ Bo kehm lungu Pita, a Jon, bo feere ba yel ekp'kpa. Bo kehm rehke bo re, bo k'kpe bung go

‡ 4:11 4:11 Mat 21:42 § 4:12 4:12 Mat 1:21

mbing nyi Jisos nkpel anyehng anyehng, fere jo tib.

¹⁹ Pita abola Jon kehm faange re, “Wahnfono antahng bahke toobo kahn, joare n'nob go ejang bi Esowo re nne wuk wahn, afi á wuk Esowo.

²⁰ Wahr nehm tiki rahke elbungu bada nsol nyi e ma nyehn, fere wuk.”

²¹ Bo kehm kpe rehke bo t'tahne, kehm yake bo, bo song. Bo nyehnem mband anyehng anyehng nyi bo bahke kake bo erem tib ane ba jolo o. Tibre nne awohng awohng jo tehke Esowo tib go nkpokosi nyi ma lim.

²² Nne no bo lim-e no, á nob, ngare nyio yebkang sehng nnya atahl abal.

Ana aneb Esowo kake ero bi esahb

²³ Tvtv ona eji bo yehke Pita abola Jon yake, bo kehm soro tahm goji atem ebo, kehm song tooro tong bo ana atubesi abalimajom, a anebkul nfam bungu no.

²⁴ Eji bo wuku no, bo ane kpee kehm kehme ero kak ka Esowo re, “Egburu Esowo bi limi elbung, a ndi, a alahb, a nsol kpee nyi li no,

²⁵ go nsahm Etingi Etohko wo, nso ejahre Devid nlokeltum ewa jo bung re,

“ ‘Jen ji wahng ane baka baka ba ki nyi Esowo, ntim kpi bo maange ana?

Jen ji wahng ane bao kp'toobo mbol mbol?

²⁶ Atul ba njini jo toobo ebging ebo, atubesi song ji edi ajehng,

jo toobo nfem bada Jehova, a Mesaya enye.’

²⁷ “Tibre etingitingi, Herod abola Paillet, a ane baka baka ba ki nyi Esowo, a anebe Israel,

bo kono edi ajehng go ejahbe jia, jo lam kak Jisos, mbarebara nlokeltum ewa, no a ko-e lim Mesaya.*

²⁸ Bo kono edi ajehng re bo lim ejum ajehng ajehng ana ji a toobo wuku wuku bum.

²⁹ Jehova, nyehn esabsab enyam bi bo ma nyam! Ka abon eba nsahm, eji bo l'jo sahb tiingi etib eba,†

³⁰ wo fere tanne ebo eba, goji ane l'nob ayam ebo, wo fere lim akpokosi go mbing nyi mbarebara nlokeltum ewa Jisos."

³¹ Eji bo ma kak ero mal, edi jio ji bo ji no, jo lim nkon, kehm gbehke. Etingi Etohko kehm ruru bo kpee go bo atahng, bo kehm kehme etib bi Esowo tiingi a esahb esahb.

Ana bo jo limi nsol kpee egom egom

³² Ellong ane ba taame tv Esowo jolo ntir ntir anyehng. Nnene jolem, no jo bung re, nsol ny'nye li ka ye ntahngtahng. Bo jo baange na ejum ajehng ajehng ji bo bele no egom egom.‡

³³ Abatiingetib Jisos jo yiimi ntianse bade elnyahme ni Jisos a nsahm a nsahm. Esowo kehm fuulu bo egburu elfuulu bo ane kpee.

³⁴ Nnene jolem go bo ellong, no ejum jo lehng-e. Tibre ane bao ba bele ebgbe, a ntahk, bo jo gungu, ko akpohko ba a nya,

³⁵ ba faake a nya, kak abatiingetib Jisos go ebo. Akpohko nyao bo jo ka nne awohng awohng ana nsol m-e lehng.

* 4:27 4:27 Luk 23:12 † 4:29 4:29 Ef 6:19 ‡ 4:32 4:32 Elt 2:44

³⁶ Joses ji lohng go et'tohngo ji Livai, ji bo jel-e go Saiprus, ye ji abatiingetib Jisos ka-e mbing re Barnabas, ji lohngo re nkakeltim a mmon,

³⁷ ye wo gungu egbe eje, ko akpohko nyao ba ka abatiingetib Jisos. §

5

Ananayas abola Safira

¹ Nne awohng jolo go, no bo jo lung-e re Ananayas. Nkal ewe bo jo lung-e re Safira. Bo gungu ejang nsol ebo.

² Ananayas yange ejang akpohko bum elne go, ejang jehko á ko ba ka abatiingetib Jisos. Nkal ewe k'kahn kpee.

³ Pita kehm-e bahbe re, "Ananayas, jen ji wahnge nnehm ma ko nji go ega eltim kp-a fili, a ma bum akpohko nyako go, ba yiimi go esamahr Etingi Etohko kpi afahnge kiimi?*

⁴ Re wo kehm gungu nsol enya nyio, jolo ny'nya. Eji a ma gungu nsol nyio, akpohko jolo nyanya. Jen ji wahnge a kehm tiri ano go ega eltim, lim elkohn ejum ana jia? A kimem efahnge soodo ane, a kimi efahnge soodo Esowo."

⁵ Ananayas wuku kan ano me, á kehm soro tuulu gbo kpo.† Ane ba wuku no kpee, kehm kehme elfahle tete.

⁶ Ajangkun kehm soro lohng ba, ba gbad-e, rod-e tahm a ne song kpa kak.

⁷ Ji kan ekidi rehng awa ara, nkal ewe kehm tob ba. Á wukem ji ma lim.

§ 4:37 4:37 Luk 16:9,12 * 5:3 5:3 Jon 13:2 † 5:5 5:5 1 Kor 11:30

⁸ Pita kehm-e bahbe re, “Tong-m, akpohko nya a kpee, nya n gungu edi egbe ejahna?”

Á kehm faange re, “Ee, nya nya a kpee.”

⁹ Pita kehm-e bahbe re, “Jen ji wahnge n lame no re, wahn ba gare etohko ji Jehova? Ane ba rodo nlum ewa song kpa kak, bo baa, yim mbutahk o. Bo bahk-a tob rod lohng a na.”

¹⁰ Tvtv ona á kehm soro gbo ndi go ege alata kpo. Eji ajangkun nyao yele ekp'kpa, bo lohko nyehn re, yeblohko kpo. Bo kehm-e soro rod, lohng a ne, song kpa kak kohlo nlum ewe.

¹¹ Aneb ero bao kpee, a egom jindiki ji wuku no, bo kehm kehme elfahle tete.

Akpokosi akpokosi

¹² Abatiingetib Jisos jo limi akpokosi gbalee go esamahr ane. Aneb Esowo jo jolo edi ajehng go etahk Esowo, ejang bio bi bo jo lung re etahk Solomon.

¹³ Ane bako joom sahb yel ellong ebo, tvtv ona bo jo kake bo sehng.

¹⁴ Esowo jo kpe budu na budu budu ane ba jo taame go bo ellong, anebkal, a aneblum aneblum.

¹⁵ Ane jo solo aneb ayam ba a bo, ba bum bo go elatahk, egom jindiki noongo go adilnong, egom jindiki noongo go ebkpa, eji afi Pita sehng na, etohko eje l'jo koro bandiki.‡

¹⁶ Ellong ane gbalee kehm lohngo ba, ni lohngo go ajahbe nya li senng Jeusalem kak. Bo ko aneb ayam, fere ko ane ba bele abi atohko, ba a bo, bo nobo ane kpee.

‡ 5:15 5:15 Elt 19:11-12; Jon 14:12

Erem bi abatiingetib Jisos

¹⁷ Ntubesi abalimajom, a ane ebe kpee ba tob woomo go ellong nio ni aneb Sadusi,[§] abatiingetib Jisos jo teelee bo ala sehng.*

¹⁸ Owo wahnge bo kehm bobo abatiingetib Jisos kak ngbekobo.

¹⁹ Ngare atv enjel nyi Esowo kehm bake, ba lennge abutahk agbekobo nyao, yehke abatiingetib Jisos bao, kehm bungu tong bo re,[†]

²⁰ “Songen go etahk Esowo, wahn song tong ane alum kpee nya li bade elkpín nia ni nfenfe.”

²¹ Eji bo wuku ana, bo kehm tahme go etahk Esowo ngare nyi efungfu ma se, song kehme eltibi. Ntubesi abalimajom, a ane ebe kehm tiingi tv anebkul nfa, a atul esub re bo ba kono edi ajehng. Bo kehm tumu alokeltum ebo tv go ekp'kpa ngbekobo re bo song ko abatiingetib Jisos ba a bo.

²² Eji bo ba no, bo nyehnem Bab Pita go ngbekobo. Bo kehm feere song tooro tong bo re,

²³ “E nyehne abutahk ngbekobo ta ta, fere nyehn ab'baabe yim no go abutahk kp'baabe. Eji e lennge abu, nnene atahng e nyehnem.”

²⁴ Eji ntubesi ab'baabe etahk Esowo, a atubesi abalimajom wuku ano, kehm fohko bo nk, fere kpo bo esi ana ji bahke jolo.

²⁵ Nne awohng kehm lohngo ba, ba tong bo re, “Ane ba n kake bo ngbekobo, bo yim na go etahk Esowo kpi ane tib.”

²⁶ Ntubesi ab'baabe etahk Esowo kehm tahme, a ane ebe song ko bo, ba a bo. Bo joom lim go

§ 5:17 5:17 Elt 4:1,6 * 5:17 5:17 Mak 15:10 † 5:19 5:19 Elt 12:7

nsahm, tibre bo jo fahle re, ane bako bahke bo atal tuubu.

Ana abatiingetib Jisos yiimi go esub

²⁷ Bo kehm koko abatiingetib Jisos bao, ba a bo, bo ba yiimi go esub. Ntubesi abalimajom kehm kehme bo abahbe bahb, fere tong bo re,

²⁸ “E reh-k-n re, wahn k'kpe tib go mbing a nne noo. Wahn ba ma wahng ka etib bia ma yeere go Jeusalem kpee. Wahn ba kp-r ebi ka tib go elkv ni nne noo.”[‡]

²⁹ Pita, a abatiingetib Jisos bako kehm faange re, “E bahke tiki jo wuk Esowo, nne sang e bahk-e wuku.

³⁰ Esowo bi babnso ejahre bi nyahme Jisos go elkv, ji n wul-e no, eji n kum-e go ekros,

³¹ Esowo m-e lim nj'jok a nne, fere rod-e jehke go ege eboblum ana ntubesi, a nt'tahre, eji Israel l'bel egbokondon, fere bel eltahmeka go bo abi-afem.

³² Wahr ba li atianse nsol nyia kpee, wahr, a Etingi Etohko fvfo ji Esowo kpo ka ane ba kp-e wuku.”[§]

³³ Eji bo wuku ano, eltim kehm kehme bo rak. Bo kehme elsebe ana bo bahke wulu bo.*

³⁴ Nne awohng jolo o, no bo jo lung-e re Gamaliel.[†] Á jolo nne a Farisi, fere jol ntul esub, fere jol nt'tibi no atahm. Á jolo nne no ane kpee jo kak-e. Á kehm mehle yiimi, kehm bungu tong bo re, bo yehke abatiingetib Jisos, song a bo go elatahk, tohko ji mmongare ntiil.

[‡] 5:28 5:28 Mat 27:25 [§] 5:32 5:32 Luk 24:48 * 5:33 5:33 Elt 7:54 [†] 5:34 5:34 Elt 22:3

³⁵ Á kehm bungu tong bo re, “Abonanee wahn Israel, kunen ekpu go ejum ji n kp'tiri re wahn lim ane baa.

³⁶ Mahne go, nne awohng no bo jo lung-e re Tudas, á tabe esi, fere rod elne bum w'wahre re, ye wo li nj'joka nne. Ejum ane atahltahl ba tahme no toon-e. Bo wul-e wul, abat'toono ebe kpee yaame ebo tahm. Etul ebe gbo.

³⁷ “Kange kan a, Judas ji lohng go Galili kehm kpe ba, ngare nyi bo jo fange ane. Ye fvfo tob bele ellong ane ba jo toon-e. Á tob kpo tan. Abat'toono ebe kpee yaame ebo tahm.

³⁸ “Elam jia ji anv, n kp-n tongo re, wahn yake ane baa ana, bo song. Eltum nio ni bo kp'sebe re bo lim l'fere jol ni nne, bahke tane na.‡

³⁹ L'fere lohng goji Esowo, wahn, nnene limm, no bahke ma sahde bo. Fundiki bahke jolo ana n kp'noko a Esowo.”

⁴⁰ Bo kehm koko elle ni Gamaliel, fere lung abatiingetib Jisos bao re bo feere ba. Bo kehm dohko bo, kehm rehke bo re, bo k'kpe tiki bung go mbing nyi Jisos, kehm yake bo, bo song.

⁴¹ Abatiingetib Jisos kehm lohngo, ane bao sa ekp'kpa esub o, tahm ebo. Bo bele eyebatahng tib eji Esowo kpunu bo, bo nyehn erem bio bi esono tib go esi ji Jisos.§

⁴² Efung abehng abehng bo tikem rahke eltibi go etahk Esowo, fere jo tib go ntahk ane, fere jo tiingi nnoobo etib re Jisos wo li Kraist.

‡ 5:38 5:38 Mat 15:13 § 5:41 5:41 Mat 5:10-12; 1 Pit 4:13

6

Alokeltum na asehma ba jo loko aneb ero

¹ Ngare nyio o eji nfange ane nyi abat'toono Jisos jo kpe rur na budu, nfem kehm gboko anebe Jus ba lohng go Gris, a anebe Jus baka ga ba li etahk. Anebe Jus ba lohng go Gris jo bungu re, efung abehng abehng bo l'kehme nsol bak, akalebun ebo kpehme bel jang jang ana ane bako.*

² Abatiingetib Jisos, ewubu ane abal kehm lungu abat'toono Jisos bako, bo ba kono edi ajehng, kehm bungu re, "Fuumem re wahr yake alum Esowo abungu, fere jo ba bak nsol alehke.

³ Abonanee, yehken ane asehma go egahne ellong, ba kp'yiimi ntianse nyi nno, ba etohko ji Esowo, a elkahne ma rur go bo atahng, wahr ka bo eltum nio.†

⁴ Wahr bahke rodo ngare enyahre kak go ero akake, fere jo bung alum Esowo."

⁵ Alum nya bo bungu no, yebe ellong ane bao atahng sehng. Owo bo kehm yehke Stiven ji etohko ji Esowo ruru go ege atahng, á fere gbal go ekakesehk, a Filip, go Prokoros, Nikanor, Taimon, Parmenas, a Nikolas ji ki jol nne a Jus, ye ji lohng go Antiok.

⁶ Bo kehm koko bo, ba goji abatiingetib Jisos. Bo kehm kake ero fere kunu bo abo.

⁷ Alum Esowo kehm yeere na yeere. Abat'toono Jisos kpe rur na go Jeusalem gbalee. Abalimajom gbalee ba tob taame, jo toono eltibi ni Jisos.

* **6:1 6:1** 1 Kor 6:7 † **6:3 6:3** 1 Tim 3:8-10; Rom 16:1

Ana bo bobo Stiven

⁸ Stiven jolo nne no Esowo fuul-e no, fere ka-e nsahm gbalee. Á jo limi akpokosi go esamahr ane.

⁹ Ane bandiki joom taame tv-e. Bo kehm kehme nfaabe lim a Stiven. Bandiki lohng go ejahbe ji bo jo lung re Silisia, bandiki lohng go Esia, bandiki jo kono elkono go etahk ero ji ane bao ba bo jo lung bo re aforfor ane.

¹⁰ Etohko ji Esowo ka Stiven elkahne gbalee. Eji á jo bung, á jo ga bo. Bo kpeem jo kahn ana bo bahk-e jo faange.‡

¹¹ Owo bo kehm nyare ane kak re bo song bung re, “E jo wuku ana á jo su Moses abola Esowo.”

¹² Bo kehm tob nyare ane bako, fere nyare anebkul nfaam, a at'tibi ba atahm. Bo kehm ba bob-e, ko-e tahm a ne go esub.

¹³ Bo kehm koko akimfahng e atianse ba a bo. Atianse nyao ba bungu re, “Nne noa kpo kono ebi bung bada mbarebare etahk Esowo jia, a atahm nya Moses.

¹⁴ E m-e wuk, eji á jo bung re, Jisos ji Nasaret bahke wake etahk Esowo jia, fere yaange atahm nya Moses ko no ba ka-r.”§

¹⁵ Kpee ane ba ji ekp'kpa elam jio kehm kehme Stiven seenge too. Bo jo nyehne esamahr ebe, jolo are bi enjel bi.

7

Alum nya Stiven bungu no

‡ 6:10 6:10 Luk 21:15 § 6:14 6:14 Mat 26:60-66

¹ Ntubesi abalimajom noo kehm bahbe Stiven re, “Anv, lohko li anoa?”

² Stiven kehm faange re, “Babnso wahn, a abo-nanee, wuungen atung! Esowo bi kpi ellub kpiri nso ejahre Ebrahim eji á lene go Mesopotemia. Ebrahim kehm song jol go Haran.

³ Esowo bungu tong-e re, ‘Tahm nnahb enya sa, wo tahm ejahbe eja sa, song go edi ndi ji m bahk-a tibi.’

⁴ Á kehm tahme o ejahbe jio ji bo kpo lung re Kaldea, song lene go Haran. Eji nde kpo no, Esowo kehm yehke Ebrahim ejahbe jio, tum-e tv ejahbe jia ji n lene a anv.

⁵ Esowo we kaam edi ndi jio re jol j’je. Jol mmokpuku ndi awohng awohng á belem. Esowo nyame tong-e re, á bahk-e kake, jol j’je, a ji abon ebe. Jol ngare nyio Ebrahim, mmon awohng awohng á ka jel.

⁶ “Ana wo Esowo bungu no tong-e re, ‘Abon eba bahke lene go ejahbe jindiki ana ajahmjahm. Bo bahke jolo aju. Ane bao bahke fere jo nohk bo go nnya atahlahl.’

⁷ Esowo kehm kpe bung re, ‘M bahke lame ejahbe jio ji bo bahke jo loko bo. Abon eba bahke tahme ejahbe jio o, fere ba lok-m edi jia a.’

⁸ “Esowo kehm limi etem a Ebrahim, kehm-e tongo re, ‘Wahn kpee bahke jolo ane ba bahke jo yehke nrur. A wo li elliingi ni etem bia.’ Ebrahim kehm jele Aisik, kehm-e tob yehke nrur, eji Aisik ma kang nfung enehkeni. Aisik kehm tahme jel Jakob, kehm-e tob yehke nrur. Jakob kehm yehke abon ebe, ewubu ane abal nrur. Ewubu ane abal bao ba jolo babnso ejahre.

⁹ “Babnso ejahre bao ba, Josef teele bo ala, bo kehm-e gungu, á jol nju, bo tahm a ne go Ijib. Esowo jolo a ne sehng.

¹⁰ Á jo tahr-e yehke go erem abehng abehng. Eji Josef ba yiimi go esamahr Fero, Esowo ka-e elkahne. Á fere jo kor Fero, Fero rod-e lim ntul re á jo fili Ijib, fere fili etahk ntul.

¹¹ Njal kehm bake go Ijib, a Kenan. Erem gbale sehng ngare nyio. Babnso ejahre, nsol alehke anyehng anyehng bo kpeem bel.

¹² “Eji Jakob wuku re, nkohl nyia go Ijib, á kehm tumu babnso ejahre tv go ngbokambang a nkpele.

¹³ Nkpel nyehko nyi bo kpe je, Josef kehm lennge elne ka abonanyehn. Ngare nyio nyi Fero kehm kahne ana nnaahb a Josef li no.

¹⁴ Josef kehm tiingi etib tv nde re, á ba, a ane ebe kpee. Bo jolo ane atahl ara ane elku kpe kpe.

¹⁵ Owo Jakob kehm tahme go Ijib. Owo á kpo no, babnso ejahre tob kpo.

¹⁶ Bo solo bo, feere a bo go Sikem, song kak go elahm bi Ebrahim gunu goji abon Hemor, ka akpohko gbalee.

¹⁷ Eji ngare ma kabbe nyi Esowo nyame no tong Ebrahim, owo ane ebahre kehm ruru go Ijib.

¹⁸ Ntul no jo fili Ijib ngare nyio kahnem Josef.

¹⁹ Á jo nehme ane ebahre, jol ndon we joom fili. Á kehm jehke ntahm re, babnso ejahre jo rod abonbili ebo, song bum go ekul, eji bo l'jo kpo.

²⁰ “Ngare nyio nyi bo jele Moses. Á jolo nnobonoba mmon sehng. Á kange nnyahng era

mi mi go etahk nde.*

²¹ Eji bo rod-e no song kak go aya, mmon a Fero no nkal kehm-e song ting. Á kehm-e rodo, le-e ana mmon ewe.

²² Bo jo tib-e elkahne ni Ijib kpee. Á kehm jolo nj'joka nne go alum abungu, a nsol alimi.

²³ “Eji Moses ma kang nnya atahl abal, á kehm tiri go ege eltim re, á bahke tahme song nyehn abonanyehn Israel.

²⁴ Eji á je no, á kehm song nyehn nne awohng no nne Ijib kp-e nohko, kehm kake nne noo ebo, no nne Ijib jo nohk-e, kehm bongo nne Ijib noo go elwulu.

²⁵ Á jo tiri re, ane ebe bahke kahne re, Esowo m-e yehke re, á tahre bo yake. Jol bo tikem kahn.

²⁶ “Njahmfungfu á kehm kpe song kpiri anebe Israel na abal kp'noko abohng. Á jo gare re á lim, bo bel elkoono. Owo á kehm bungu tong bo re, ‘Wuungen atung, wahn abonanyehn ba. Jen ji wahng ka á kp'noko atemtem?’

²⁷ “Nne noko no bohko ntem abohng, kehm gbulu Moses tv go nkpe, kehm-e tongo re, ‘Nne awo lim-a re wojol ntubesi, fere jo lam alam enyahre?’

²⁸ A kp'sebe re wo wul-m ana a wulu nne Ijib nyaana?’

²⁹ “Eji Moses wuku ano, á kehm beke go Ijib, fere song lene go ejahbe ji bo jo lung re Midian. Owo á jele abon abal.

³⁰ “Eji ma sehng nnya atahl abal, á kehm nyehne enjel nyi Esowo elka emahng go ewong ji

* 7:20 7:20 Hib 11:23

bo kpo lung re Sainai. Enjel nyio woomo go agun nya jolo go eti ajehng ji jo lul.

³¹ Ejum ji Moses nyehne no, kpo-e esi sehng. Eji á jeere no je re á song nyehn, á kehm wuku ellum ni Jehova bungu no re,

³² 'Me wo li Esowo bi babnso ejahne, Esowo bi Ebrahim, a bi Aisik, a bi Jekob.'

"Moses kehm kehme elkahme, jol á kpeem sahb seenge.

³³ "Esowo kehm-e tongo re, 'Yehke akpaketa enya, tibre edi ndi ji á yim ona li mbarebare edi.

³⁴ Me n lohko nyehn erem bi ane ebame kp'nyehne go Ijib. Me n wuk aromo nya bo kp'tuubu. Me m badde ba re me m ba tahre bo. Ba, m bahk-a tumu go Ijib.'

³⁵ "Moses ji bo ten-e no, fere bung re, 'Nne awo lim-a re wo jol ntubesi, fere jo lam alam enyahre?' ye wo Esowo tum-e no re, á song jol ntubesi, fere jol nt'tahre. Enjel nyio nyi á nyehne no go eti jio, ny'nehm nyi song tv-e go Ijib.

³⁶ Moses kehm yehke bo go Ijib. Á jo limi akpokosi go Ijib, a Abilaya fvfo, a elka emahng go nnya atahl abal.

³⁷ "Moses j'nehm o wo bungu tong abone Israel re, 'Esowo bahk-n tumu nnyehnamahr no bahke lohngo go egahne ellong, jang jang ana á tum-m no.'

³⁸ "Moses wo jolo a abone Israel go elka emahng. Ye wo jolo a babnso ejahre, a enjel nyi Esowo nyi bungu a ne go ewong jio. Ye wo jolo nne no ko etib bi li go elkpin ba tiing-r. Etib bio lohng goji Esowo.

³⁹ “Babnso ejahre t'ten. Bo taamem tv-e. Bo yab-e na tv go nkpe. Go bo a ntim bo jo tiri re, bo feere go Ijib.

⁴⁰ Owo bo kehm bungu tong Eron re, ‘Lim eblom ka-r, jo gbo-r mbang. E nehme kahn ji ma lim Moses ji yehk-r no go Ijib.’

⁴¹ “Bo kehm limi elom jio go elfoongo ni mmon a nfong, jo jom, eltim jo yebe bo sehng go ejum ji bo limi go bo abo.

⁴² “Esowo kehm sennge bo njahm, kehm yake bo re bo jo kak nsol nyi li go elbung, ana ebareka, a njul, go alonlo. Ana bo nyono no go nwer nyi abanyehnamahr Esowo re,

“ ‘Anebe Israel wahn, me sang wahng ka n jo wul enyam, jo lim ajom go nnya atahl abal nyi n jolo go elka emahng.

⁴³ Wahn ebsol etahk ji Molohk, elom ejahne, a esowo bi bo jo lung re Refan, ji jolo go elfoongo ni elonlo.

Bio bi jolo eblom bi n li no, fere jo jom. M bahk-n kame tv fee sehng Bebilon sa.’

⁴⁴ “Babnso ejahre bele ebkpatahk go elka emahng bi Esowo jo ba kpiri bo, bi bo limi ana Esowo tongo Moses re á lim, jang jang ana á nyehne goji Esowo.

⁴⁵ Eji Josua jolo ntubesi abo, owo babnso ejahre kehm kpudu ebkpatahk bio song yel a bi ejahbe jio ji ane ba Esowo kame no. Ebkpatahk bio jolo o tete rehng afung nya Devid.

⁴⁶ “Esowo, Devid jo kor-e sehng. Devid kehm bahbe Esowo re, joare n'nob re á si etahk ka-e, ye ji li Esowo bi nsoo Jakob.

⁴⁷ Solomon wo si etahk jio ka-e.

⁴⁸ Esowo bi gbale sehng kpehme lene go ntahk nyi ane si go ebo, ana nnyehnamahr Esowo bungu no re,

⁴⁹ “ ‘Elbung ni li eti etul ejame.

Njini nyi li etikunakpade ejame.

Elkohn etahk ajii m bahke sehke ka-m?

Gan wo li edi erekekvi ejame?

⁵⁰ Mefono antahng sang limi nsol nyia kpeea?”

⁵¹ “Wahn ebtahne asi sehng. Ntim enyahne li ntim nyi ane ba ki li aneb Esowo. Atung enyahne eblak. Ngare anyehng anyehng n kpo kono Etingi Etohko ten. Ana babnso ejahne jo lim, ano wo fvfo n kp'tob lim.

⁵² Nnyehnamahr awo no babnso ejahne ki-e nohk? Bo wulu bao ba jo tiingi wuku wuku re, ‘Etingitingi nne kp'bake.’ Ye wo n gung-e no, fere wul-e.

⁵³ Wahn ba li ane ba ko atahm nya Esowo, nya enjel ko ba ka-n. M bumem atahm nyao!”†

Ana bo tuubu Stiven atal

⁵⁴ Eji atul esub wuku ana Stiven jo bung, ntim kehm maange bo s'sehng.‡ Bo kehm kehme aromo tuubu.

⁵⁵ Stiven ji Etingi Etohko ji Esowo rur-e go ege atahng, kehm kpiidi esamahr ebe seenge go elbung, kehm nyehne ellub ni Esowo, Jisos yim no go eboblum Esowo.§

⁵⁶ Á kehm bungu re, “Nyehnen, me n nyehn ejahbetul Esowo ma lennge, fere nyehn Mmon no nne yim go ejang eboblum bi Esowo.”

† 7:53 7:53 Gal 3:19; Hib 2:2 ‡ 7:54 7:54 Elt 5:33 § 7:55 7:55
Luk 22:69

57 Bo kehm rabe wahre wahre, lohko abo atung, kehm soro song buul-e,

58 kehm-e tohngo, lohng a ne go ejahbe jio, song rehng a ne go esi mbang. Owo bo song kehm-e atal tuubu re bo wul. Atianse nyao fanngge abomo ebo, bum njangkun anyehng, nyi bo jo lung-e re Sol re á kpur.*

59 Eji bo jo tuubu Stiven atal, á jo kake ero re, “Ntul a Jisos, ko-m etohko ejame!”†

60 Á kehm jamme alahng, soro rabe tiim re, “Ntul, nong, abiafem nyaa k'kuumu bo go esi!”‡
Eji á bunga no, á kehm soro kpo.

8

Erem bi Sol jo kak aneb ero

1 Sol t'taame tv elwulu ni bo wulu Stiven. Efung bio bo kehm kehme abon Esowo ba jolo go Jeusalem nohk tete. Bo kehm yaame ebo kpee tahm go Judea, a Samaria,* sehngem abatiingetib Jisos ba ba sa no.

2 Ane bandiki ba jo fahl Esowo kehm rodo ekv ji Stiven, song kpa kak, fere jo ling tete.†

3 Sol jo sebe re, ero tan. Á jo je etahk ajehng ajehng, jo bob abon Esowo, aneblum, a anebkal, fere jo kak bo go ngbekobo.

Ana abon Esowo jo bung alum Esowo go Samaria

4 Abon Esowo ba yaame no, kehm kehme elyanngge edi ajehng ajehng, jo bung alum Esowo.

* 7:58 7:58 Elt 22:20 † 7:59 7:59 Luk 23:46 ‡ 7:60 7:60 Luk 23:34
* 8:1 8:1 Mak 16:15 † 8:2 8:2 Mat 14:12

⁵ Filip kehm tahme go Samaria, kehm song tong ane bada Mesaya.

⁶ Ane bao w'wuungu atung wuk ana ji Filip jo bung. Bo wuku alum nyao nya á jo bung, bo ane kpee, fere nyehn akpokosi nya á jo lim.

⁷ Abi atohko gbalee jo biingi tiim, fere jo lohng ane gbalee. Abanne tvv, a agboodo agboodo t'tob nob fvfo.‡

⁸ Eyebatahng gbale sehng go Samaria.§

⁹ Nne awohng jolo o, no bo jo lung-e re Saimon. Á jo limi ntaane, fere jo lim nsol nyi jo kpo aneb Samaria esi. Á jo lungu elne re nj'joka nne.

¹⁰ Nne awohng awohng go ejahbe jio jo wuk-e wuk, afi á jolo ntul, afi á jolo nja, bo fere jo bung re, "Ye wo kpi nsahm nyio nyi Esowo, nyi bo kpo lung re Egburu Nsahm."

¹¹ Bo jo wuk-e, tibre ebkang ji á bomo ntaane nyio go ellimi, jo kpo ane bao esi.

¹² Eji bo taame tv Filip go alum nya á jo bung bade etul bi Esowo, fere jo bung bada mbing nyi Jisos, ji li Kraist owo bo kehm bele ewohngalahb, aneblum, a anebkal anebkal.*

¹³ Saimon kehm tob taame fvfo. Eji á ma bel ewohngalahb, á jo jene a Filip. Kpo-e esi area, eji á nyehne agburu akpokosi nya Filip jo lim.

¹⁴ Eji abatiingetib Jisos ba jolo go Jeusalem wuku no re, Samaria ebtaame tv alum Esowo, bo kehm tumu Pita abola Jon tv bo.†

¹⁵ Eji bo je no, bo kehm song kehme ero kak ka ane bao ba ma taame, eji bo l'bel Etingi Etohko.

‡ 8:7 8:7 Mak 16:17 § 8:8 8:8 Jon 4:39-42 * 8:12 8:12 Mat 28:19 † 8:14 8:14 Elt 15:7

¹⁶ Tibre nnene limm, no ma bel, sehngem re ewohngalahb ji ji bo bele no go mbing nyi Jisos.

¹⁷ Bo kehm kunu bo abo go esi, bo kehm soro bel Etingi Etohko.

¹⁸ Eji Saimon nyehne re, eji abatiingetib kunu bo abo, owo wahnge bo ma bel Etingi Etohko, owo á kehm taame akpohko ka Pita abola Jon,

¹⁹ kehm bungu re, “Tob ka-m wahn nsahm nyia, eji nne awohng awohng no n l'kun-e ebo, á l'tob bel Etingi Etohko.”[‡]

²⁰ Pita kehm bungu tong-e re, “Wo, a akpohko akpohko enya m bahke yele go ellulagun, eji a kp'tiri re a bahke gunu ayare nya Esowo go akpohko.

²¹ Egahre ellong a wobem. Tibre eltim ena limm saang go esamahr bi Esowo.

²² Gbo ndon go ab'bi nyaa, wo kak ero ka Jehova, eji fundiki á l'tahm ka-a go ebi ntir nyi a ma tir a.

²³ N kp'nyehne re, ala kpo teal-a sehng, a wob ngbekobo nyio nyi abiafem.”

²⁴ Saimon kehm faange Pita, a Jon re, “Kaken ero ka Jehova ka-m, goji ejum ajehng ajehng ji m bungu no l'ki-m lim.”

²⁵ Eji bo ma bung alum Esowo, fere yiimi ntianse ka Esowo, Pita abola Jon kehm feere go Jeusalem. Go mbang elkehng ebo, bo jo bungu alum Esowo mbang mbang go abon ajahbe ba Samaria.

Filip, a nj'joka nne no lohng go Itiopia

[‡] **8:19 8:19** 1 Tim 6:5

²⁶ Enjel nyi Jehova kehm bungu tong Filip re, “Mehl, song go erede nfam, edi jio ji mbang li no, nyi bomo go Jeusalem tete rehng go Gasa, mbang nyio nyi li elka emahng.”

²⁷ Á kehm mehle, soro tahm. Nne Itiopia awohng no bo fang-e no, kehm kehme elsehng kehnge. Nne noo jolo nj'joka nne no jo kuuru nsol afang nya ntul a nnenkal no jo fili Itiopia, no bo jo lung-e re Kandes. Á je go Jeusalem song kak Esowo.

²⁸ Eji á kp'kehng, á ji go ege a ntrok, jo lung nwer nyi nnyehnamahr Aisaya nyono no.

²⁹ Etingi Etohko kehm bungu tong Filip re, “Song, wo jen kohlo ntrok nyio!”

³⁰ Filip kehm soro be asongo, kehm wuku nne noo kp'lungu nwer nyi nnyehnamahr Aisaya nyono no. Á kehm-e bahbe re, “Anv, a kp'kahne ji a kp'l'lunga?”

³¹ Nne noo kehm-e faange re, “Tohko tiki jol re, nne wo lennge ka-m, n nehm kahn.”

Á kehm tongo Filip re á wahr, ji go ntrok nyio kohl-e.

³² Edi nwer Esowo ji á jo l'lung li re,

“Á jolo ana njoro nyi bo ma rod,
yahke wul.

Á jolo ana mmon a njoro no kil biingi,
eji bo kp-e kpudu anyar.

Á belle na belle, jol ellum anehng anehng á
bungem.

³³ Bo kehm-e rede.

Jol eji bo kahne no re,
yebli eno, bo ten-e tv o.

Nnene limm, no bahke ma bung bade et'tohngo eje.

Tibre elkin ene kpeem li go njini nyia.”

³⁴ Nne noo o kehm bahbe Filip re, “Anv, nnyehnamahr Esowo bungu bada nyehne? Á bungu bade elnea, afi bada nne nondikandiki?”

³⁵ Filip kehm bomo elbungu bade edi nwer Esowo ji á jo lung, fere tiing-e nnoobo etib bada Jisos.

³⁶ Eji bo jo sehng asongo, bo kehm song rehng go ebgba abehng. Nne noo kehm soro bung re, “Nyehn ebgba ana! Jen ji bahke wahnge n k'bel ewohngalahb!”

³⁷ (Filip kehm faange re, “A li ma bel ewohn-galahb anv, a l'taame eltim eltim ena kpee.” Nne noo kehm faange re, “Me n taame re, Jisos Kraist wo li Mmon Esowo.”)§

³⁸ Á kehm limi re ntrok nyio yiimi. Filip, a nne noo, bo kehm badde yel go ebgba. Filip kehm-e wohngo alahb.

³⁹ Eji bo lohngo alahb mao, etohko ji Jehova kehm soro rod Filip, tahm a ne. Nne noo we kpeem nyehn. Á kehm soro asi eljen asongo a eyebatahng.*

⁴⁰ Bo kehm nyehne Filip go Asdod. Á kehm soro asi asongo go Sisaria, jo bung alum Esowo mbang mbang go ejahbe ajehng ajehng ji jolo go mbang.

§ 8:37 8:37 Mak 16:16 * 8:39 8:39 Mat 8:11

9

Ana Sol wane Jisos
(Elt 22:3-16; 26:9-18)

¹ Ngare nyio Sol kp'kpeka nyam abat'toono Ntul a Jisos re á bahke wulu bo. Á kehm tahme goji ntubesi abalimajom,

² kehm song tong-e re á ka-e awer, á tahm a nya, song tib go ntahk ero nyi li go Damaskus, eji jol afi á nyehne ane bao ba kp'toono mbang nyio nyi nfenfe, á l'bob bo aneblum, a anebkal anebkal, feere a bo go Jeusalem.*

³ Eji Sol ma kabbe go Damaskus, ellennge kehm lohngo go elbung ya tub-e.†

⁴ Á kehm fooro gbo ndi, fere wuk nne no jo bung a ne re, “Sol, Sol, jen ji wahng ka a kp-m nohko anae?”

⁵ Sol kehm bahbe re, “Wo nne awo, Ntul?”

Á kehm faange re, “Me Jisos wo, ji a kp'nohko.

⁶ Mehl, wo song ejahbe jio, owo bo bahk-a tibi ji a bahke limi.”

⁷ Ane bao ba jo jen a ne, wuku ellum ellum. Nnene bo nyehnem. Kehm kpoko bo esi, bo yiimi na yiimi anyo kaa.

⁸ Sol kehm mehle. Eji á lennge amahr enye, ejumjum á kpeem jo ma nyehn. Bo kehm-e jabbe ebo, tahm a ne go Damaskus.

⁹ Á kpeem jo nyehn tete nfung era, jol ejumjum á kpeem jo li, alahb á kpeem jo wo.

¹⁰ Nt'toono Jisos awohng jolo go Damaskus, no bo jo lung-e re Ananayas.

* 9:2 9:2 Gal 1:13; Fil 3:6 † 9:3 9:3 1 Kor 15:8

Á nyehne Ntul a Jisos kp-e lungu re, “Ananayas!”

Á kehm faange re, “Me ga, Ntul.”

¹¹ Ntul a Jisos kehm bungu tong-e re, “Mehl, wo song go etahk Judas ji li go efak ji bo kpo lung re Ntoorambang, wo song kpiri nne no lohng go Tarsus, no bo kpo lung-e re Sol. Á kpi ero kak.

¹² Sol nyehne nne go nlem, no bo kpo lung-e re Ananayas kp'bake re á ba kun-e ebo, eji á l'kpe nyehn.”

¹³ Ananayas kehm faange re, “Ntul, ane gbalee ma-m tub eka bada nne noo, ana á ma sahb n'nohk ane eba go Jeusalem.

¹⁴ Anv ana, á ko nsahm goji atubesi abalima-jom, eji á l'ba bob ane kpee ba kp'kake ero go ega mbing.”

¹⁵ Ntul a Jisos kehm bungu tong-e re, “Song na song! M m-e yehke re á lok-m, eji mbing enyame l'yeere goji ane ba ki nyi Esowo, a atul, go abone Israel.

¹⁶ M bahk-e tibi ajoobo arem nya á bahke nyehne tib go egame esi.”[‡]

¹⁷ Ananayas kehm soro tahm song rehng go etahk jio, sehng song yel ekp'kpa, kehm song kunu Sol ebo ebe, kehm bungu re, “Egban Sol, Ntul a Jisos ji a nyehn-e go mbang nyi a lohngo no jo ba, ye wo ma-m tum a, eji a l'kpe nyehn, Etingi Etohko fere rur go ega eltim.”

¹⁸ Amahr Sol kehm soro lennge, jolo ana ebl'lu bi laad-e no. Á kehm soro nyehn saang, kehm soro tahm, bel ewohngalahb.

[‡] 9:16 9:16 2 Kor 11:23-28

¹⁹ Á kehm lehke nsol, fere kpe bel eko, fere kang abon afung ntiil a abat'toono Jisos go Damaskus.

Ana Sol bungu alum Esowo go Damaskus

²⁰ Sol kehm soro tahm go ntahk ero, song kehme eltibi bada Jisos re, ye wo li Mmon no Esowo.

²¹ Ane kpee ba jo wuk-e, kehm kpoko bo esi. Bo kehm kehme elbungu re, “Nne noa sang jo wul ane ba jo taame tv mbing nyia go Jerusalema? Ji wahnge á ba a, á ba re á ba bob bo, feere a bo song ka atubesi abalimajom.”

²² Sol kpe gbal na, bel eko go alum Esowo abungu. Jus ji jolo go Damaskus, jo fohko bo nk, tib eji á jo tib re, Jisos wo li Kraist.

²³ Eji ma kang afung tvv, Jus kehm toobo re bo wul-e.

²⁴ Sol kehm sebe kahn ana bo toobo no. Tibre bo jo baab-e go ati mbu atv a njul re bo wul-e.

²⁵ Atv, abat'toono ebe kehm-e kake go ejeere, siir-e ekahme ji jolo sennge Damaskus kak, bum njahm ekahme nyehko.§

Ana Sol jolo go Jeusalem

(Gal 1:17-24)

²⁶ Eji Sol rehngge go Jeusalem, á jo sebe re, á yel go ellong abat'toono Jisos. Bo jo fahl-e fahl. Bo joom bum re, á tob li nt'toona Jisos.

²⁷ Owo Barnabas kehm-e koko ba a ne goji abatiingetib Jisos, fere tooro tong bo ana Sol nyehne Jisos go mbang, Jisos fere bung a ne. Á t'tob tong bo ana Sol jo bung alum Esowo go mbing nyi Jisos esahb esahb go Damaskus.

²⁸ Sol jo jene a bo, fere jo bung alum Esowo go mbing nyi Jisos esahb esahb go Jeusalem.

²⁹ Á kehm tob bung tong Jus ji jo bung Grik. Bo kehm kehme nfaabe lim, fere jo gare ana bo bahk-e wulu.

³⁰ Eji abat'toono Jisos bako sebe ano kahn, owo bo kehm koko Sol, tahm a ne go Sisaria, fere tum-e re á song go Tarsus.

³¹ Owo wahnge aneb ero bao ba jolo go Judea, a Galili, a Samaria bele eyebatahng ngare nyio, tibre nfem anyehng anyehng kpeem jol. Ero kpe gbal na go nrur, fere t'tahne. Bo jo jene go elfahle ni Esowo. Etingi Etohko jo kake bo eltim.

Ana Pita tahme go Lida, a Jobba

³² Pita jo yannge, je edi ajehng ajehng. Efung abehng á kehm jeke go Lida, song nyehn aneb Esowo ba jolo go.

³³ Owo á nyehne nne no bo jo lung-e re Anias ji jolo mbanne. Nnya enehkeni nyi á ki kpe jo ma mehl go edilnong.

³⁴ Pita kehm bungu tong-e re, “Anias, Jisos Kraist bahk-a limi, a nob. Mehl, wo tuungu edilnong eja ya!”

Tvtv ona Anias kehm soro mehl.

³⁵ Eji ane bao kpee ba jolo go Lida, a Seron nyehn-e no, bo kehm taame tv Esowo.

³⁶ Nnenkal awohng jolo go Jobba, no bo jo lung-e re Tabita. Á tob jolo nt'toona Jisos. Mbing enye nyi Grik, bo jo lung-e re Dorkas ji lohngo re mbilekpa. Á jo limi nnoobo ngare anyehng anyehng, fere jo kak akpak ebo.

³⁷ Ngare nyio á kehm gboko eyam, soro kpo. Eji bo wul-e alahb, bo kehm-e rodo song bum go nkimi nyi jolo go ero enyong.

³⁸ Lida jolo kpidi kpidi kohlo Jobba. Eji bo wuku re, Pita li go Lida, bo kehm tumu ane abal tv re bo song tong Pita re, titi, á ba elwaare, á k'laange.

³⁹ Owo Pita kehm soro toobo ebjing, tahm toono bo. Eji bo ba no, ba rehng go Lida, bo kehm-e koko tahm a ne go nkimi nyio nyi jolo go ero enyong. Akalebun kpee ba jolo o jo ling, kehm bake ba senngé Pita kak, kehm-e tibi akpawobo, a nsol elliibi nyindiki budu, nyi Dorkas limi no, eji á kpeke li go elkpin.

⁴⁰ Pita kehm tongo bo re bo lohng go nkimi nyio. Á kehm jamme alahng, kehm kake ero, kehm keebe seenge nkivne nyio, kehm bungu re, "Tabita, mehl me!"

Á kehm soro lennge amahr enye. Eji á nyehne Pita, á kehm mehle ji.

⁴¹ Pita kehm-e jabbe go ebo, mehl-e yiimi, kehm lungu aneb Esowo, a akalebun, kehm tibi bo Dorkas ana á ma lohko nyahme.

⁴² Eka jia kehm yeere go Jobba. Ane tvv kehm taame tv Jehova.

⁴³ Pita kange o Jobba afung tvv go etahk Saimon ji jolo nne eltum agunyam.

10

Pita a Kornilius

¹ Nne awohng jolo go Sisaria, no bo jo lung-e re Kornilius. Á jolo ntubesi a nsoja no jo lim eltum

go ellong nsoja nyi bo jo lung re, “Ellong nsoja nyi lohng go Itali.”

² Á jolo nne no Esowo jo kor-e. Á fere jo fahl Esowo, a ane kpee ba jolo go ege a nlaaga. Á jo wehre abo, jo ko akpohko enye, jo lim nnoobo ka ane, fere jo kak ero ka Esowo kpe kpe ngare.

³ Jolo ejum nkaranka era nyi elgung, nyi á nyehne enjel nyi Esowo kp'bake, kehm ba lung-e re, “Kornilius!”

⁴ Eji á jo seenge enjel too, anyar kehm-e lamme. Á kehm-e bahbe re, “Jen ji, nsoo?”

Enjel nyio kehm-e faange re, “Esowo ma-a buumu, eji á ma nyehn nnoobo enya, fere wuk ero eba.

⁵ Tum ane anv, bo song go Jobba, song lung Saimon ji bo kpo lung-e re Pita.

⁶ Á kpo kang go etahk Saimon, nne eltum agunyam. Etahk eje li go nkpe agburu aya.”

⁷ Eji enjel nyio nyi jo bung a ne ma tahm, Kornilius kehm lungu alokeltum ebe na abal, a nne a nsoja awohng no jolo a ne bad bad, no Esowo jo tob kor-e,

⁸ kehm tongo bo kpee ji ma lim, kehm tumu bo tv go Jobba.

⁹ Etoono efung behko eji bo ma kabbe Jobba ngare efin, Pita kehm wahre go ero etahk re á song kak ero.

¹⁰ Owo njal kehm-e yame. Á kehm kehme elsebe ejum ji á bahke lehke. Ngare nyi bo jo lam nsol alehke re bo ka-e, Pita kehm nyehne nkpokosi ejum.

¹¹ Á nyehne elbung ma lennge, fere nyehn ejum ji kp'badde abake, jolo ana nsubu nyi bo ma jabbe go es'sili emni emni kp'badde beem abake ba rehng go ndi.

¹² Ajoobo enyam gbalee woomo ona atahng, enyam ana eguumu, a enyo, go ntere.

¹³ Pita kehm wuku nne no bungu a ne re, "Pita tahm, wo wul li!"

¹⁴ Pita kehm faange re, "E'ee Ntul, n ka li a li esabsab nnyam nyi ki li saang."

¹⁵ Á kehm kpe wuk ellum nehko re, "Ji Esowo ma tong re, li saang, ka kpe bung re, li esabsab ejum."*

¹⁶ Limi ano nkpel na era, tete bo rod nsubu nyio tahm a nyi go elbung.

¹⁷ Eji Pita nyehne nkpokosi nyio, kehm-e fohko nk. Ngare nyi á kpi ntiri ntiri bade ana nkpokosi nyio lohngo lohng, ane bao ba Kornilius tumu bo ebba yiimi go mbuga. Tibre bobtohko bahb edi ji etahk Saimon li no.

¹⁸ Bo kehm lungu ane ba jolo etahk Saimon, fere bahb bo re, joare Saimon ji bo kpo lung-e re Pita noa o.

¹⁹ Ngare nyio Pita kpi ntiri ntiri bade ejum ji á ma nyehn. Etohko ji Esowo kehm soro tong-e re, "Nyahnee, ane ara baa go, kp-a sebe.

²⁰ Mehl, wo badde song! Ka fahl eltoono bo, tibre me wo ma tum bo."

²¹ Pita kehm badde je goji ane bao, kehm song tong bo re, "Me wo a, ji n kp-m sebe. Jen ji wahng ka m ba no?"

* **10:15 10:15** Ef 2:14

²² Bo kehm faange re, “Kornilius ji li ntubesi a nsoja wo ma-r tum. Á li nnooba nne no kpo fahl Esowo, no Jus kpee kpo kak-e. Enjel nyi Esowo nyi tong-e no re, á tiingi tv-a, wo je go ege etahk, eji á l'wuk ji a bahk-e tongo.”

²³ Pita kehm tongo ane bao re bo ba, ba kang o. Etoono efung behko Pita kehm tahme toono bo. Abon Esowo bandiki ba jolo go Jobba kehm-e tob toono.

²⁴ Njahmfungfu nyehko bo kehm rehngge go Sisaria. Ngare nyio Kornilius ebtíngi ane ebe, a ate ebe re, bo ba ji, jo sik bo.

²⁵ Eji Pita yahke yel ekp'kpa ji Kornilius, Kornilius kehm ba wan-e, gbo jamm-e alahng go ege alata, gong kak-e.

²⁶ Pita kehm-e tabe yiimi, kehm bungu re, “Mehl yiimi, me nne wo, ana wo.”†

²⁷ Ngare nyi Pita yele go ekp'kpa, á kpi mbungu mbungu a Kornilius. Á kehm song kpíri ane gbalee ma ba ji edi ajehng.

²⁸ Á kehm bungu tong bo re, “Wahnfono antahng kp'kahne re, wahr Jus, ntahm enyahre bungu re, wahr k'jo ji elbong goji ane baka baka ba ki li Jus, fere jo kod abo a bo, jo lim ejum ajehng ajehng. Esowo ma-m tib re, me n k'jo lung nne awohng awohng re nne noka noka. Jol me n k'jo lung nne re, á limm saang.

²⁹ Eji n tumu ane tv-m, m ba na ba. N kp-n bahbe re, Jen ji wahngge n tumu tum ane tv-m?”

³⁰ Kornilius kehm faange re, “Lela nfung eni ngare ny'nehm ana n jo kak ero egame etahk

† 10:26 10:26 Ell 19:10; Luk 5:8

nkaranka era nyi elgung ana n kpo kono ellimi. Nne awohng kehm lohngo ba, ba yiim-m go esamahr. Á kake abarebare nsol nya jo ya na ya.

³¹ Á kehm bungu re, 'Kornilius, Esowo ma-a buumu, eji á ma nyehn nnoobo enya, fere wuk ero eba.

³² Tum ane, bo song go Jobba, song lung Saimon ji bo kpo lung-e re Pita. Á kpo kang go etahk Saimon ji kpo lim eltum agunyam, ji lene go nkpe agburu aya.'

³³ N kehm soro tum ane tvtv tv-a. Emnob sehng goji a ma taame ba. Owo wahng ka e jehk ana go esamahr bi Esowo kp'siki re wahr wuk ajehng ajehng ji Esowo ma-a tong re wo ba tong-r."

Alum nya Pita bungu no

³⁴ Pita kehm kehme elbungu re, "Anv, me n seb kahn re, etingitingi, Esowo kpehme rang nne awohng awohng.‡

³⁵ Nne awohng awohng no l'fahl-e, fere lim mbang nyi kp'nobo, á bahk-e koko.

³⁶ Wahn kp'kahne etib bi á tiingi Israel, eji Jisos Kraist ko nnoobo etib bio bi elkoono ba a bi. Ye wo li Ntul no ane kpee.

³⁷ Ngare nyi Jon ma tiingi etib bio bi ewohn-galahb, bo kehm bomo elbungu alum nya Jisos go Galili. Alum nyao kehm yeere go Judea kpee.

³⁸ Wahn kp'kahne ana Esowo yaange etohko eje wohngo Jisos ji Nasaret, fere ka-e nsahm. Jisos jo yanng, fere jo lim nnoobo, jo lim ane bao ba nnehm jo nohk bo, bo jo nob. Tibre Esowo jolo a ne.

‡ **10:34 10:34** **Elt** 8:27,37-39; **Rom** 10:12

³⁹ “Wahr ba li atianse go nsol nyio nyi á limi no go Jeusalem kpee tete rehng go nkpohko ejahbe Jus anyehng anyehng. Bo kehm-e kumu lake go ekros, á kpo.

⁴⁰ Esowo kehm-e nyahme go nfung era, fere tib-r ye. §

⁴¹ Ane kpe kpe sang nyehn-e no, sehngem wahr ba nyehn-e no, wahr jia ji Esowo yehk-r no ana atianse enye, wahr jia ji jo li, fere jo wo a ne ngare nyi á ma nyahme go elkv.*

⁴² Á tong-r re wahr jo bung alum Esowo tong ane, fere jo yiimi ntianse re, ye wo Esowo m-e yehke re á lam aneb mbir mbir, fere lam ane ba ma kpo. †

⁴³ Abanyehnamahr Esowo kpee jo buntu bada ne re, nne awohng awohng no l'taame tv-e, á bahke bele eltahmeká go ege abiafem, tib go ege a mbing.”

Ana ane baka baka ba ki li Jus bele Etingi Etohko

⁴⁴ Ngare nyio eji Pita kpi mbungu mbungu, Etingi Etohko kehm gboko, bulu ane bao ba wuku alum Esowo nyao. ‡

⁴⁵ Aneb Esowo ba jolo Jus, ba toono Pita je, kehm kpoko bo esi. Tibre Esowo ebtob ka ane baka baka ba ki li Jus Etingi Etohko.

⁴⁶ Bo kehm wuku bo, bo kp'bungu ajahbe nyandikandiki, fere jo tehk Esowo. §

Pita kehm bungu re,

§ 10:40 10:40 1 Kor 15:4-7 * 10:41 10:41 Jon 14:22; 21:12-14

† 10:42 10:42 Elt 17:31 ‡ 10:44 10:44 Gal 3:2 § 10:46 10:46 Mak 16:17

⁴⁷ “Anv, l'li nyi nne bahke tene re, wahr k'wohngo ane baa alahba? Tibre bobbel Etingi Etohko ana wahr bele no fvfo.”

⁴⁸ Á kehm tongo bo re, bo bel ewohngalahb go mbing nyi Jisos Kraist. Bo kehm-e tongo re, á kang abon afung a bo.*

11

Alum nya Pita tooro tong aneb ero ba jolo go Jeusalem

¹ Abatiingetib Jisos, a aneb Esowo ba lene go Judea, kehm wuku re, ane baka baka ebtob taame tv alum Esowo.

² Eji Pita je no go Jeusalem, ane bao ba jo kor bo re ane baka baka yehke nrur, kehm kehme ntong lim a ne,

³ fere jo bahb-e re, “Jen ji wahng ka a kehm jeke goji ane ba kil yehke nrur, fere li nsol a bo?”

⁴ Pita kehm kehme ellenge ejum ajehng ajehng tong bo ana jolo no. Á bungu re,

⁵ “N jolo go Jobba, jo kak ero. N kehm nyehne nkpokosi ejum, nyi bo jabbe go es'sili emni, jo badde abake tete ba rehng egame.

⁶ Eji n seenge no nob nob, n kehm nyehne enyam, bindiki abibbib enyam, bindiki enyam ana eguumu, a enyo, go ntere.

⁷ Owo n kehm wuku ellum ni jo bung tong-m re, ‘Pita tahm, wo wul li.’

⁸ N kehm tene, nde, ‘E'ee Ntul, n ka li a li esabsab ejum ajehng ajehng ji ki li saang tete sik anv.’

* **10:48 10:48** Jon 4:40

9 N kehm kpe wuk ellum ni lohng go elbung, ni bungu re, 'Ji Esowo ma tong re li saang, ka kpe lung re, li esabsab ejum!'

10 "Limi anaana nkpel na era, nsubu nyio kehm feere tahm go elbung.

11 "Ngare ny'nehm ona, ane ara kehm soro lohng ba etahk ji e jolo no. Bo tumu bo go Sisaria tv me.

12 Etohko ji Esowo kehm soro tong-m re, me n toono bo, me n k'faabe. Abon Esowo, ane arakera baa t'tob tahm toon-m. E kehm song rehng etahk nne noo.

13 "Á tong-r ana á nyehne enjel yim no go ege etahk, nyi bungu re, 'Tum ane, bo song go Jobba, song lung Saimon ji bo kpo lung-e re Pita, á ba.

14 Ye wo bahk-a tiingi etib bi bahke wahnge ka a bel eltahre, a etahk etahk eja kpee.'

15 "Eji m bomo elbungu, Etingi Etohko kehm soro gbo, bulu bo, jang jang ana tob lim-r go mbomannahb.

16 N kehm soro buumu ellum ni Ntul a Jisos bungu re, 'Jon jo wohngo ane alahb maka maka, wahn bahke bele ewohngalahb ji Etingi Etohko.'

17 "Esowo ka ane baka baka ayare nyao, ana á tob ka-r, eji e taame tv Ntul a Jisos Kraist. Anv, me n li renan ji m bahke kehm sahde Esowo?"

18 Eji bo wuku ano me, bo kehm belle na belle soom, kehm kehme Esowo tehk re, "Esowo ebtob ka ane baka baka eyake re bo gbo ndon, fere bel elkpín."

Ero bi jolo go Antiok

19 Ngare nyi bo wulu Stiven, ebnohko gbale sehng, aneb Esowo y'yaame.* Bandiki be rehng go Fenisa, bandiki be rehng go Saiprus, bandiki be rehng go Antiok. Bo jo bungu alum Esowo tong Jus ji ji.

20 Aneb Esowo bandiki ba lohngo go Saiprus, a Sirin kehm tahme go Antiok. Bo kehm song bung alum Esowo bade Jisos tong aneb Grik fvfo.

21 Nsahm nyi Jehova jolo a bo. Ellong ane gbalee ba taame no, feere goji Jehova.

22 Aneb ero ba jolo go Jeusalem kehm wuku ana ji ma lim go Antiok. Bo kehm tumu Barnabas tv go Antiok.

23 Eltim yeb-e sehng, eji á je no, song nyehn ana Esowo ma fuulu bo. Á kehm rehke bo ane kpee re, bo soro asi go eltoono Ntul a Jisos a ntim a ntim ebo.

24 Tibre Barnabas jolo nnooba nne no bele ekakesehk, etohko ji Esowo ruru go ege eltim. Ellong ane gbalee ba kpe jo taame tv Ntul a Jisos.

25 Barnabas kehm tahme go Tarsus re á song kpur Sol.†

26 Eji á nyehn-e no, á kehm-e koko ba a ne go Antiok. Bo kehm jolo ona elya anehng, a aneb ero, jo tib ane gbalee. Go Antiok wo, bo gbo mbang lung abat'toono Jisos re ane ba Kraist.

27 Ngare nyio nyi abanyehnamahr Esowo kehm lohngo go Jeusalem ba go Antiok.‡

28 Nne awohng go bo ellong, no bo jo lung-e re Agabus kehm mehle yiimi, kehm kehme elbunu go nsahm nyi Etingi Etoko bade es'song

* 11:19 11:19 Elt 8:1-4 † 11:25 11:25 Elt 9:30 ‡ 11:27 11:27

Elt 13:1

re, egburu njal bahke bake go njini kpee.§ Njal nyio lohko ba ngare nyi Klodius jolo ntul.

²⁹ Abat'toono Jisos bao kehm toobo re bo bahke jo t'tum nsol alehke tv abon Esowo ba li go Judea, ana nne awohng awohng bele no.*

³⁰ Bo kehm limi ano, kehm kake Barnabas abola Sol nsol nyio go abo re bo ko song ka anebkul ero.†

12

Ana ebnohko kpe gbal

¹ Ngare nyio nyi Herod kehme aneb ero bandiki nohk.

² Á wulu Jems mmonannye hn Jon go ekahngkahng.*

³ Á nyehne kan re, eji á limi ano, ebyebe Jus atahng, á kehm kpe bob Pita fvfo. Ejum jia limi ngare elkak ni abred nya ki kpi ayist.

⁴ Eji bo bob-e no, bo kehm-e song kak go ngbekobo. Bo rod-e kak nsoja na eni go ebo, re bo baab-e. Ni ellong bele nsoja ane ani. Herod tiri re, elkak nio ni Pasova l'mal, á kehm-e yehke ba ka Jus.

⁵ Ngare nyio eji Pita kpeka wob go ngbekobo, aneb ero jo kake ero t'tahne ka Esowo tib go esi ji Pita.

Ana Pita foro go ngbekobo

⁶ Atv mao ma Herod jo tiri re, á bahke yehke Pita ba ka ane, Pita woomo go elka elka ni nsoja na ebal, jo lal.† Bo kak-e agbekobo na abal.

§ 11:28 11:28 Elt 21:10 * 11:29 11:29 Gal 2:10 † 11:30 11:30
Elt 12:25 * 12:2 12:2 Mak 1:19-20; 10:35-39 † 12:6 12:6 Luk 8:23

Ab'baabe baka yiimi ga mbutahk ngbekobo, jo baabe.

⁷ Owo enjel nyi Jehova kehm lohngo ba. Ellen-nge kehm yake go nkimi ngbekobo nyio. Enjel nyio kehm bunu Pita go ebahk, nyahm-e, kehm-e tongo re, “Mehl elwaare!”

Agbekobo nyao kehm soro won-e abo gbo.

⁸ Enjel kehm-e tongo re, “Gbaange egbaange eja, wo kak akpaketa enya!”

Pita kehm limi ano kpee.

Enjel kehm-e kpe tong re, “Konngo nsubu enya, wo tahm toon-m!”

⁹ Pita kehm lohngo toon-e. Á kahnem re, ji enjel jo lim lohko li etingitingi. Pita jo tiri re, á kp'leeme na.

¹⁰ Eji bo ma sehng ngbokambang a mb'baabe sa, fere sehng etoono sa, bo kehm song rehng go eti mbu ji bo ko akuungu lim, ji nne bahke sehng o rehng go nfam. Lennge ntahngtahng ka bo. Bo kehm lohngo, jo jen asongo alab mbang. Enjel kehm soro tahm, Pita sa.

¹¹ Pita, amahr kehm-e bange, á kehm bungu re, “Anv, me n lohko kahn re, Jehova ebtum enjel enye, ba tahr-m go abo nya Herod. Á ma-m fere yehke go nfem nyi Jus tiri re bo lim-m.”

¹² Á sebe kan kahn ana ma jol me, á kehm tahme go etahk Meri nnyehn Jon, Jon jio ji bo jo lung-e re Mak.‡ Owo ane gbalee jolo no, jo kak ero.

¹³ Eji Pita jo kahd go mbutahk, nlokeltum no bo jo lung-e re Roda kehm bake.

‡ 12:12 12:12 Elt 15:37

14 Á liingi kan ellum ni Pita, á bele eyebatahng sehng, jol mbu á lenngem. Á be na be, yel ekp'kpa, kehm song tong ane bako re, "Pita noa, yim go mbutahk."

15 Bo kehm-e tongo re, "Anv, esahl bi kp-a lima?" Á kehm faange re, "Lohko li etingitingi."

Bo kehm bungu re, "Enjel enye nyi ona."§

16 Ngare nyio Pita kpi nkahde nkahde go mbutahk. Bo kehm song lennge mbu, kehm-e nyehne. Eji bo nyehn-e no, kpo bo esi sehng.

17 Pita kehm bunu bo ebo re bo rahke, bo k'kpe bung. Á kehm kehme eltooro ana Esowo m-e yehke go ngbekobo, kehm bungu re, "Tob tongen Jems,* a abon Esowo bako fvfo."

Pita kehm soro tahm eje ejahbe jindiki.

18 Eji efungfu se no, ebud nsoja jokko na jokko. Bo kpeem kahn ji ma lim eyaame ji Pita.

19 Herod kehm tongo ane ebe re bo song seb Pita. Bo seb-e, bo we tikem nyehn. Á kehm kehme ab'baabe bao abahbe bahb, kehm tongo re bo wul bo. Herod kehm tahme go Judea, sehng song rehng go Sisaria, sa kang go.

Ana Herod kpo no

20 Herod, eltim jo rak-e tob aneb Taya, a Saidon sehng. Bo kehm tahme egom re bo song nyehn Herod. Bo gbo mbang senngge Blastus eltim feere go bo ejang. Blastus jolo ntubesi alokeltum Herod. Bo kehm tahme goji Ntul a Herod, song gboong-e re, "Titi, e ma-a gbo." Tibre ajahbe ebo

§ 12:15 12:15 Luk 24:37 * 12:17 12:17 Gal 1:19; Jems 1:1

belem edi jindiki ji bo jo je, song gunu nsol alehke, sehngem ejahbe ji Herod ji ji bo jo je.

²¹ Efung bio bi Herod kunu tv, á liibi nsol nyi atul kpo liibi, kehm ba ji go eti etul eje, kehm kehme elbungu a ane.

²² Ane bao kehm soro rabe re, “O alum nya nne sang, nya esowo nya!”

²³ Tvtv ona enjel nyi Jehova kehm soro gbul Herod tub ndi. Tibre á kaam Esowo ellub. Aroongo kehm-e lehke, á kpo.

²⁴ Alum Esowo kehm kpe yeere, fere gb'gbal.

²⁵ Barnabas, a Sol, eji bo ma mal eltum ebo go Jeusalem, bo kehm koko Jon Mak tahm a ne kehngé.

13

Ana bo yehke Barnabas, a Sol, tum eltum Esowo

¹ Abanyehnamahr Esowo jolo go ero bio bi Antiok, a at'tibi fvfo. Abing ebo, noko, bo jo lung-e re Barnabas, noko Simeon ji bo jo lung-e re Naija, noko Lusius ji jolo nne a Sirin, noko Manaen ji bo jolo nlaaga anyehng a ntul a Herod tete bo gbal, noko Sol.

² Eji bo jo kak Esowo, fere jo bade elbo njal, Etingi Etohko kehm bungu tong bo re, “Yaken Barnabas, a Sol, bo jo lim eltum ni n yehke bo.”

³ Bo kehm bade elbo njal, fere kak ero, kunu bo abo, kehm tumu bo re bo song.

Go Saiprus

⁴ Ana etohko ji Esowo tumu bo, bo kehm tahme go Silusa. Ona wo bo yele go egbang, tahm go Saiprus.

⁵ Eji bo rehng go Salamis, bo kehm kehme alum Esowo bung go ntahk ero nyi Jus. Jon Mak jolo a bo, jo kak bo ebo go eltum.

⁶ Eji bo jo yanng ejahbe jio ji li elka alahb, bo kehm song rehng go Pafos. Owo bo kpiri nne a ntaane awohng no bo jo lung-e re Barjisos. Á jolo nne a Jus no jolo nkimfahnga nnyehnamahr.

⁷ Á jolo a ntubesi ejahbe no bo jo lung-e re Serjes Polos ji jolo ekahnkahn nne. Ntubesi noo kehm lungu Barnabas, a Sol, tibre á jo sebe re á wuk alum Esowo.

⁸ Nne a ntaane noo no bo jo lung-e go alum Grik re Elimas joom taame tv Bab Sol. Á jo sebe re, á senng ntubesi noo eltim, á k'taame.*

⁹ Sol ji bo jo lung-e re Pol ji etohko ji Esowo rur-e go ege eltim, kehm seenge nne a ntaane noo too,

¹⁰ kehm bungu re, “Wo mmon a nnehm noa, wobgbal go enehm sehng, a ab'bi. A kpo ko etingitingi ekv. A kpo seb re, wo yaange etingitingi ji Esowo, fere kak efahng.

¹¹ Erakatahng ji Esowo bahke gboko tub-a anv, a bahke wake amahr. A nehm kpe waka nyehn njul nyia.”

Tvtv ona ejanng kehm soro gbo-e, á kehm kehme ane seb, ba bahk-e jabbe go ebo, jo tib-e mbang.

* **13:8 13:8 2 Tim 3:8**

¹² Ntubesi noo kehm taame, eji á nyehne ejum ji ma lim. Tibre eltibi nio ni Esowo jo kpo-e esi sehng.

Go Antiok ji Pisidia

¹³ Pol, a ane ebe bako, bo kehm yele egbang go Pafos, song rehng go Perga ji Pamfilia. Jon Mak kehm beke bo sa, feere eje go Jeusalem.†

¹⁴ Bo kehm tahme go Perga, sehng song rehng go Antiok ji Pisidia. Eji efung Esabat rehng no, bo kehm tahme go etahk ero ji Jus, song ji.

¹⁵ Eji ane bao ma lung atahm nya Moses, fere lung alum nya abanyehnamahr Esowo nyono no, atubesi etahk ero jio kehm lungu bo re, “Abonanee, joare n kp'kpi elle anehng anehng ni n bahke tubu ane, tuben bo!”

¹⁶ Pol kehm mehle yiimi, faake ebo, kehm bungu re, “Anebe Israel, a wahn jia ji kpi Esowo fahl, wuungen atung!

¹⁷ Esowo bio bi Israel, ye wo yehke babnso ejahre, fere lim bo, bo rur, eji bo jolo go Ijib. Esowo kehm yehke bo go Ijib ege a nsahm.

¹⁸ Á le bo go elka emahng ejum nnya atahl abal.

¹⁹ Esowo tane ejahbe na ebsehma go ndi nyi Kenan, faake a ndi nyio bak bo.

²⁰ “Owo á kehm kake bo abalamalam ba jo lam alam ane bao go ejum nnya atahltahl atahl abal a nnya ewubu, tete kehm song rehng go ngare nyi nnyehnamahr Samuel.

²¹ Bo jo sebe re bo bel ntul. Esowo kehm kake bo ntul no bo jo lung-e re Sol mmon a Kis, no

† 13:13 13:13 Elt 15:38

lohng go et'tohngo ji Benjamin. Á jolo ntul go nnya atahl abal.

²² “Eji Esowo ma fak Sol, á kehm fere lim Devid jol ntul abo. Alum nya Esowo bungu bade Devid li re, ‘Devid ji mmon a Jesi wo li elkohn nne no kor-m no, no bahke limi ajehng ajehng ji n l'tong-e re á lim.’

²³ “Go et'tohngo ji Devid wo, Jisos lohng no. Esowo lim-e nt'tahre no Israel ana á nyame no.

²⁴ Re Jisos kehm bake, Jon ebtohko tiingi etib bi ewohngalahb, tong anebe Israel kpee re bo gbo ndon go bo abiafem.‡

²⁵ Eji eltum ni Jon yahke mal, á kehm bungu tong bo re, ‘Anv, n kp'tir re, me n li elkohn nne awo? Me sang li nne no n kp-e siki, no kp'bake go, jol me n tohkem ffuumu re, me n fannge alehke akpaketa enye.’§

²⁶ “Abonanee, abon Ebrahim, a ane ba wob go egahne ellong, ba kp'fahle Esowo, wahr ba wahnge etib bia bi eltahre ma ba.

²⁷ “Tibre ane ba jolo go Jeusalem, a atubesi ebo, tib esi ji bo ki-e liingi re ye nt'tahre wo, jol alum nya abanyehnamahr nya bo jo lung go efung Esabat abehng abehng bo kahnem, bo lohko lim ebung ji enyehnamahr jio jol go etingitingi ji bo kimi elam re bo wul-e.

²⁸ Jol eb'bi ajehng ajehng bo nyehnem ji kehn fuumu re bo wul-e. Tvtv ona bo tongo Paillet re á yak-e ka nsoja, bo wul-e.*

‡ 13:24 13:24 Luk 3:3 § 13:25 13:25 Luk 3:16 * 13:28 13:28
Mat 27:22

²⁹ Eji bo ma lim kpee, ana nwer Esowo bungu no bada ne, bo kehm-e fono go ekros, song kak elahm.

³⁰ Esowo nyahm-e go elkv.

³¹ Afung tvv nya á jo kpiri ane ba jo lohng go Galili, jo toon-e tahm go Jeusalem. Bao ba li atianse enye anv.

³² “Wahr ko nnoobo etib ba abi, bi Esowo nyame no tong babnso ejahre.

³³ Ana Esowo nyame no tong bo, ano wo á ma lim ka wahr ji li abon ebo, eji á nyahme Jisos go elkv. Ano wo fvfo bo tob nyon go nwer ebal nyi Saams re,

“ ‘Wo wo li mmon ewame, lela wo a ma jini.’

³⁴ “Ano wo Esowo bungu no bade elnyahme ni Jisos go elkv, fere bung bade ana á l'k'bol go ndi re, ‘Elfuulu ni m bahk-e fuulu bahke jolo etingitingi elfuulu ni kp'bare saang, ni n nyame tong Devid.’

³⁵ “Edi nwer a Saams jehko kpe bung re, ‘A nehm taame re nnooba nlokeltum ewa bol go ndi.’

³⁶ “Tibre Devid go ege a ngare á loko Esowo, fere jo lim ejum ajehng ajehng ji Esowo sebe re á lim, tete á kpo. Bo kpa-e kak kohlo alahm nya babnsoo. Á b'bol go ndi.

³⁷ Ye ji Esowo nyahm-e go elkv, á bolem go ndi.

³⁸ “Owo nobo re wahn kahn abonanee re, nne noo wo wahng ka e kp-n tiingi etib bi eltahmeka go abiafem.

³⁹ Nne awohng awohng no l'taame tv-e, á bahke limi, á for go ege abiafem kpee. Tibre atahm nya Moses nehm ma lim nne, á for go ege abiafem.†

⁴⁰ “Kunen ekpu, goji ejum ji abanyehnamahr Esowo bungu no l'ki-n lim, ji bo bungu re,

⁴¹ “ ‘Wahn ane ba nsol kil jo lub-n, nyehne nkpokosi, wahn kpo, k'kahn. Tibre ejum ji m bahke limi go egahne ngare, n nehm tiki taame, jol afi nne lennge na ka-n.’ ”

⁴² Eji Pol, a Barnabas jo lohng ekp'kpa ero jio, ane bao kehm gboongo bo re, bo kpe feere ba efung Esabat behko, kpe ba tib bo budu.

⁴³ Eji ane ma lohng ekp'kpa ero, Jus gbalee, a ane baka baka ba jo kak Esowo ana Jus, bo kehm toono Pol, a Barnabas. Bab Pol kehm tibi bo, fere rehke bo re bo soro asi, yiimi ano go nnoobo nyi Esowo.

⁴⁴ Etoono Esabat jehko, ka riki ejahbe jio kpee kame na kam ba rur, jo wuk alum Esowo.

⁴⁵ Eji Jus nyehne ellong ane ana bao, ala kehm kehme bo teelee. Alum nya Pol jo bung, jo sabe bo sehng, bo kehm-e jahre alum, fere jo su-e.

⁴⁶ Pol, a Barnabas, bo jo kpe bung na esahb esahb re, “Fuumu re bo tohko bung alum Esowo tong-n.‡ Eji m ma ten, wahn eblam elnahne antahng re, kpeem fuumu re wahn bel elkpin ni li go njinanjini.§

⁴⁷ Tibre Jehova tong-r re,
“ ‘M ma-n yehke re wahn jol ellennge ka ane ba ki nyi Esowo,

† 13:39 13:39 Rom 10:4 ‡ 13:46 13:46 Mat 10:6 § 13:46 13:46 Luk 7:30

goji eltahre l'rehng go ejang njini abehng abehng.'

⁴⁸ Eji ane baka baka wuku ano, eltim yebe bo sehng. Bo kehm kehme alum Esowo tehk. Ane bao ba Esowo ma yehke re bo bel elkpin ni li go njinanjini, bo t'taame.

⁴⁹ Alum Jehova kehm yeere na yeere go ejahbe jio kpee.

⁵⁰ Jus kehm kehme atubesi nfam nyare, fere nyare anebkal ba ki jol Jus, ba jo kak Esowo, ba jolo aj'jok ane. Bo kehm kehme Pol a Barnabas gbak, fere kam bo re bo tahm ejahbe jio song.

⁵¹ Bab Pol kehm kumu ebtohko go bo akpade tv bo, fere tahm go Ikonium.*

⁵² Abat'toono Jisos ba jolo o, etohko ji Esowo ruru bo go bo a ntim, bo fere bel eyebatahng.

14

Go Ikonium

¹ Eji bo rehng go Ikonium, Pol, a Barnabas, bo song yel go ekp'kpa ero ji Jus. Bo bungu sehng, toono o, Jus gbalee taame, a ane baka baka gbalee fvfo.

² Jus ji ki taame, kehm kehme ane baka baka nyare, fere senng bo ntim tob aneb Esowo.

³ Abatiingetib Jisos bao kange ona afung tvv. Bo jo bungu a esahb esahb bada Jehova no yiimi ntianse ka alum nyao nya nnoobo enye, eji á ka bo nsahm re bo jo lim akpokosi.*

* 13:51 13:51 Luk 10:11 * 14:3 14:3 Hib 2:4

⁴ Ane ba jolo go ejahbe jio kehm yabe. Egom jindiki jolo ka Jus, egom jehko jolo ka abatiingetib Jisos.

⁵ Owo ane baka baka, a anebe Jus, go atubesi ebo kehm toobo re, bo nohk Pol, a Barnabas, fere tuubu bo atal.†

⁶ Bab Pol wuku kan ano me, bo kehm soro be tahm go Listra, sehng o song rehng go Derbe, a abon ajahbe ba Likaonia ba tob jol o fvfo.

⁷ Owo bo bungu alum Esowo.

Go Listra

⁸ Nne jolo go Listra, no ki jo ma jen. Á jolo mbanne bomo ngare nyi bo jel-e na jel.

⁹ Á ji, jo wuungu atung go alum Esowo nya Pol jo bung.

Pol k'kahn re, nne noo ebtaame elkohn eltaame ni á bahke nobo.‡ Owo á kehm-e soro seenge too,

¹⁰ kehm bungu wahre wahre tong-e re, “Mehl yiimi?”

Á kehm soro mehl, kehme eljene.

¹¹ Eji ellong ane bao nyehne nkpokosi nyi Pol ma lim, bo kehm kehme elrabe go alum nya Likaonia re, “Asowo ebbadde ba go elfoongo ni nne!”§

¹² Bo lungu Barnabas re Sus, fere lung Pol re Hermes, tibre Pol wo jolo mb'bungu.

¹³ Nlimajom no elom ji bo jo lung re Sus kehm koko efong, a at'tul, tahm a nya go eti mbu, tibre bo si etahk elom jio go esi mbang. Owo bo je no re bo song lim njom ka abatiingetib Jisos bao.

† 14:5 14:5 2 Tim 3:11 ‡ 14:9 14:9 Mat 9:28 § 14:11 14:11 Elt 28:6

¹⁴ Eji Pol, a Barnabas wuku ji bo yahke song lim, bo kehm yare awobo ebo, be song yel go ellong ane bao, kehm kehme elrabe re,

¹⁵ “Wahn jia, jen ji wahnge n kp'limi ana? Wahr li ane ana wahn! E ko nnoobo etib ba a bi, eji n l'senng njahm go nsol nyi li mbol mbol, feere goji Esowo bi li go elkpin, bi limi elbung, a ndi, a aya, go nsol kpee nyi li no.

¹⁶ Mahne mahne Esowo yake ane kpee, bo jo jen go mbang nyi koro bo.

¹⁷ Tvtv o, á kpo lennge elne go anobonobo nsol nya á kpo lim, ana elahb ji kpo lohng go elbung, na ka-n, ana nsol enyahne nyi kpo lak go ngare. Á kpo ka-n nsol alehke, fere ka-n eyebatahng.”

¹⁸ Sa ntiil ane bao lim njom ka bo, jol eji bo jo b'bung alum nyao tong bo.

¹⁹ Jus jindiki lohngo go Antiok ji Pisidia, bandiki lohng go Ikonium, ba senng ane bao ntim, feere goji bo. Bo tuubu Pol atal, tohng-e, lohng a ne go esi mbang. Tibre bo jo tiri re, yebkpo.*

²⁰ Eji abat'toono Jisos ba no, ba rur senng-e kak, Pol kehm soro mehl, tahm go nla ejahbe. Etoono efungfu behko Pol, a Barnabas kehm tahme asongo go Derbe.

Ana Pol, bo gohro bung alum Esowo, kehm feere

²¹ Bo kehm buntu alum Esowo go Derbe. Ane gbalee ba taame no o. Bab Pol kehm feere go Listra, sehng song rehng go Ikonium, sehng o kehm song rehng Antiok ji Pisidia.

* 14:19 14:19 2 Kor 11:25; 2 Tim 3:11

²² Bo jo kake abat'toono Jisos ba jolo o eltim, fere jo rehke bo re bo soro asi ano ano go mbang nyi Esowo. Bo jo tibi ane re, "E bahke tiki nyehn erem, kehm yele go ejahbetul Esowo."[†]

²³ Bo jo yehke anebkul ero go ero abehng abehng, fere rod bo kak Jehova bi bo ma taame tv-e go ebo, jo kak ero, fere jo bade elbo njal.[‡]

²⁴ Bo kehm sehng asongo go Pisidia, fere sehng o rehng go Pamfilia.

²⁵ Eji bo ma bung alum Esowo go Perga, bo kehm tahme asongo go Atalia.

²⁶ Owo bo yele go egbang asongo go Antiok, ejahbe jio ji bo rodo bo, kak Esowo go ebo, tib go eltum ni bo ma lim mal.[§]

²⁷ Eji Pol, a Barnabas ma ba rehng go Antiok, bo kehm lungu aneb ero kpee, ba kono edi ajehng, kehm tooro nsol nyi Esowo ma ko bo lim, tong bo ana Esowo ma lennge mbang ka ane baka baka re bo tob taame.

²⁸ Bo kange afung tvv a abat'toono Jisos bao.

15

Nkon nyi bo kono go Jeusalem

(Gal 2:1-10)

¹ Ane bandiki lohngo go Judea ba go Antiok, ba kehme abon Esowo ba li o tib re, "Tohko tiki jol re, n yehke nrur ana ntahm nyi Moses tibi no, n nehm tiki bel eltahre."^{*}

² Pol, a Barnabas, bo jo limi nfaabe a bo bada nsol nyio, edi jooko na jooko. Ano wo wahnge

[†] 14:22 14:22 1 Tes 3:3 [‡] 14:23 14:23 Tait 1:5-9 [§] 14:26 14:26

Elt 13:2-3 ^{*} 15:1 15:1 Gal 5:1-6; 6:12-15

bo tooo no re, Pol, a Barnabas, a aneb Esowo bandiki ba li go Antiok, bo song go Jeusalem, song kpiri abatiingetib, a anebkul ero, bo tooo nfem nyio.

³ Aneb ero kehm tumu bo, bo kehm tahme, song sehng go Fenisa, a Samaria. Edi ajehng ajehng bo jo tooro ana ane baka baka kp'gboko ndon go bo abiafem, feere goji Esowo. Eji abat'toono Jisos bao wuku ano, ntim yebe bo sehng.

⁴ Eji Bab Pol song rehng go Jeusalem, aneb Esowo, a abatiingetib a anebkul ero vvrv bo sehng. Bo kehm tooro nsol nyi Esowo ma ko bo lim, tong bo.

⁵ Aneb Esowo bandiki ba woomo go ellong Farisis kehm mehle yiimi, kehm bungu re, "Tiki li re, bo tiki yehke nrur, fere bum atahm nya Moses."

⁶ Abatiingetib Jisos, a anebkul ero kehm bake ba ji edi ajehng re bo tooo nfem nyia.

⁷ Eji bo ma bung tetete, Pita kehm mehle yiimi, kehm bungu re, "Abonanee, n kp'kahne re, ebkang ji Esowo yehk-m no go egahne ellong re, go egama nnyo wo ane baka baka bahke wuku nnoobo etib, fere taame.[†]

⁸ "Esowo bi kp'kahne ntim ane. Ye wo yiimi ane baka baka ntianse, eji á ka bo Etingi Etohko ana á tob ka-r.

⁹ Elyaange anehng anehng limm, wahr a bo. Yebtahm ka bo go bo abiafem, tib eji bo ma taame.

¹⁰ "Anv, jen ji wahng n kp'gare Esowo? Jia li ana e kp'rodo elsol ni nnen si ane baka baka, elsol ni jol babnso ejahre ki ma sol, awahr awahr fvfo.

[†] 15:7 15:7 Mat 16:19

11 Wahr kp'taame re, nnoobo nyi Ntul a Jisos nyi kpo wahng ka e bel eltahre, ano wo fvfo bo ma tob bel.”‡

12 Ellong ane bao kpee belle na belle, eji bo wuku Barnabas, a Pol kp'tooro bade akpokosi nya Esowo ka bo re bo lim go ellong ane baka baka ba ki li Jus.

13 Bo bungu kan a rahke, Jems kehm bungu re, “Abonanee, wuungen atung?

14 Saimon Pita kp'na bungu anv anv re, Esowo ebgbo mbang tib elkoro ene goji ane baka baka, tibre yebyehke ane go bo ellong re bo jol ane ebe.

15 Alum nya abanyehnamahr Esowo bungu no ebwane a nya Pita, ana nwer Esowo bungu no re,

16 “ ‘Nyaa l'sehng, owo m bahke feere ba tuungu etahk ji Devid ji ma gbo, si.

M bahke tuungu nkultahk nyio si,

17 goji egom ane bako l'seb Jehova,

a ane baka baka kpee, ba li abehn nyanyame.

18 Ano wo Jehova bungu no,

eji á lennge nsol nyia mahne mahne.’ ”

19 Owo Jems kehm kpe soro asi go elbungu re, “Egame, kor-m re wahr k'jo gbiingi ane baka baka ba kp'taame tv Esowo.

20 Ji li no li re, wahr nyon nwer tong bo re, bo k'jo li nsol nyi bo ma ko jom eblom, nyi ki li saang, bo jo jahng as'sa, bo k'jo li nnyam nyi bo kahn-e ekehd, á kpo, bo k'jo li alung.

21 Tibre atahm nya Moses, bo bomo ellungu mahne mahne go ntahk ero enyahre efung

‡ 15:11 15:11 Ef 2:8-9

Esabat abehng abehng. Alum nyao, ejahbe ajehng ajehng limm, ji bo kala bung.”§

Nwer nyi bo nyono tv ane baka baka ba ma taame tv Esowo

²² Abatiingetib Jisos, a anebkul ero, a aneb ero kpee, bo toobo re bo yehke ane go bo ellong tum tv go Antiok. Bo yehke Judas ji bo jo lung-e re Barsabas, fere yehke Sailas, ane abal baa ba jo sahb l'lub aneb ero bao. Bo toono Pol, a Barnabas.

²³ A wo li nwer nyi bo tumu no, nyi bo nyono re, “Wahr abatiingetib Jisos, a anebkul ero, ba li abonanee ejahne, e ma-n kak nnyo, wahn abonanee ba ki li Jus, ba lene go Antiok, a Siria, go Silisia.

²⁴ Wahr ebwuk re, ane ebahre bandiki ebba ba bung alum nya ma-n bil amahr, fere joob-n go egahna ntim. Elle anehng anehng e tubem bo re bo ba bung elkohn alum ana nyao.

²⁵ Wahr ebkono edi ajehng, yehke ane re wahr tum bo tv-n. Bo bahke toono akpondahme enyahre Pol, a Barnabas,

²⁶ bo ji ma taame elkv go esi ji Ntul a Jisos Kraist.

²⁷ E yehke Judas, a Sailas re bo ba tong-n nsol ny'nehm go nnyo a nnyo ana e nyono no.

²⁸ Etingi Etohko, a wahr ebtaame re, e nehm si-n elsol ni nnen, sehngem re akahmekahme nsol nyaa, nya nya fuumu re wahn k'jo lim.

²⁹ Kana jo li nsol nyi bo ma ko jom eblom, nyi ki li saang.* Kana jo li alung. Kana jo li nnyam nyi bo kahn-e ekehd, á kpo. Jo jahngen as'sa. Ñ

§ 15:21 15:21 1 Kor 10:32-33 * 15:29 15:29 1 Kor 8:1-13; Rom 14:19-21

tohko jo lim nsol nyia, ń bahke jolo nob nob. E ma-n kak nnyo."

³⁰ Bo kehm tumu ane ba bo yehke bo, bo song rehng go Antiok, kehm song lung aneb Esowo bao, ba kono edi ajehng, kehm kake bo nwer nyio.

³¹ Eji bo lungu no, eltim yebe bo sehng go erehke ji bo kake bo.

³² Judas, a Sailas, bo ji jolo abanyehnamahr Esowo kehm kehme bo rehke, fere jo kak bo eltim.

³³ Eji bo ma kang abon afung o, ane bao kehm tongo bo re, bo feere song kehng a eyebatahng goji ane ba tumu bo.

³⁴ (Sailas kehm tiri re, ye bahke jolo o).

³⁵ Pol, a Barnabas, bo sa ona Antiok, fere jo tib ane alum Esowo, fere jo bung alum Esowo tong ane. Ane gbalee bako jo t'tob bung fvfo.

Ana Pol abola Barnabas, bo yaame no

³⁶ Eji ma kang abon afung ntiil, Pol kehm tongo Barnabas re, "Ba wahr feere tahm goji aneb Esowo ba li go ajahbe nya e bungu alum Esowo, song nyehn ana bo li no."[†]

³⁷ Barnabas jo sebe re, Jon Mak toono bo.[‡]

³⁸ Pol kehm bungu re, "Nobem re wahr kpe-e ko, tibre á tahm-r sa go Pamfilia. Á jolem a nahre tete e lim eltum mal."[§]

³⁹ Bo kehm kehme nfaabe lim t'tahne bo bo, kehm yaame. Barnabas kehm koko Mak, bo yel egbang tahm go Saiprus.

[†] 15:36 15:36 1 Tes 3:5 [‡] 15:37 15:37 Elt 12:25 [§] 15:38 15:38 Elt 13:13

⁴⁰ Pol yehke Sailas. Aneb Esowo kehm jabbe bo kak Jehova go ebo, bo kehm soro tahm.

⁴¹ Pol je go Siria, fere sehng song rehng go Silisia, jo kak aneb ero eko.

16

Ana Timoti toono Bab Pol

¹ Pol kehm soro asi rehng go Derbe, a Listra. Nt'toona Jisos awohng jolo ona, no bo jo lung-e re Timoti. Nnyehn jolo nne a Jus. Á tob jolo mmon Esowo. Nde jolo nne a Grik.*

² Abon Esowo ba jolo go Listra, a Ikonium jo tehke Timoti sehng.

³ Pol jo sebe re Timoti toon-e. Á kehm-e koko, song yehk-e nrur, tib go esi ji Jus ji jolo adi nyao. Tibre bo kpee jo kahne re, nde Timoti jolo nne a Grik.†

⁴ Eji bo jo sehng ajahbe nyao o, bo jo tongo bo re bo jo bum alum nya abatiingetib Jisos toobo no go Jeusalem, a anebkul ero.‡

⁵ Aneb ero bao ona gbale na, fere yiimi t'tahne go mbang nyi Esowo. Ane jo kpe rur na efung abehng abehng, ba jo taame.

Nkpokosi nyi Pol nyehne go Troas

⁶ Bo jo yanng go Frigia, a Galesa. Etingi Etoko joom taame re bo bung alum Esowo go Esia.

⁷ Eji bo ma kabbe Misa, owo bo kehm gare re bo sehng go Bitinia. Etoko ji Jisos taamem.

* **16:1 16:1** 2 Tim 1:5; Fil 2:20-22 † **16:3 16:3** 1 Kor 9:19-20; Gal 2:3 ‡ **16:4 16:4** Elt 15:29

⁸ Bo sehngge go nkpe ejahbe nyi Misa rehng go Troas.

⁹ Pol kehm nyehne nkpokosi anyehng atv. Á nyehne nne a Masedonia yim no, kp-e gboongo re, “Ba ga Masedonia, wo ba kak-r ebo!”

¹⁰ Pol nyehne kan nkpokosi nyio o, wahr ane kpee, e kehm soro toobo ebjing, tahm go Masedonia. Tibre wahr ebseb kahn re, Esowo bi ma-r lung re wahr song bung alum enye tong bo.

Ana Lidia taame tv Esowo go Filipai

¹¹ E yele egbang go Troas tete song rehng go Samotres. Etoono efung behko e rehng go Neapolis.

¹² Owo e sehngge no song rehng go Filipai ji jolo ngbokambang ejahbe go Masedonia. Ejahbe jio woomo go elwo ni Rom. Owo e kange abon afung.

¹³ Efung Esabat e kehm lohngo ejahbe jio, tahm go nkpe aya. Tibre e tiri re, edi jio ji li edi ero akake. E kehm jehke, kehm kehme elbunu a anebkal bao ba ba no, ba kono edi ajehng.

¹⁴ Nnenkal awohng jolo ona, no bo jo lung-e re Lidia ji jolo nne a Tiatira. Á jo jene are abomo nya nno, fere jo kak Esowo. Á jo wuungu atung go alum nya Pol jo bung, tibre Esowo bi lennge eltim ene. §

¹⁵ Owo Lidia, a aneb etahk ebe kehm bele ewohngalahb.

Á kehm soro tong-r re, “Joare wahn ebbum re, me n lohko taame tv Esowo, baan, wahn ba jol go egame etahk.” Á kehm jo gbiing-r re wahr tiki je.*

§ 16:14 16:14 Jon 6:44 * 16:15 16:15 Fil 1:3-5

Go ngbekobo nyi Filipai

¹⁶ Efung abehng eji e jo tahm go edi ji bo kpo kak ero, e kehm nyehne mmonse no nkal no jolo nju. Á bele ebi etohko ji amahr anyehne. Á jo limi akpohko gbalee ka ane bao ba jo fil-e, eji á jo nyehn ane amahr.†

¹⁷ Á jo toono Pol, a wahr, jo rabe tiim re, “Ane baa, alokeltum Esowo bi li go ero ba! Bo kpo tib-n mbang nyi m bahke sehng kehm bele eltahre!”

¹⁸ Alum nyaa á jo kono elbungu nkpel a nkpele. Pol, eltim kehm-e rake, á kehm keebe, kehm bungu tong ebi etohko jio re, “N kp-a tongo go mbing nyi Jisos Kraist re, wo lohng go ege a ngubjing!”

Á kehm soro lohng ngare ny'nehm o.‡

¹⁹ Eji afono nju nyio sebe no kahn re, mbang anyehng anyehng nyi bo bahke kpe ting akpohko kpeem li, bo kehm soro bob Pol, a Sailas, tahm a bo go are, edi ji atubesi nfam jolo no.

²⁰ Eji bo ma ko bo, je go esamahr atul esub, bo kehm bungu re, “Ane baa a, anebe Jus ba. Bo kp'sebe nfem go egahre ejahbe.

²¹ Bo kpi eljini tib, ni ki nob re wahr anebe Rom, wahr leeme, fere jo lim.”

²² Ane bako ba jolo o, kehm nake ba bulu bo. Abalamalam bao kehm tohngo bo awobo yare. Bo yehke bo awobo nyao, kehm soro ka ane bao nsahm re bo dv bo go nr'rare.§

† 16:16 16:16 Elt 19:24 ‡ 16:18 16:18 Mak 1:24,34 § 16:22 16:22 2 Kor 11:25

²³ Eji bo ma dv bo gbalee, bo kehm kake bo go ngbekobo, tong mb'baabe agbekobo re á baabe bo n'nob.

²⁴ Eji á wuku ano me, á kehm kake bo go nkimi nyi li atahng atahng, fere kak bo afung go akpade.

²⁵ Nlum atv, Pol, a Sailas kehm kehme ero kak, fere jo yim ase, jo tehk Esowo. Aneb agbekobo bako jo wuungu atung, jo wuk.

²⁶ Tvtv ona ndi kehm kehme elgbekhe na gbehke. Nnahb ekahme nyio nyi ngbekobo jo gb'gbekhe. Abutahk ngbekobo kpee kehm soro lennge. Agbekobo kehm soro won bo ane kpee gbo.

²⁷ Mb'baabe agbekobo noo nyahme kan a me, á kehm ba nyehn abutahk ma lennge. Á kehm soro rod ntahme enye, yahke wul elne. Tibre á jo tiri re, anv, aneb agbekobo ebbe kpee fi.*

²⁸ Pol kehm soro bung wahre wahre re, “Ka bom elna! Wahr baa ane kpee.”

²⁹ Mb'baabe agbekobo noo kehm lungu ane re, bo ko agun ba. Á kehm beke yel eksp'kpa ngbekobo jio, kehm kehme elfahle, jo k'kahm, gbo jamme Pol, a Sailas alahng go alata.

³⁰ Á kehm lohngo a bo go elatahk, kehm bahbe bo re, “Anv, jen ji m bahke limi, kehm bele eltahre?”

³¹ Bo kehm-e faange re, “Taame tv Ntul a Jisos, a bahke bele eltahre, a etahk etahk eja.”

³² Bo kehm buntu alum Esowo tong-e, a ane kpee ba jolo go ege etahk.

* 16:27 16:27 Elt 12:18-19

³³ Mb'baabe noo kehm koko bo atv manehm o, tahm a bo, song ru bo alok nyao kpee, kehm soro bel ewohngalahb, a ane ebe kpee.

³⁴ Á kehm koko bo tahm a bo go ege etahk, song ka bo nsol alehke. Á bele eyebatahng, a etahk etahk eje, tib eji á ma taame tv Esowo.

³⁵ Etoono efungfu behko abalamalam kehm tumu mbehresi re bo ba yehke ane bao yake, bo song.

³⁶ Mb'baabe agbekobo noo kehm tooro tong Pol re, “Abalamalam ebtiingi tv re wahn song. Lohngen anv, wahn song go eyebatahng.”

³⁷ Pol kehm bungu tong mbehresi nyio re, “Bo dv-r go elkab ane. Elam jolem, jol ebi ajehng ajehng e liim. Bo kak-r go ngbekobo, wahr ji li na anebe Rom.† Anv, bo kehm fere weelee na, yehk-r mbehr mbehr re wahr song. E'ee, ano sang. Nong, bofono antahng ba, ba yehk-r.”

³⁸ Mbehresi nyio kehm song tooro alum nyao tong abalamalam bao. Eji bo wuku re, bo anebe Rom ba, bo kehm kehme elfahle.

³⁹ Bo kehm bake ba gboongo bo, kehm yehke bo yake re bo tahm ejahbe jio song.

⁴⁰ Bab Pol kehm lohngo go ngbekobo tahm song nyehn Lidia, a aneb ero bako, kak bo eltim, kehm soro tahm.

17

Go Tesalonaika

† 16:37 16:37 Elt 22:25

¹ Bo kehm tahme go Amfipolis, sehng song rehng go Apolonia, soro song rehng go Tesalon-aika, edi ji etahk ero ji Jus jolo no.

² Pol kehm song yel go ekp'kpa ero, ana á jo kono ellimi. Aneb Jus jo limi nfaabe a ne bada nwer Esowo tete biingi Esabat na ebra.*

³ Á jo lennge bo, fere jo tib bo re, “Tiki jol re, Kraist nyehn erem, kpo, fere nyahme go elkv.” Á kehm kpe bung re, “Jisos jia ji n kp'bungu bada ne, Kraist wo.”†

⁴ Egom jindiki l'lennge bo, bo taame, fere jo toono Pol, a Sailas. Ano wo fvfo ellong aneb Grik gbalee ba jo kak Esowo, a atubesi anebkal bandiki gbalee tob taame, jo toono bo.

⁵ Ala kehm kehme aneb Jus teelee. Bo kehm lungu abi ane bandiki tum, bo song lung ane ba kono edi ajehng, kehm kehme edi sohko na sohko. Bo kehm song yel ekp'kpa Jeson, jo seb Bab Pol re, bo ko bo ba ka ane bao.

⁶ Eji bo ki nyehn bo, bo kehm tohngo Jeson, a abon Esowo bako gona, tahm a bo goji atubesi nfam, fere jo rabe re, “Ane bao ba ma rod njini nyia kpiidi akpade go ero, bobkpe ba a.

⁷ Jeson wo ma ko bo ba kak go ege etahk. Bo ba kpi atahm nya ntul a Rom range. Bo kpo bung re, Ntul noko noa, no li Jisos.”‡

⁸ Eji ellong ane bao, a atubesi nfam wuku ano, ntim kehm jokko na jokko bo.

⁹ Bo kehm tongo Jeson, a ane bako re bo ba ka akpohko nkpaneka. Eji bo ma ka akpohko nyao, bo kehm yake bo.

* 17:2 17:2 1 Tes 2:2 † 17:3 17:3 Luk 24:46 ‡ 17:7 17:7 Jon 18:36-37; 19:15

Go Berea

¹⁰ Eji atv behde no, aneb Esowo bao kehm tumu Pol, a Sailas tv go Berea. Eji bo rehng o, bo kehm sehng tahm go etahk ero ji Jus.

¹¹ Aneb Jus bao ba ga nob sehng ane bao ba jolo go Tesalonaika. Bo ko alum Esowo nyao kak go bo a ntim, fere jo kak ekpuku, jo feede go nwer Esowo efung abehng abehng, joare lohko li ano. §

¹² Owo wahng ane gbalee go ebo ellong taame no. Go bo ellong o, aj'jok anebkal Grik tob woomo o semme aneblum.

¹³ Eji Jus ji jolo go Tesalonaika wuku re, Pol ebtob bung alum Esowo go Berea, bo kehm tob je o fvfo, song kehme ane nyare. Nfam kehm kehme eljokko na jokko.

¹⁴ Abon Esowo bao kehm soro tong Pol re á song go mband nyio nyi agburu aya li no. Sailas, a Timoti, bo sa ona Berea.

¹⁵ Ane bao ba jo tv Pol, ko-e tete song rehng a ne go Atens. Bo ko elle goji Pol, ni jolo re, Sailas, a Timoti gulu eljeke song kpir-e. Bo kehm feere kehng go Berea.

Go Atens

¹⁶ Eji Pol ji go Atens, jo sik Sailas, a Timoti, eltim rak-e sehng, tibre ejahbe jio asowo tv sehng.

¹⁷ Á jo bungu a anebe Jus go bo etahk ero, fere jo bung a ane baka baka ba ki jol Jus, ba jo kak Esowo. Efung abehng abehng á jo je go are, jo song bung tong ane ba jo ba si are.

¹⁸ At'tibi bandiki ba jo toono eltibi ni Epikur, a at'tibi bako ba bo jo lung bo re Stoik, kehm tob song kpiri Pol.

Ane bandiki kehm bungu re, "Jen ji á kp'b'bung o? Akpaale abuuru nyaa lohngo renan?"*

Ane bandiki re, "Li are á kp'bungu bade ajen eblom bi ane bamongo."

Tibre Pol jo bungu bada Jisos, a elnyahme ngubjing go elkv.

¹⁹ Bo kehm koko Pol tahm ane go edi ji bo jo lung re Areopagus, kehm-e tongo re, "E kp'sebe re wahr kahn eltibi nia ni nfenfe, ni a kp'bungu bade.

²⁰ Nsol enya nyi a kp'tibi, nyindiki li-r nfenfe go egahre atung. E kp'sebe re wahr kahn ana nsol nyio lohngo lohng."

²¹ Ane kpee ba lene go Atens, a ajenne fvfo jo ranngere ngare ebo re bo jo wuk aka nfenfe nya nya, fere jo tub.

²² Pol jo yiimi go elka ane bao ba jo kono nkon go Areopagus, jo bung re, "Aneb Atens wahn, me n nyehn re, n li ane ba kp'gare area re wahn sehng go mbandang nyi Esowo.

²³ Eji n jo sehng abake, n nyehne eblom bi n kp'kake. N tob nyehne edi njom alimi ji bo nyono re, 'Jia li ka Esowo bi e kil-e elkahne.' Esowo bio bi n kpo kak-e, bi n kil-e elkahne, bi bi n yahk-n tong bada ne anv.

²⁴ "Esowo bi limi njini, a nsol kpee nyi li no. Ye wo li ntul no elbung abola ndi. Á kpehme lene go ntahk ero nyi ane si no.†

* 17:18 17:18 1 Kor 4:12 † 17:24 17:24 Elt 7:48

²⁵ Esowo, ejum ajehng ajehng we kpehme rin ji nne bahk-e kake, tibre ye wo kpo ka ane elkpin, go nsol alehke, a ejum ajehng ajehng.

²⁶ Go et'tohngo nne awohng no á lim-e no, owo ane ba li njini nyia kpee lohng no. Á limi bo re bo jol go njini nyia kpee. Eji á limi bo, á ka bo ngare ana nyi bo bahke kpini, fere bak bo adi ndi nya bo bahke jo lene,

²⁷ eji bo l'seb Esowo. Fundiki bo bahk-e nyehne, eji bo kp-e sebe nkamme nkamme. Jol fee á limm go egahre.

²⁸ Tib go ege esi wo wahnge, e li go elkpin, fere kp'jene tete sik anv. Li ana akahnkahn ane ebahne bandiki bungu no re, 'Wahr lohng go ege et'tohngo.'

²⁹ Eji wahr lohng go et'tohngo ji Esowo, wahr k'jo tir re, Esowo li go elfoongo ni agul, a ni asilva, a ni atal, a ni nsol nyi ane kpo lim abo, nyi lohng go bo a ntir atahng.

³⁰ "Ngare nyio nyi ane ki liingi Esowo, Jehova kpooro na. Anv, yebtong nne awohng awohng go edi ajehng ajehng re á gbo ndon go ege abiafem.‡

³¹ Tibre yebkunu afung nya á bahke njini nyia kpee lam nob nob go nnyo mi nne no á ma yehke. Esowo eblenng'e jia ka nne awohng awohng, eji á nyahme nne noo go elkv."

³² Eji bo wuku bade elnyahme ngubjing go elkv, egom jindiki kehm-e elnyoko. Egom jindiki re, "E bahke kpe wuk ana a bahke kpe bung efung bindiki."

³³ Owo Pol kehm soro lohng ekp'kpa nkon jio.

‡ 17:30 17:30 Luk 24:47

³⁴ Egom ane bandiki t'taame toon-e. Nne awohng no bo jo lung-e re Dionisius ji woomo go ellong ane ba jo kono nkon go Areopagus tob woomo go ellong ane ba taame no, a nnenkal awohng no bo jo lung-e re Damaris, a egom ane bandiki fvfo.

18

Go Korint

¹ Owo Pol kehm tahme Atens, song rehng go Korint.

² Owo á song mahnge nne a Jus awohng no bo jo lung-e re Akwila ji bo jel-e go Pontus. Ngare nyio á kp'na lohngo na lohng go Itali, a nkal ewe Priskilla ba.* Tibre ntul a Klodius kame anebe Jus re bo tahn go Rom song. Pol kehm tahme song nyehn bo.

³ Á song jolo a bo, bo jo limi eltum edi ajehng.† Tibre elkohn eltum n'nehm ni bo jo lim. Eltum ni bo jo lim, bo jo ko atapul, jo jamme kpee, ko jo si ntahk.

⁴ Efung Esabat abehng abehng Pol jo je go etahk ero ji Jus, jo song bung a ane, fere jo sennge Jus ntim, a Grik fvfo.

⁵ Eji Sailas, a Timoti lohngo go Masedonia ba kpiri Pol go Korint, Pol rodo ngare enye kpee kak go alum Esowo abungu, fere jo yiimi ntianse tong Jus re, Jisos wo li Kraist.

⁶ Eji bo jo ten alum enye, fere jo su-e, á kehm kumu ebtohko go ege ewobo, kehm faange bo re, "Joare wahn ebten, ebi jio bahke kuumu wahn,

* 18:2 18:2 Rom 16:3-4 † 18:3 18:3 Elt 20:34

me sang. Bomo anv asongo, me n fi goji ane baka baka ba ki li Jus."

⁷ Á kehm tahme eje song rehng go etahk nne no bo jo lung-e re Taitus Justus ji jo kak Esowo. Etahk eje jolo kohlo etahk ero ji Jus.

⁸ Krispus ji jolo ntubesi etahk ero ji Jus t'taame tv Jehova, a etahk etahk eje kpee.‡ Ane gbalee ba lene go Korint, eji bo wuku etib bi Pol, bo t'taame, fere bel ewohngalahb.

⁹ Atv amehng Jehova kehm bungu a Pol go nkpokosi a mbang re, "Ka fahl! Jo bung, ka belle!§

¹⁰ Tibre n li a na. Nnene limm, no bahke sahbe, lak-a ebo, fere lim-a ejum. Tibre ane ebame baa gbalee go ejahbe jia."

¹¹ Pol kange ona elya kunu nnyahng erakera, jo tib bo alum Esowo.

¹² Ngare nyi Gallio jolo ntubesi go Akaya, nyi nyi aneb Jus na, bulu Pol, bob-e tahm a ne go ekp'kpa esub.

¹³ Bo kehm bungu re, "Nne noa ana kpo senngge ane ntim re bo kak Esowo go mbang nyi kpo range atahm enyahre."

¹⁴ Eji Pol tahme re á bung, Gallio kehm tongo Jus re, "Li re yebseb nfem, fere lim ebi, kehn elgbiingi enahne ni n kp-m gbiingi me jolem kpene.

¹⁵ Eji li nfem nyi alum abungu, a abing, go atahm enyahne, limen antahng. Me n nehme seb re, me n lam alam nyaa."*

‡ 18:8 18:8 1 Kor 1:14 § 18:9 18:9 1 Kor 2:3 * 18:15 18:15 Jon 18:31

16 Á kehm kame bo re bo lohng eksp'kpa esub song.

17 Jus kehm soro bob Sostenes ji jolo ntubesi go bo etahk ero, fere dv-e go esamahr Gallio. Jol Gallio we lubem.

Ana Pol feere go Antiok

18 Pol kpe kang afung gbalee a abon Esowo go Korint, kehm tahme bo sa. Go Kenkrea Pol kehm soro kpud esi o, tibre á nyame ejum tong Esowo.† Pol, bo kehm yele egbang, ye a Akwila, a Priskilla, jo tahm go Siria.

19 Bo kehm sehng song rehng go Efesus. Pol kehm tahme Akwila, a Priskilla sa o, kehm song yel go eksp'kpa ero ji Jus, jo bung a bo.

20 Eji bo jo tong-e re á kpe kang a bo afung tvv, á t'ten.

21 Eji á jo tahm bo sa, á kehm bungu tong bo re, “Esowo l'taame, m bahke feere egahne a.”‡

A kehm kpe yel egbang o Efesus asongo.

22 Eji á song rehng go Sisaria, á kehm sehng song rehng go Jeusalem, song kak aneb ero nnyo, kehm soro tahm go Antiok.

23 Eji á ma kang abon afung o, á kehm tahme, jo yanngedi ajehng ajehng go Galesa, a Frigia, jo kak abat'toono Jisos eltim.

Ngare nyi Apollos jolo go Efesus, a Korint

24 Nne a Jus awohng no bo jo lung-e re Apollos ji bo jel-e go Aleksandria kehm bake go Efesus. Á jolo nne no sahb k'kahn nwer Esowo, fere jo mal elbungu.

† 18:18 18:18 Elt 21:24 ‡ 18:21 18:21 Jems 4:15

²⁵ Bo tib-e mbang nyi Jehova nob nob. Á jo bungu nsol nyi li bade Esowo eltim eltim ene, fere jo tib jang jang ana lohko jol, tvtv o á kahne ewohngalahb ji Jon ji ji.

²⁶ Á jo bungu esahb esahb go etahk ero ji Jus. Eji Akwila, a Priskilla, bo wuk-e no eji á jo bung, bo kehm-e koko tahm a ne, kpe song tib-e mbang nyi Esowo budu.

²⁷ Eji á sebe re á yel egbang tahm go Akaya, abon Esowo bao t'taame re á song. Bo kehm fere nyon nwer tv abat'toono Jisos bako go re, á l'rehng go, bo ko-e. Eji Apollos rehng go, á jo kake abon Esowo ebo area, ba ma taame tib go nnoobo nyi Esowo.Š

²⁸ Á jo bungu area, fere jo ga anebe Jus go elkab ane, eji á jo lennge nwer Esowo ka bo re, Jisos wo li Kraist.

19

Ana Pol je go Efesus

¹ Eji Apollos jolo go Korint, Pol kehm sehng go alab ejahbe nya Esia, kehm song rehng go Efesus. Owo á ba nyehn abat'toono Jisos bandiki.

² Á kehm bahbe bo re, “Eji n tiki taame tv Esowo, wahn ebtiki bel Etingi Etohka?”

Bo kehm-e faange re, “E'ee, jol e ka wuk a wuk na re Etingi Etohko jia.”

³ Á kehm bahbe bo re, “Elkohn ewohngalahb aji m bele no?”

Bo kehm-e faange re, “Ewohngalahb ji Jon ji.”

⁴ Pol kehm bungu re, “Jon jo wohngo ane alahb ma egbokondon, fere jo tong bo re bo taame tv nne no kp'bake toon-e, no li Jisos.”*

⁵ Eji bo wuku ano, bo kehm tuungu bel ewohn-galahb go mbing nyi Ntul a Jisos.

⁶ Pol kunu kan bo ebo, bo kehm soro bel Etingi Etohko, jo bung go ajahbe nfenfe, fere jo nyehn amahr.

⁷ Bo kpee jolo ejum ewubu aneblum abal.

⁸ Pol jo je go etahk ero ji Jus, jo song bung alum Esowo tong ane esahb esahb go nnyahng era. Á jo bungu bade etul bi Esowo, fere jo gare ana á bahke sennge bo ntim.

⁹ Ane bandiki jolo atahnsi ane, bo joom taame. Bo jo su na mbang nyi Esowo go esamahr ane kpee. Owo Pol kehm koko abat'toono Jisos tahm a bo, tahm atahnsi ane bao sa, fere jo tib ane efung abehng abehng go eksp'kpa ji Tirannus.

¹⁰ Á limi anaana nnya ebal tete Jus, a Grik kpee ji lene go Esia wuk alum nya Ntul a Jisos.

Abon ba Skiva

¹¹ Esowo jo ko Pol, jo lim ajoobo akpokosi gbalee, nya kala l'lim.

¹² Ane jo ko afiafong nya Pol bele no, a abomo enye, jo tahm a nya goji aneb ayam, bo jo nob ayam ebo, abi atohko fere jo lohng bo.

¹³ Jus jindiki ji jo yanng, jo kam ane abi atohko yehke, bo jo gare re bo lim nsol nyio go mbing nyi Ntul a Jisos. Bo jo bungu tong abi atohko nyao re, “N kp-n tongo go mbing nyi Jisos re wahn lohng, Jisos jio ji Pol kpo bung bada ne.”

* **19:4 19:4** Mat 3:11

¹⁴ Nne awohng jolo go no bo jo lung-e re Skiva ji jolo ntubesi abalimajom. Á bele abon ba nlum na asehma, ba jo lim nsol nyio.

¹⁵ Ebi etohko jio kehm faange bo re. “Jisos, n kp-e kahne. Pol, n kp-e kahne. Anv, wahn ane aba?”

¹⁶ Nne no bele ebi etohko jio kehm kehme elyebbe, jo nyede bo tv ndi, fere dv bo. Bo kehm soro be etahk jio, tahm ebo ebun ebun, a alok alok.

¹⁷ Jus kpee ji jolo go Efesus, a Grik kpee wuku kan nsol nyio, bo kehm kehme elfahle, bo ane kpee, fere jo tehk mbing nyi Jisos.

¹⁸ Aneb Esowo gbalee ba ma taame, kehm bake ba kehme elfvrv, jo tooro nsol nyi bo ma lim.

¹⁹ Egom ane bandiki gbalee ba jo lim ntaane, kehm rodo awer ebo kpee, ba luk edi ajehng, jamme fi go esamahr ane kpee. Bo kehm gabe ekun ana bi bo ka go awer nyao, jolo ekpa akpohko atahl awubu.

²⁰ Owo alum Esowo kehm kpe gbal, fere ny'nyab, fere tahne.

Ana ane kame no go Efesus

(2 Kor 1:8-9)

²¹ Eji nsol nyio ma sehng kpee, Pol kehm tiri re, á bahke sehng go Masedonia rehng go Akaya, sehng song rehng go Jeusalem. Á kehm bungu re, “N l'je o, m bahke tob rehng go Rom.”

²² Á kehm tumu alokeltum ebe na abal, Timoti abola Erastus tv go Masedonia, yefono sa, kang abon afung ntiil ga Esia.

²³ Ngare nyio nyi egburu ntong nyi nnen a nnen gbo go Efesus tib mbang nyi Esowo.

²⁴ Nne awohng jolo go, no bo jo lung-e re Demetrius. Á jolo nne etahl no jo ko asilva, jo tahl abontahk elom ba Artemis, jo gungu. Alokeltum ebe ba jolo a ne, jo limi akpohko sehng.

²⁵ Á kehm lungu bo kpee, fere lung ane bako ba eltum ebo tob jol ana ni bo, kehm tongo bo re, “N kp'kahne re, eltum nia ni kpi-r afang ka.

²⁶ Anv, nde, n kp'nyehne, fere jo wuk ana ji Pol kp'limi. Á kpo bung re, asowo nya ane kp'rahme, fuumem re nne kak. Jol go Efesus wo wo sang, á ma senng e ane gbalee ntim, ka riki Esia kpee ji á ma senng e bo ntim.

²⁷ N kp'fahle re, eltum enahre nia bahke bele ebi mbing. Etahk elom ejahre ji Artemis bahke tob jol mbol mbol. Jol egburu mbing enye nehm kpe lohng, elom jia ji nne awohng awohng go Esia kpo jom, a njini kpee.”

²⁸ Eji ellong ane bao wuku ano, eltim kehm rake bo s'sehng. Bo kehm kehme elrabe re, “Elom ejahre, Artemis ji aneb Efesus, ji ji li nj'jok elom!”

²⁹ Ejahbe jio kpee kehm kehme eljokko na jokko. Bo kehm bobo Gayus abola Aristarkus, bo ji lohng go Masedonia, jo jen a Pol, tahm a bo go ekolo. Ane kehm kame song rur.

³⁰ Pol jo sebe re á woomo go ellong ane bao. Abat'toono Jisos taamem.

³¹ Ane bandiki ba jolo atubesi ejahbe, ba jolo atem Pol, kehm tiingi etib tv-e re á k'lohng je go ekolo.

³² Egom ane bandiki jo rabe eje eje, egom jehko jo rabe eje eje. Nkon nyio jolo jokko jokko jokko. Ane tvv joom kahn es'si ji wahnge wahng bo je no, song kono edi ajehng.

³³ Eji egom ane bandiki ba woomo go ellong nio nyehne Jus kp'tehme Aleksanda re á lohng song bung ka bo, bo kehm-e tohngo yehke re á lohng. Aleksanda kehm faake ebo ebe, tibre á jo sebe re á bung a ane bao, tahre Pol yake.

³⁴ Bo kahne kan a re á jolo nne a Jus, bo kp'ee kehme elrabe nnyo nnyo amehng re, "Elom ejahre Artemis ji aneb Efesus, ji ji li nj'jok elom!" Bo rabe ano ano rehng awa na abal.

³⁵ Es'kohro, nne no kpo nyon nsol nfam kehm male sahde bo ewok, kehm buntu tong bo re, "Aneb Efesus wahn, nne awohng awohng kp'kahne re, Efesus ji li ejahbe ji kpo kuuru etahk elom jia ji nj'jok Artemis, a mbarebare eltal ni lohngo go elbung gbo.

³⁶ Nnene limm, no bahke ma faabe nsol nyia a. Jolen soom, kana lim ejum ajehng ajehng sohk sohk.

³⁷ Jol ane baa ka v elom ejahre. Jol elom ejahre, bo ka su a su. Wahn ebko na ko ane baa, ba a bo.

³⁸ "Demetrius, a alokeltum ebe, joare nne eb-soodo bo, afung elam nyaa, nya bo kpo lam alam. Atubesi ane baa. Go esamahr elam wo, fuumu re bo bung nfem nyia.

³⁹ Joare ejum jindiki ji n kp'sebe na, bo bahke lame elam jio go nkon nyi nfam kpo kono ngare anyehng anyehng.

⁴⁰ N kp'fahle re, bo bahk-r ebi ka go nfem nyi e ma lim lela. Ejumjum limm, ji e bahke ma laange

kunu, tib go nfem nyi e ma lim a.”

⁴¹ Eji á bungu ano mal, á kehm yaame ane bao.

20

Ana Pol tahme go Masedonia, a Gris

¹ Eji nfem nyio o ma mal, Pol kehm lungu abon Esowo, bo ba kono edi ajehng. Á kake kan bo eltim mal, á kehm tahme bo sa, tahm go Masedonia.

² Eji á jo yanng e ajahbe nyao, jo kak aneb Esowo eltim, fere jo bung alum gbalee, á kehm tahme go Gris.

³ Owo á kange nnyahng era. Á jo toobo ebjing bi á bahke tahme go Siria. Eji á sebe no kahn re, Jus kp'lame kak-e, owo á kehm toobo re, elfeere, á bahke sehng e mbang a Masedonia.

⁴ Owo Sopater mmon a Pirus ji lohng go Berea kehm tahme toon-e,* a Aristarkus, go Sekundus, bo ji lohng go Tesalonaika,† a Gayus ji lohng go Derbe, go Timoti, a Tikikus, a Trofimus, bo ji lohng go Esia.‡

⁵ Ane bao kpee kehm gboko mbang song ji go Troas, jo sik-r.

⁶ E yele egbang go Filipai, eji elkak ni abred nya ki kpi ayist ma sehng. Kange nfung elon, e kehm song rehng go Troas, song kpiri bo. Owo e kange nfung esehma.

Ana Pol nyahme Yutikus go elkv

* **20:4 20:4** Elt 17:10-15 † **20:4 20:4** Elt 17:1-8 ‡ **20:4 20:4** Elt 16:1-2

⁷ Ngbokambang efung go erahde e kehm song kono asi edi ajehng re wahr bakke ebred. § Pol kehm kehme elbungu a ane bao. Á bungu na bung bung bung tete nlum atv kul, tibre njahmfungfu wo, á toobo re á bahke tahme.

⁸ Bo nyaale at'rekahng gbalee bum go ero enyong, edi ji e kono no.

⁹ Njangkun anyehng nyi bo jo lung-e re Yutikus ji go eyake ewindu. Eji Pol kpi mbungu mbungu, á kehm lale kp'kpoodo kp'kpoodo. Eji á ma sahb l'lal, á kehm fooro go ero enyong song gbo ndi. Bo song rod-e ekpakv.

¹⁰ Pol kehm soro badde go ero enyong, song rehng go ndi, kehm song gbo konng-e, fere wall-e, kehm bungu re, "Kana kpe fahl, á kpeke li go elkpin."

¹¹ Pol kehm kpe feere song wahr go ero enyong, kehm bakke ebred, bo li. Á bungu a bo tetete efungfu se, á kehm soro tahm eje.

¹² Nkpokosi nyia nyi kake bo eltim, eji bo rodo njangkun nyio kehng a ne, á kpeke li go elkpin.*

Ana Pol tahme go Troas song rehng go Miletus

¹³ E yele go egbang song rehng go Assos, tibre owo e sebe re wahr song kak Pol go egbang, tib eji á tong-r re wahr lim ano, ye kp'sehng egbuk egbuk song rehng go.

¹⁴ Eji á kpir-r go Assos, e kehm-e kake go egbang, song rehng go Mitilin,

¹⁵ kehm soro asi asongo. Etoono efung behko e sehng kohlo Kayos. Njahmfungfu nyehko e

§ 20:7 20:7 1 Kor 11:23-26 * 20:12 20:12 Elt 9:40

kehm song rehng go Semos. Etoono efung behko e soro rehng go Miletus.

¹⁶ Pol tiri re á sehng Efesus sa, eji á l'k'kpe ranng ngare go Esia. Tibre á jo foomo re á gulu elrehnge go Jeusalem, á l'mal, efung Pentikost kehm rehng.[†]

Ana Pol bungu no tong anebkul ero ba Efesus

¹⁷ Go Miletus wo, Pol tiingi etib tv anebkul ero go Efesus re bo ba kpir-e o.

¹⁸ Eji bo ba no, á kehm bungu tong bo re, “Wahnfono antahng kp'kahne elkpín ni n jo lim ngare anyehng anyehng eji n jolo a nahne bomogona ngbokambang efung bi n gbo mbang rehng go Esia,

¹⁹ ana n jolo rede rede, jo loko Jehova a abonngo abonngo go amahr, fere jo bel elgaare go nsol nyi Jus jo lam kak-m.

²⁰ N kp'kahne re, ejum ajehng ajehng limm, ji m behre no, ji li ji nno ka-n, eji n jo tib-n elkab ane, fere jo tib-n etahk ajehng ajehng.

²¹ N jo lennge tong Jus, fere tong Grik re bo gbo ndon go bo abiafem, feere goji Esowo, fere jo taame tv Ntul a Jisos Kraist.

²² “Anv a, n kp'tahme go Jeusalem, tibre Etingi Etokho ji ma-m mehl.[‡] N nehme kahn ji bahk-m limi go Jeusalem.

²³ Ajehng ji n kp'kahne li re, go ejahbe ajehng ajehng ji n sehng no Etingi Etokho ji jo tong-m re, ngbekobo nyia go es'song kp-m siki, a erem.

[†] 20:16 20:16 Elt 18:21 [‡] 20:22 20:22 Mat 16:21

24 Elkpin ename, ejum elkoko sang, lohngem ejumjum ka-m. Ji li no li re, me n gohro lim eltum ni Ntul a Jisos ka-m no mal, gohro be abahl enyame, fere tong ane alum nya nnoobo nyi Esowo.

25 Wahn ane kpee, n jo yanng e go nlaaga anyehng anyehng enyahne, jo bung alum Esowo tong-n bade etul bi Esowo. Anv a, n kp'kahne re, me n nehm kpe nyehn enyehnenyehne.

26 N kp'bungu go esamahr Esowo lela re, Nne awohng awohng ewahne no l'tan tib go ege abiafem, ebi ejame sang.

27 Ellum Esowo anehng anehng limm, ni m behr-n no. M ma-n tong kpee.

28 Baaben elnahne, a ejoro bi Esowo kpee, bi Etingi Etohko ma-n ka re wahn baabe. Leen abon Esowo ba Jisos ma gunu bo, ka alung eme. §

29 N kp'kahne re, ngare nyi m ma tahm, abibbib enyam ana agabe bahke ba yel egahne ellong. Njoro anyehng anyehng limm, nyi bo bahk-e sehng e sa, k'gare re bo wul-e.*

30 Ane bandiki ba bahke lohngo go egahne ellong. Bo bahke jolo akimfahng e at'tibi, fere jo gare re bo senng e abon Esowo ntim, bo fere jo toono bo.

31 Jo kunen ekpu! Buumen ana n jolo a nahne nnya era, jo rehke nne awohng awohng ewahne a abonngo go amahr atv a njul.

32 "Anv, m ma-n rod, kak Esowo go ebo, a alum enye nya kpo tib nnoobo enye, nya bahk-n ma

§ 20:28 20:28 1 Tim 4:16; 1 Pit 5:2 * 20:29 20:29 Mat 7:15

lim, á gbal, fere ka-n elfuulu ni Esowo ma kuuru bum ane ebe ba á ma ru ntim ebo.

³³ N ka baare nne awohng awohng amahr re á ka-m akpohko, jol á ka-m abomo.[†]

³⁴ Wahnfono antahng kp'kahne re, abo enyame nyaa nya n kpo ko, jo lim eltum, kehm jo ting nsol alehke li, a ane ebame.

³⁵ Go nsol nyia kpee nyi n jo lim, m ma-n tib ana nne bahke jo bade, jo lim eltum, jo kak ane ba kil tahne ebo. Buumen alum nya Jisos bungu no re, 'Elfuulu ga li ka nne no kp'kake, sehng nne no kp'koko.' "

³⁶ Eji Pol ma bung alum nyaa kpee mal, á kehm jamme alahng a bo, kehm kehme ero kak.

³⁷ Bo kpee kehm kehme ellingi, eji bo bingi Pol.

³⁸ Bo bele erakatahng sehng go ekahmekahme ellum nio ni á bungu re, bo we nehm kpe nyehn enyehnenyehne. Bo kehm song tv-e, á yel go egbang.

21

Ana Pol je go Jeusalem

¹ E kehm tongo bo re, "Wahn jol o," egbang kehm soro wob a nahre o, tete song rehng go Kos. Etoono efung behko e rehng go Rodes. E kehm kpe sehng o, song rehng go Patara.

² Owo e nyehne egbang bi jo tahm go Fenisa. E kehm soro yel tahm.

³ Eji e nyehne Saiprus go ejang ebobkal, e kehm maake song rehng go Siria. Go Taya wo, e yiimi no, tibre owo bo raade nsol are go egbang.

[†] 20:33 20:33 1 Kor 9:12

⁴ E nyehne abat'toono Jisos ona, kehm kange a bo nfung esehma. Go nsahm nyi Etingi Etohko nyi bo tongo Pol re á k'je go Jeusalem.

⁵ Eji afung enyahre biingi no, e kehm soro tahm, soro asi go egahre eljen asongo. Bo kehm bake ba tv-r go esi mbang, a akal ebo, a abon abon ebo. Eji e rehng go nkpe agburu aya, e kehm jamme alahng, kehme ero.

⁶ E kehm soro kak atemtem nnyo, kehm song yel egbang. Bo soro yaame ebo kehng.

⁷ E kehm kpe soro asi go Taya asongo, kehm song rehng go Ptolemais. Owo e song kak aneb Esowo nnyo, jol a bo efung kohro kohro.

⁸ Njahmfungfu e kehm tahme song rehng go Sisaria. Owo e song rehng etahk Filip ji jolo mbungalum Esowo, kehm jolo a ne. Á jolo nne no woomo go ellong ane asehma ba bo yehke bo go Jeusalem.*

⁹ Á bele abon ba nkal na ani, ba kala bal alum. Bo jo nyehne amahr nya Esowo.

¹⁰ Eji e ma kang abon afung ntiil ona, nnyehnamahr no bo jo lung-e re Agabus kehm lohngo go Judea ba.†

¹¹ Eji á ba no, ba rehng egahre, á kehm rodo egbaange ji Pol, gbade elne abo, a akpade, kehm bungu re, "Ejum ji ana, ji Etingi Etohko ma bung re, 'Ana wo Jus ji li go Jeusalem bahke gbake nfono egbaange noa, rod-e kak ane baka baka go ebo.' "

¹² Eji e wuku ano, wahr, a ane bako ba jolo o, kehm kehme Pol gboongo re á k'je go Jeusalem.

* 21:8 21:8 Elt 6:1-6; 8:26-40 † 21:10 21:10 Elt 11:28

¹³ Pol kehm faange re, “Jen ji wahnge á kp'lingi ana, jo lim eltim jo maang-m! Me n toobo ebjing kpee, jol afi ngbekobo nyi, jol afi elkv ni m bahke kpoko go Jeusalem tib go esi ji Jisos.”

¹⁴ E kpe-e tahre re á k'je, á ten. Owo e kehm soro yak-e abo, kehm bungu re, “Nong, mbang Esowo lim, ana kor-e no.”[‡]

¹⁵ Owo e kehm toobo ebjing, tahm go Jeusalem.

¹⁶ Abat'toono Jisos bandiki ba jolo go Sisaria t'tahm toon-r, fere ko-r, song rehng go etahk Mneson ji jolo nne a Saiprus, ye ji bomo eltoonon Jisos wuku wuku. Go ege wo, e song jol.

Ana Pol song nyehn Jems

¹⁷ Eji e song rehng go Jeusalem, aneb Esowo bao gbaam-r sehng go eyebatahng.

¹⁸ Etoonon efung behko Pol kehm tahme a nahre re wahr song nyehn Jems. § Anebkul ero kpee jolo ona.

¹⁹ Pol kehm kake bo nnyo, kehm fere tooro ajehng ajehng ana ji Esowo ka-e re á lim ka ane baka baka ba ki li Jus.

²⁰ Eji bo wuku ano, bo kehm kehme Esowo tehk, kehm bungu tong Pol re, “Egban, a kp'nyehne re, anebe Jus atahl nku a nku ba ma taame. Bo kpeke li ane ba kp'sahb b'bum atahm.

²¹ Bobtooro gana re, a kp'tibi Jus kpee ji lene go ajahbe nyandiki re, bo yake atahm nya Moses, k'kpe yehke abon ebo nrur, k'kpe lim eljini ni Jus.

²² Jen ji e bahke limi anv a? Bo bahke tiki seb kahn re, wobrehng a.

[‡] **21:14 21:14** Mak 8:31-33 § **21:18 21:18** Gal 1:19; Mat 13:55

23 “Anv, lim ana ji e bahk-a tongo. E kpi ane ani a, ba ma nyam enyam tong Esowo.

24 Song toono ane bao, wahn song bum elnahne saang, wo fere kpi akpohko go bo esi, eji bo l'mal kpud ebsi ebo. Owo nne awohng awohng bahke kehm kahne re, nyao kpee nya bo bungu bada na etingitingi sang, fere kahn re, a kp'lohko bum atahm nya Moses.

25 Bade ane baka baka ba ma taame tv Esowo, wahr ebtum nwer tv bo, ana e ma toobo re, bo k'jo li nsol nyi bo ma ko jom eblom, nyi ki li saang, bo k'jo li alung, bo k'jo li nnyam nyi bo kahn-e ekehd, á kpo, bo jo jahng as'sa.”*

26 Pol kehm soro ko ane bao. Etoono efung behko, bo kehm bumu elbo saang, kehm tahme go etahk Esowo, eji bo l'tong bo afung ana nya bahke kange, elbumu elbo saang nio kehm male. Ngare nyio wo, bo bahke limi njom tib esi ji Pol, a ji ane bako.

Ana bo bobo Pol go etahk Esowo

27 Eji nfung esehma nyio yahke biingi, anebe Jus bandiki ba lohng go Esia ba, kehm ba nyehn Pol go etahk Esowo. Bo kehm soro nyare ellong ane re, bo song bob Pol. Bo kehm-e soro bob.

28 Bo kehm kehme elrabe re, “Israel wahn, kaken ebo! Á wo li nne no kp'yanngedi ajehng ajehng, jo tib nne awohng awohng, fere jo bung tob anebe Israel, a atahm nya Moses, a etahk Esowo jia. Yebgohro ko aneb Grik ba kak go etahk Esowo jia, fili edi jia kp'ranngedi.”

* 21:25 21:25 Elt 15:29

²⁹ Tibre bo tohko nyehn Trofimus ji lohng go Efesus go nla ejahbe a Pol. Owo wahnge bo kehm tiri re, Pol m-e ko ba kak go etahk Esowo.

³⁰ Edi kehm kehme eljokko na jokko, ane kehm fere kam song rur edi ajehng, kehm bobo Pol, tohng-e yehke go etahk Esowo. Tvtv ona bo kehm soro bam abutahk nya etahk Esowo.

³¹ Eji bo jo gare ana bo bahke wulu Pol, nne kehm tahme song tooro tong ntubesi a nsoja nyi Rom re, “Ga Jeusalem edi kp'jokko area.”

³² Ntubesi a nsoja noo kehm soro ko atubesi nsoja, a nsoja nyindiki gbalee, tahm a bo. Eji Jus nyehne ntubesi, a nsoja enye kp'foomo abake, bo kehm rahke Pol go eldohko.

³³ Ntubesi a nsoja kehm bake, a nsoja enya, ba tong bo re, bo bob Pol, kak-e agbekobo abal. Á kehm bahbe re, “Anv, ye nne awoo! Jen ji á ma lim?”

³⁴ Egom jindiki jo rabe eje eje, egom jehko jo rabe ebo ebo. Eji ntubesi noo ki kahn ejum ji ma gb'gbo tib go eljokko ni bo jo jokko edi, á kehm tongo re, bo ko Pol song a ne go bo ebud.

³⁵ Eji bo ba rehng mbuga, nsoja nyio kehm mehle Pol, sol, tibre ellong ane bao jo gbiingi bo sehng.

³⁶ Bo jo jene a bo bad bad, jo rabe re, “Wulen na ye!”†

Ana Pol bungu no re á yehke elne

³⁷ Eji nsoja yahke rehng a Pol go bo ebud, Pol kehm tongo ntubesi noo re, “N kp'sebe re me m bung a na.”

† 21:36 21:36 Luk 23:18

Ntubesi kehm bahbe re, “Anv, a kpo m'ma bung Grika?

³⁸ Wo nne a Ijib sanga, no bomo ebta anoko a nahre nyanjehla, no jake akpuuru ane atahltahl nkpel ewubu, ba fili nsol ebta, song biiri go elka emahnga?”

³⁹ Pol kehm faange re, “Ee, me nne a Jus wo. N li nne a Tarsus ji li go Silisia. N li nfono ejahbe no lohng go egburu ejahbe, titi, nong me n tohko bung a ane bao.”

⁴⁰ Ntubesi noo kehm taame. Pol kehm yiimi go mbuga, kehm faake ebo ebe. Bo kehm naange kp'tii, are alahb ma. Pol kehm bungu go alum Hibru re,

22

¹ “Babnsoo, abonanee, ane ebame wahn, wuungen atung, eji n yahke lennge elname ka-n.”

² Eji bo wuk-e no, á kp'bungu go alum Hibru, bo kehm sahb n'naange kp'tii.

Pol kehm bungu re,

³ “Me nne a Jus wo. Bo jel-m go Tarsus ji Silisia. Bo ko-m ntiil ntiil, ba a name go Jeusalem. Gamaliel wo jolo nt'tibi ewame.* Bo tib-m tib atahm nya babnso ejahre nseenga nseenga. N rodo elname kpee nob nob ka Esowo jang jang ana wahn ji li a lela.

⁴ N jo nohko ane ba jo toono mbang nyi Jisos. N jo bobo aneblum, a anebkal anebkal, jo kak bo afarebok, tum bo ngbekobo, egom jindiki n jo wul na bo.†

* 22:3 22:3 Elt 5:34 † 22:4 22:4 Elt 8:3

⁵ Ntubesi abalimajom, a anebkul nfam, bo kpee kp'kahne re, n kp'bungu etingitingi. Bo jo ka-m awer re me n song ka aneb Jus ebahre ba li go Damaskus. N kehm jeke re me n song bob ane ba Jisos ba jolo o, kak bo afarebok, feere a bo go Jeusalem, eji bo l'kak bo erem.

*Ana Pol tooro ana á kpiri Jisos
(Elt 9:1-19; 26:12-18)*

⁶ “Eji e ma tahm asongo, yahke ba elrehnge go Damaskus, ngare nyio jolo ngare efin, n kehm nyehne egburu ellenge ni lohngo go elbung, ya tub-m.

⁷ “N kehm fooro gbo ndi, kehm wuku ellum ni bungu re, ‘Sol, Sol, jen ji wahng ka a kp-m nohko anae?’

⁸ “N kehm faange re, ‘Wo nne awo, Ntul?’

“Á kehm bungu tong-m re, ‘Me Jisos ji Nasaret wo, ji a kp'nohko.’

⁹ “Ane ba jene aname nyehne ellenge ellenge. Bo wukem ellum ni nne noo jo bung a name.

¹⁰ N kehm-e soro bahb re, ‘Jen ji m bahke limi, Ntul?’

“Ntul a Jisos kehm-m tongo re, ‘Tahm, wo song go Damaskus. Owo bo bahk-a tongo ejum ajehng ajehng ji Esowo ma toobo bum-a re wo lim.’

¹¹ “Eji amahr wa-m no tib go egburu ellenge ni n nyehne no, ane ba jene aname kehm-m jabbe go ebo, rehng a name go Damaskus.

¹² “Nne awohng jolo o, no bo jo lung-e re Ananayas. Á jo fahle Esowo, fere jo bum atahm enyahre. Jus kpee ji lene go Damaskus jo kak-e sehng.

¹³ Á kehm bake go egame, ba yiimi kohl-m, kehm bungu re, 'Egban Sol, kpe nyehn!'

"Tvtv ona amahr enyame kehm soro lennge n kehm-e nyehne.

¹⁴ "Ananayas kehm bungu re, 'Esowo bi babnso ejahre ma-a yehke re wo kahn mbang enye, fere nyehn Etingitingi Nne ewe, fere wuk alum enye go ege a nnyo antahng.

¹⁵ Tibre wo bahke jolo ntianse enye, fere tong nne awohng awohng nsol nyi a ma nyehn, fere w'wuk.

¹⁶ Anv, jen ji wahnge a kp'kpeke laange? Tahm, wo bel ewohngalahb, fere gboong-e go ege a mbing, eji á l'ru eltim abiafem ena.'

Ana Esowo lungu Pol re á bung alum enye tong ane baka baka

¹⁷ "Eji n feere go Jeusalem, n song kehme ero kak go etahk Esowo, n kehm nyehne nkpokosi.

¹⁸ Nkpokosi nyi n nyehne no, n nyehne Ntul a Jisos kp'bungu a name re, 'Foomo elwaare, wo tahm a Jeusalem. Tibre ane ba li a, nehm taame tv ntianse ny'nya, nyi a bahke yiimi ka-m.'

¹⁹ "N kehm faange re, 'Ntul, bofono antahng kp'kahne re, n jo je go etahk ero ajehng ajehng, jo song bob ane ba kp'taame tv-a, jo dv bo, fere kak bo ngbekobo.

²⁰ Eji bo wulu Stiven, nne a ntianse ewa, mefono antahng tob jolo o. N t'taame, eji bo wul-e no, fere jo baabe abomo nya ane ba wul-e no.'‡

‡ 22:20 22:20 Elt 7:58; 8:1

21 “Ntul a Jisos kehm bungu tong-m re, ‘Song, m bahk-a tumu fee goji ane baka baka ba ki li Jus.’”
§

22 Bo wuung-e atung tete rehng alum nyao. Bo kehm kehme elrabe wahre wahre re, “Tahmen a ne, wahn song wul-e! Kpeem fuumu re, elkohn nne ana noa kpe jol go elkpín!”

23 Bo jo rabe wahre wahre wahre, jo fokko abomo, fere jo kpu at'to, jo saade tv go ero.

24 Ntubesi nsoja kehm tongo nsoja enye re bo ko Pol song a ne go ebud, song dv-e, eji bo l'seb kahn ji wahnge Jus kp'r'rabe ano tob-e.

25 Eji bo m-e gba alehke re bo dv-e, Pol kehm bungu tong mmontubesi a nsoja noko no yiimi kohl-e re, “Anv, f'fuumu re, wahn dv nne a Rom, eji bo kala kahn ejum ji á limi noa!”*

26 Mmontubesi noo wuku kan ano me, á kehm tahme goji ntubesi no nnen, kehm song tong-e re, “Jen ji a yahke lim? Nne noa ana, nne a Rom wo.”

27 Ntubesi noo kehm bake goji Pol, kehm ba bahb-e re, “Tong-m anv, a lohko li nne a Roma?” Pol kehm taame.

28 Ntubesi noo kehm faange re, “Re me n kehm jolo nne a Rom, n ka akpohko gbalee.”

Pol kehm bungu re, “Bo jel-m ana nne a Rom.”

29 Tvtv ona ane bao ba ba re bo ba bahb Pol abahbe, kehm soro jeere, fere njahm. Ntubesi noo kehm kehme elfahle, eji á sebe kahn re, Pol jolo nne a Rom, tibre á m-e gba alehke.

Ana Pol yiimi go esamahr elam

§ 22:21 22:21 Elt 9:15; 13:2 * 22:25 22:25 Elt 16:37; 23:27

³⁰ Ntubesi noo jo sebe re, á kahn etingitingi, ana ji wahnge Jus ka Pol ebi. Etoono efung behko á kehm tongo atubesi abalimajom, a anebkul nfam kpee re bo ba kono edi ajehng. Á kehm yehke Pol agbekobo, ko-e ba yiimi go esamahr ane bao kpee.

23

¹ Pol kehm seenge ellong ane bao too, fere kehme elbunu re, “Abonanee, atahng ala enyame kp'bare saang go esamahr Esowo, bomu wuku wuku tete sik anv.”

² Ntubesi abalimajom no bo jo lung-e re Ananayas kehm tongo ane bao ba yiimi kohlo Pol re bo rum-e go nnyo.

³ Pol kehm bungu tong-e re, “Esowo bahke tob rum-a, wo jia ji li ana ekahme ji bo taame efem. A jehk ana re wo lam-m ana ntahm bungu no, wobfere gbo ntahm, eji a tongo re, bo rum-m.”*

⁴ Ane ba yiimi kohlo Pol kehm bungu re, “A kp'suku ntubesi abalimajom no Esowo!”

⁵ Pol kehm faange re, “Abonanee, n kahnem re, ye wo li ntubesi abalimajom. Tibre nwer Esowo bungu re, nne k'jo bung ebi tob ntubesi ejahbe ewe.”

⁶ Eji Pol sebe no kahn re, egom jindiki jolo Sadusis, egom jehko Farisis, á kehm soro bung wahre wahre tong ane bao re, “Abonanee, me nne a Farisi wo, babnsoo, Farisis ba. N yim esamahr elam a, tib eji n kp'taame re, akvne bahke nyahme go elkv.”

* 23:3 23:3 Mat 23:27; Jon 18:22-23

⁷ Pol bungu kan ano mal, Farisis, a Sadusis kehm kehme eltaange, nkon kehm yabe, jol ejang ebbal.

⁸ Tibre Sadusis jo bungu re, “Elnyahme ngub-jing go elkv limm, jol enjel limm, jol atohko limm.” Farisis jo t'taame tv nsol nyio kpee.†

⁹ Edi kehm kehme elwahle.

At'tibi ba atahm bandiki ba woomo ellong Farisi kehm mehle yiimi, kehm kehme eltaange a Sadusis re, “Ebi ajehng ajehng e ka nyehn ji nne noa ma lim. Ma etohko ji ma bung a ne nji, ma enjel nyi nji.”

¹⁰ Nfaabe kehm kpe gbal, are yahke gbo abohng. Owo ntubesi kehm kehme elfahle re, fundiki bo bahke tohngo Pol yare. Á kehm tongo nsoja enye re, “Badden song, wahn song yehke Pol go ellong ane bao, song a ne go ebud.”

¹¹ Etoono atv mako, Ntul a Jisos kehm lohngo ba yiimi kohlo Pol, kehm bungu re, “Bob eltim! Wobyiimi ntianse ka-m go Jeusalem. A bahke tob kpe yiimi ntianse go Rom fvfo.”

Ana bo lame no kak Pol

¹² Etoono efungfu behko Jus kehm song kono edi ajehng, jo lam kak Pol, fere nyam t'tahne re, bo tohko tiki wul Pol, bo nehm li nsol, jol alahb bo nehm wo.

¹³ Ane bao ba lame no, bo jolo ejum ane atahl abal k'kunu.

¹⁴ Bo kehm jeke goji atubesi abalimajom, a anebkul nfam, kehm song tong bo re, “Wahr ebnyam t'tahne re, nsol alehke anyehng anyehng e nehm li, tete e wul Pol.

† 23:8 23:8 Mat 22:23

15 Anv, nobo re wahn, a abalamalam, wahn tiingi tv ntubesi a nsoja no nnen re á ko Pol ba a ne. Limen awak, wahn tong-e re, n kp'sebe re, wahn kpe lennge elam eje. E bahk-e wulu go mbang. E nehm taame, á rehng ga."

16 Mmon no mmonannyehn Pol no nkal wuku kan ana bo lame no, á kehm tahme song rehng go ebud, kehm song tong Pol.

17 Pol kehm lungu ntubesi a nsoja awohng, kehm-e tongo re, "Ko mmonse noa, song a ne goji ntubesi a nsoja no nnen, tibre á kpi ejum ji á bahk-e tongo."

18 Owo á kehm-e koko tahm a ne goji ntubesi no nnen, kehm song tong-e re, "Pol nne a ngbekobo, ye wo lung-m no, fere tong-m re, me n ko mmonse noa ba a ne go ega, tibre á kpi ejum ji á bahk-a tongo."

19 Ntubesi noo no nnen kehm jabbe mmonse noo go ebo, tahm a ne go nkpohko, edi ji nnene l'k'wuk. Owo á kehm-e bahbe re, "Ejum aji a yahk-m tong!"

20 Mmonse noo kehm bungu re, "Jus ebtoobo re, bo ba bahb-a re, wo ko Pol je a ne behna go elam. Bo kp'limi awak re bo kp'sebe re bo kpe lennge elam eje.

21 Ka taame tv bo! Tibre ane baa, ba ma biiri go ekane kpi Pol sik. Bo li ane atahl abal k'kunu. Bobnyam t'tahne re, bo tohko tiki wul Pol, ejumjum bo nehm tiki li, jol alahb bo nehm wo. Anv, bobtoobo ebjing kp'siki re wo lim ana bo bahk-a bahbe."

²² Ntubesi a nsoja noo kehm bungu re, “Ka tong nne awohng awohng ji a ma-m tong a!” Á kehm-e tongo re á song.

Ana bo tumu Pol tv ntul a Feliks

²³ Ntubesi noo no nnen kehm lungu atubesi bako ba nse, ane na abal, kehm tongo bo re, “Yehken nsoja atahl awubu, bo toobo ebjing tahm go Sisaria nkaranka esehmwubu nyi atv, wahn tob yehke ane atahl ara ane awubu ba bahke kuumu go any'nya, a ane atahl awubu ba bahke fili nkong.

²⁴ Tooben any'nya nyandiki, wahn bum Pol kuumu, wahn ko-e song rehng a ne goji ntul a Feliks, ejumjum ki-e lim go mbang.”

²⁵ Ntubesi a nsoja noo no nnen kehm nyono nwer nyi bungu re,

²⁶ “Me Klodius Lisias, Feliks ntul ewame, m ma-a kak nnyo.

²⁷ Jus bobo nne noa, bo jol-e wulu. N sebe kahn re, á jolo nne a Rom, n k'ko nsoja enyame song tahr-e.

²⁸ Eji n sebe re me n kahn ji wahnge bo jo ka-e ebi, n kehm-e koko je a ne go bo elam.

²⁹ N sebe kahn re, bo jo ka-e ebi tib go esi atahm ebo. Eb'bi ajehng ajehng á limem ji fuumu re bo wul-e, jol bo kak-e ngbekobo.

³⁰ Eji bo lennge no ka-m re, Jus kp'lame kak-e, owo n kehm-e soro tum tv-a. N tongo ane ba jo ka-e ebi re, bo ba tooro tong-a ji wahnge bo kp-e kake ebi.”

³¹ Nsoja nyio kehm soro ko Pol, tahm a ne go Antipatris atv, ana ntubesi tongo bo.

³² Eji efungfu se no, nsoja nyehka kehm feere ga ebud. Nsoja nyi kuumu any'nya soro asi asongo a Pol.

³³ Eji bo song rehng go Sisaria, bo kehm koko nwer nyio song ka ntul a Feliks, kehm-e soro tib Pol.

³⁴ Eji ntul noo ma lung nwer nyio kpee, á kehm bahbe Pol ejahbe ji á lohng no. Á kahne kan a re, á lohng go Silisia,

³⁵ á kehm bungu tong-e re, “M bahke wuku elam eja nob nob ngare nyi ane ba kp-a kake ebi ma ba.” Á kehm tongo re, bo ko Pol song kak-e go etahk ji ntul a Herod, fere jo baab-e.

24

Ana Jus jo ka Pol ebi

¹ Eji ma kang nfung elon, ntubesi abalimajom no bo jo lung-e re Ananayas kehm bake go Sisaria, a anebkul nfam bandiki, go nne no jo kahn atahm kpee, no bo jo lung-e re Tertullus. Bo kehm tahme song kpiri ntul a Feliks, kehm kehme Pol tooro tong ntul.

² Eji bo ma lung Pol, á ma ba, owo Tertullus kehm kehme Pol ebi ka, kehm bungu re, “Nj'joka ntul ewahre Feliks, elkahne ena ni a kp-r male elfili ebko elkoono gbalee ba ka-r. Wo wo ma kehme ejahbe ejahre tuungu, owo wahnge ejahbe ejahre ma kehme elnobo.

³ Kpee nsol nyi a ma kehme ellimi go edi ajehng ajehng kp-r atahng yebe tob-a sehng, e kp-a kake saam.

⁴ Anv, me n nehme kpe seb re me n kpe ranngere ngare enya. N kp-a gboongo re, lub kor-a, wo tohk-r wuungu atung ntiil.

⁵ “Wahr ebseb kahn re, nne noa nsebantong a nne wo. Á li nkakanyooda nne no kpo jen ejang njini abehng abehng bi Jus li no, jo seb afem. Ye wo li ntubesi go ellong ane ba bo kpo lung bo re Nasarin.

⁶ Á gare re á ranngere etahk Esowo, k'kpe jol saang, e kehm soro bob-e. E jol-e lame ana ntahm enyahre bungu no.

⁷ Ntubesi a nsoja no bo kpo lung-e re Lisias, a ane ebe kehm bake ba taar-r ye go eko tahm a ne.

⁸ Lisias kehm tongo re, ane ba kp-e kake ebi, bo ba go ega. A l'bahb nne noo abahbe, owo a bahke kehm kahne ejum ajehng ajehng antahng ji wahnge e kp-e ebi ka.”

⁹ Jus kehm taame kpee re, “Ebi ji e kp-e kake a, lohko li ano.”

Ana Pol tooro go ege a nnyo tong Feliks

¹⁰ Ntul noo kehm soro mahk Pol re á bung. Pol kehm soro faange re, “N kp'kahne re, woblam ejahbe jia go nnya tvv. Eltim kp-m yebe sehng re me n lennge elname ka-a.

¹¹ A li ma seb antahng kahn, tibere ka sehng ewubu a nfung ebal nyi n je go Jeusalem re me n song kak Esowo.

¹² Jus me nyehnem ana n jo lim nfaabe a nne awohng awohng, fere jo tong ane re bo song seb nfem go etahk Esowo, jol go ntahk ero, jol go nfam.

¹³ Bo nehm ma tib ekahmekahme ejum ji wahnge bo kp-m kake ebi.

¹⁴ Ejum jia a, ji n kp-a tongo, n kp-a tongo gbul gbul gbuul re, n kp'kake Esowo bi babnso ejahre, eji n kp'toono mbang nyi ane bao ba bo kp'suku bo re, mmollong abvrv ane. N kpo taame tv ejum ajehng ajehng ji atahm nya Moses bungu no, fere taame tv alum nya abanyehnamahr Esowo nyono no.

¹⁵ Ekunukpu ji n kpi no, j'nehm ji bo tob kpi, ji li re, Esowo bahke nyahme ane kpee go elkv, anoobo ane, a abi ane.*

¹⁶ N kpo nok mbang anyehng anyehng re, atahng ala enyame jol saang go esamahr bi Esowo, a bi ane.

¹⁷ “Eji m ma kang nnya tvv go adi nyandiki, n kehm feere go Jeusalem, ba ka ane ebame akpohko, fere lim njom ka Esowo.†

¹⁸ Eji n jo lim ano, bo kehm ba kpir-m go etahk Esowo, eji m ma bum elname saang. Ellong ane jolem aname, nfem anyehng anyehng jolem.

¹⁹ Jus jindiki ji lohngo go Esia jolo o. Bo ba fuumu re bo ba go ega esamahr ba ka-m ebi, joare n li go nfem a bo.‡

²⁰ Eji ane bao ki li, nong, ane baa tooro ebi ji bo nyehn-m, n limi no, eji n yiimi go bo esamahr elam,§

²¹ sehngem ejum na ajehng jia ji m bungu no, eji n yiimi go bo esamahr. Tib go esi jio ji elnyahme ngubjing go elkv, ji ji wahnge lela n wob esub a.”

* **24:15 24:15** Jon 5:28-29 † **24:17 24:17** Rom 15:25-26; Gal 2:10

‡ **24:19 24:19** Elt 21:27 § **24:20 24:20** Elt 23:1-10

²² Feliks ji kahne mbang nyi Jisos nob nob, kehm bulu elam jio, kehm bungu re, “Lisias ntubesi a nsoja l'ba, owo m bahke elam ejahne lam, fere kimi.”

²³ Á kehm tongo ntubesi a nsoja noko re á baabe Pol. Á jo ka Pol eyake, jo taame ate ebe jo ba nyehn-e, fere ka-e ejum ajehng ajehng ji l'rin-e.

Ana Pol yiimi go esamahr Feliks, a Drusilla

²⁴ Eji ma kang abon afung ntiil, Feliks kehm koko nkal ewe ba a ne, no jolo nne a Jus. Mbing enye, bo jo lung-e re Drusilla. Feliks kehm tumu tv Pol re á ba, ba tong-e bada mbang nyi Jisos Kraist.

²⁵ Eji Pol kehme elbungu bade ana nne bahke lehke eno go esamahr Esowo, fere bung bade ana nne bahke jo bob elne, a elam ji kp'bake go es'song, Feliks, ala kehm-e teelee. Á kehm faange re, “A li ma song anv. N l'bel eyake, m bahk-a kpe lung.”*

²⁶ Á jo tiri re, Pol bahk-e kake ngu. Esi jio ji wahnge á jo lung-e ngare anyehng anyehng, bo jo tub aka.

²⁷ Eji ma kang nnya ebal, Porsius Festus kehm koko nji etul nyi Feliks. Feliks jo sebe re á lim nnoobo ka Jus, owo eji á tahme no, á tahme Pol sa go ngbekobo.

25

Ana Pol lennge elam eje tv go Rom

* 24:25 24:25 Jon 3:19-21

¹ Eji Festus ma ba go ejahbe ji á bahke fili, eji ma kang nfung era, á kehm tahme go Sisaria, sehng song rehng go Jeusalem.

² Atubesi abalimajom, a atubesi Jus kehm tooro Pol tong-e, fere gboong-e re,

³ á lim bo nnoobo, ko Pol ba a ne go Jeusalem. Tibre bobtohko lam wuku wuku re bo biiri go mbang wul-e.

⁴ Festus kehm faange re, “Pol noa, kpeke wob ngbekobo go Sisaria. N kp'sebe re me n gulu eljeke ona.

⁵ Nong, atubesi ejahbe ejahne toon-m song rehng go Sisaria, song ka-e ebi, joare yeblim ebi ajehng ajehng.”

⁶ Festus kehm kange a bo ejum nfung enehkeni, fundiki nfung ewubu, kehm soro tahm song rehng go Sisaria. Etoono efung behko á kehm jehke go ege a nji elam, kehm tongo re, bo ko Pol ba a ne.

⁷ Eji Pol ba no, Jus ji lohng go Jeusalem ba, kehm ba yiimi sennge Pol kak, jo kpu agburu afem tvv kun-e. Bo tikem ma tib ekahmekahme ejum.

⁸ Pol kehm kehme eltooro re á yehke elne. Á bungu re, “Atahm nya Jus n gboom. Etahk Esowo n soodem, jol ntul a Rom we n soodem.”

⁹ Festus jo sebe re á lim nnoobo ka Jus. Owo wahnge á kehm bahbe Pol re, “Anv, a kp'sebe re, wo je go Jeusalem, bo kpe lam elam eja go egame esamahra?”

¹⁰ Pol kehm faange re, “Anv, n yim go esamahr eti elam ji ntul a Rom. A wo nobo re bo lam-m. Wofono antahng kp'kahne re, ebi ajehng ajehng limm, ji n limi Jus.

¹¹ Joare me n gbo ntahm, fere lim eb'bi ajehng ajehng ji fuumu re bo wul-m, n nehme seb re me n for go elkv nio. L'fere jol re bo kp-m ebi ka mbol mbol, eji n ki lim ejumjum, nnene limm, no bahk-m ma rod kak bo go abo. N kp'sebe re me n lennge elam ejame tv goji ntul a Rom."

¹² Festus kehm toobo a abalamalam ebe, kehm faange re, "Woblennge elam eja tv go Rom. Go wo a bahke jeke goji ntul a Rom."

Ana Pol yiimi go esamahr bi ntul Agrippa, a bi Bernis

¹³ Kange kan abon afung ntiil, ntul Agrippa, a Bernis kehm bake go Sisaria re bo ba kak ntul a Festus nnyo.

¹⁴ Eji bo ma kang abon afung ntiil o, Festus kehm jo lennge elam ji Pol ka bo re, "Nne awohng li ana, no Feliks tahm-e no sa go ngbekobo.*

¹⁵ Eji n jolo go Jeusalem atubesi abalimajom, a anebkul Jus jo tong-m bada ne, fere tong-m re me n kimi ebi ka-e.

¹⁶ N kehm faange bo re, 'Eljini enahre, wahr anebe Rom, e kpehme ka na ka nne ebi, sehngem re nne noo tohko kpiri ane bao ba ko nfem kun-e, fere bel eyake ji á bungu, yehke elne.'

¹⁷ Eji bo ba no, n laangem nkpel anyehng anyehng. Etoono efung behko n kehm soro ji go eti elam, kehm tongo re bo ko Pol ba a ne.

¹⁸ "Eji ane ba jo ka-e ebi mehle no yiimi, jo tooro, n wukem ebi ajehng ajehng ji á limi no, ana n tiri no.

* 25:14 25:14 Elt 24:27

¹⁹ Jolo na jol nfaabe alimi nyi nyi bada mbang nyi bo kp'kake Esowo, a elkohn nne awohng no kpo no, no bo jo lung-e re Jisos, ji Pol jo bung re á kpeke li go elkpín.

²⁰ N joom kahn ana m bahke l'lim, kehm kahne nsol nyio o. Owo n kehm bahbe Pol re, joare á bahke jeke go Jeusalem, kpe song lennge elam eje go.

²¹ Pol jo sebe re á lennge elam eje tv goji ntul a Rom. Á fere tong re, bo nong-e, á sa woomo go ngbekobo. Owo n kehm tongo re, bo jo baab-e tete me n tum-e tv goji ntul a Rom."

²² Ntul Agrippa kehm bungu tong Festus re, "Kor-m kor re, me n tob wuk-e go ege a nnyo antahng."[†]

Festus kehm faange re, "Behna wo, a bahk-e wuku."

²³ Etoono efung behko Agrippa abola Bernis kehm bake a egburu ellub, sehng song yel go ekp'kpa esub, go atubesi nsoja, a atubesi nfam. Festus kehm tumu ane re bo song ko Pol ba a ne.

²⁴ Festus kehm bungu re, "Ntul Agrippa, a ane bako wahn, nyehnen nne no Jus kpee ji li a, a ji li go Jeusalem jo gbiing-m, fere jo rabe re, á kpeem fuumu re á jol go elkpín.

²⁵ Ji n sebe no kahn li re, ejumjum á limem ji fuumu re bo wul-e. Ana yefono tongo re, á bahke lennge elam eje tv go Rom, n kehm taame re, m bahk-e tumu tv goji ntul a Rom.

²⁶ N nehme kahn akahmekahme alum nya m bahke ny'nyon go nwer tum tv ntul a Rom. Owo wahng ka m m-e ko ba a ne go egahne esamah,

[†] 25:22 25:22 Luk 23:8

asehngesehnge wo ntul Agrippa. Ngare nyi e l'bahb-e abahbe kpee, owo fundiki m bahke bele ejum ji m bahke nyono.

²⁷ Egame, n kp'tiri re, nobem re nne tum nne a ngbekobo tv, eji á ki lennge ebi ji bo m-e ka.”

26

Ana Pol bungu re á yehke elne go esamahr ntul Agrippa

¹ Ntul Agrippa kehm bungu tong Pol re, “Anv, a li ma bung yehke elna.”

Pol kehm soro tanne ebo ebe, kehm kehme elbungu re á yehke elne. Á bungu re,

² “Ntul Agrippa, n kp'tiri re esi ma-m nob lela, eji m ma bel eyake ji m bahke bungu yehke elname go ega esamahr bada nsol nyi Jus kp-m kake ebi.

³ Tibre a kp'kahne eljini ni Jus, a afemfem ebo kpee. Owo wahng ka n kp-a gboongo re wo lub wuung-m atung.

⁴ “Jus kpee kp'kahne eljini ename, bomomo ngare nyi n jolo ntiil. Tibre n jo kono eljolo a ane ebame go Jeusalem.

⁵ Bo kp'kahne go wuku wuku re, n jo limi eljini ni Farisis ji jo sahb b'bum atahm enyahre,* joare bo kp'sebe re bo yiimi ntianse go nsol nyio.

⁶ “Anv, n yim eti elam jia, tibre n kp'kunu ekpu go nsol nyi Esowo nyame no tong babnso ejahre,

⁷ nsol nyio nyi ane ebahre, ewubu et'tohngo ebbal, jo kunu ekpu re bo bahke bele, eji bo kp'kake Esowo atv a njul, a ntim a ntim ebo. Ntul

* 26:5 26:5 Fil 3:5

Agrippa, ekunukpu jio ji wahng ka, Jus kp-m kake ebi.

⁸ Jen ji wahnge, wahn Jus, kp-n riidi ana re wahn taame re, Esowo kpo nyahme akvne?

⁹ “Me fvfo, n jo tob tiri re, m bahke tiki lim mbang anyehng anyehng, eji mbing nyi Jisos ji Nasaret l'tan.

¹⁰ N jo limi ano go Jeusalem. N jo ko nsahm goji atubesi abalimajom, fere jo song bob aneb Esowo gbalee kak bo ngbekobo. Eji bo jo gohro lam elam, fere kimi re bo bahke wulu bo, n jo t'tob taame.

¹¹ Nkpel tvv n jo song kake bo erem go ntahk ero nyi Jus. N jo gare re me n senngre bo ntim, bo su Kraist. Eltim jo rak-m tob bo sehng, owo wahnge n jo tob je ajahbe nyandiki, song nohk bo fvfo.

*Ana Pol kpe tooro bade ana á kpiri Jisos
(Elt 9:1-19; 22:6-16)*

¹² “Esi jio ji wahng ka, n kehm jeke song ko nsahm goji atubesi abalimajom, kehm tahme go Damaskus.

¹³ Ntul, ano wo jolo no. Eji e jo jen asongo ngare efin, n kehm nyehne ellenge ni lohngo go elbung, ni jo sahb y'ya sehngre njul, kehm yake tub-m, a ane ba jo jen a name.

¹⁴ Wahr ane kpee kehm gboko go ndi. N kehm wuku nne no bungu a name go alum Hibru re, ‘Sol, Sol, jen ji wahng ka a kp-m nohko anae? Bahke wofono antahng yam ana nfong nyi kpo sahn ekpade tv nfono, eji bo m-e kahn nlehke go ekpade.’†

† 26:14 26:14 1 Kor 9:16

¹⁵ “N kehm bahbe re, ‘Wo nne awo, Ntul?’

“Ntul a Jisos kehm soro bung re, ‘Me Jisos wo, ji a kp'nohko.

¹⁶ Mehl yiimi! M ma-a kpiri lela, fere yehk-a re, wo jol nlokeltum ewame, fere jo yiimi ntianse enyame go nsol kpee nyi a ma nyehn lela, a nsol nyi m bahk-a kpe tib go es'song.

¹⁷ M bahk-a tahre yehke go abo nya aneb Israel, fere yehk-a go abo nya ane baka baka ba m bahk-a tumu tv bo.

¹⁸ A bahke bo amahr lennge, eji bo l'fere lohng go ejanng, feere ga ellenng, eji bo l'fere lohng go elwo ni nnehm, feere goji Esowo. Bo l'fere taame tv-m, bo bahke bele eltahmeka go bo abiafem, fere bel eyake go ellong ane ba Esowo ma yehke.’

Ana Pol tooro bade eltum ene

¹⁹ “Ntul Agrippa, ano wo wahng n ki faabe alum nya n wuku no, nya lohngo go elbung.

²⁰ M bomo alum Esowo abungu go Damaskus, sehng song rehng go Jeusalem sehng asongo tete rehng go ajahbe nya li go Judea, fere tob bung tong ane baka baka ba ki li Jus re, nne awohng awohng gbo ndon go ege abiafem, feere goji Esowo, fere jo lim eljini ni bahke jo tib re, yeblohko gbo ndon.‡

²¹ Esi jia ji wahng Jus bob-m no go etahk Esowo, jo gare ana bo bahk-m wulu.

²² “Tete sik anv Esowo kp-m nkake nkake ebo. Owo wahng ka n yim ana go egahne esamahr, kpi ntianse yiimi, fere tong nne awohng awohng,

‡ 26:20 26:20 Mat 3:8

afi jolo mmonse, afi jolo nnenkul. Ejumjum limm, ji n kp'bungu, sehngem nyao nya Moses, a anyehnamahr Esowo bungu no re bahke limi, nya nya n kp'tob bung,§

²³ nya li re, Kraist bahke nyehne erem kpo, fere jol ngbokambang a nne no bahke nyahme go elkv,* eji á l'tiingi Jus etib bio bi bahke kake bo ellenge, a ane baka baka ba ki li Jus fvfo.”

²⁴ Pol gohro bung kan ano me, Festus kehm rabe re, “Pol, wobgo esahl!† Egburu elkahne ena ni kp-a bumu esahl!”

²⁵ Pol kehm faange re, “Egburu ntul a Festus, esahl n ka gbo. Alum enyame nya n kp'bungu, n kp'bungu nseenga nseenge, li go etingitingi.

²⁶ Tibre ntul Agrippa kp'kahne nsol nyia, owo wahng ka n kp'bungu a ne gbul gbul gbuul. N kp'sahb k'kahn re, ejumjum limm, ji á ki jo wuk, fere kahn. Tibre nsol nyio limem go nkpohko.‡

²⁷ Ntul Agrippa, anv, a kp'taame tv abanyehnamahr Esowoa? N kp'kahne re, a kp'taame.”

²⁸ Agrippa kehm faange Pol re, “Mmongare ana noa, a kp'tiri re, a bahk-m ma senngel eltim n jol nne a Kraista?”

²⁹ Pol kehm faange re, “Afi mmongare ntiil wo, afi fere labe na ekidi, n kp'kake ero ka Esowo, jol wo ntahngtahng sang, wahn ane kpee ba wuk-m no lela re wahn jol ana me n li no, sehngem agbekobo nyaa nya n l'k'woomo.”

§ 26:22 26:22 Luk 24:44-47 * 26:23 26:23 1 Kor 15:20 † 26:24 26:24 Mak 3:21 ‡ 26:26 26:26 Jon 18:20

³⁰ Ntul Agrippa, ntul a Festus, a Bernis, bo kehm mehle yiimi, a egom ane bako fvfo,

³¹ kehm lohngo ekp'kpa jio, fere jo bung atemtem re, "Ejumjum limm, ji nne noa limi no, ji fuumu re á woomo go ngbekobo, jol ji fuumu re bo wul-e."

³² Agrippa kehm bungu tong Festus re, "Li re nne noa ka lennge elam eje tv goji ntul a Rom, kehn e jol-e ma yehke yake."

27

Ana bo tahme a Pol go Rom

¹ Eji bo toobo no re, wahr yel go egbang tahm go Itali, bo kehm koko Pol, a aneb agbekobo bako, kak ntubesi a nsoja awohng go ebo, no bo jo lung-e re Julius ji woomo go ellong nsoja nyi bo jo lung re, ellong nsoja nyi ntul Agostos.

² E kehm yele egbang bi lohngo go Adramitium ba, bi yahke tahm go ajahbe nyao nya li go Esia, nya li nkpe alahb, adi nyao nya agbang kpo kono eltehme. E kehm tahme asongo. Aristarkus ji lohng go Tesalonaika ji Masedonia t'tob toon-r fvfo.

³ Etoono efung behko e kehm song rehng go Saidon. Julius jo bumu Pol ndok ndok, fere jo yak-e re á song nyehn ate ebe, eji bo l'ka-e ejum ajehng ajehng ji m-e rin.

⁴ E kehm tahme o asongo, song sehng Saiprus sa go ebobkal. Tibre nfeb jo gbiing-r sehng.

⁵ E kehm siiri aya ma li kohlo Silisia, a Pamfilia, fere sehng o song rehng go Mira nyi li go Lisa.

⁶ Owo ntubesi a nsoja nyehne egbang bi lohngo go Aleksandria kp'tahme go Itali. Á kehm-r kake go egbang bio, e tahm.

⁷ Ngare nyio jolo ejahkjahk ngare area. Egbang bio jo jene beem. Eji ma kang afung tvv, e kehm song rehng kohlo Knidus. Nfeb nongem re, wahr sehng asongo. E kehm fere tanng, feere go Salmone, sehng Krit sa go eboblum.

⁸ Eji e jo sehng nkpe egbuk nkpe egbuk nyi Krit, ngare nyio kpe jol ejahkjahk ngare area, tete e kehm song rehng go edi ji bo jo lung re, Edi ji nobo eljolo, ji agbang kpo tehme, ji li kohlo Lasea.

⁹ E kange afung tvv ona. Ngare nyio efin gbale go aya sehng. Tibre efung bi Jus jo bade njal ebsehng. Owo Pol kehm tubu bo elle re,

¹⁰ "Babnsoo wahn, n kp'kahne re, eljen enahre ni e fi a, bahke gbale efin sehng, a erem. Fundiki egbang bahke wake, nsol tan, fundiki ane bake tane elkpin ebo."

¹¹ Alum nya nfono egbang, a nya ntubesi egbang, nya nya ntubesi a nsoja jo ga wuungu atung sehng nya Pol.

¹² Edi jio ji egbang bio jolo no gaam nob re agbang jol o ngare elkoko. Ane gbalee ba tubu bo elle re bo wob tahm, eji fundiki bo l'nok ano ano rehng Feniks, song jol o tete elkoko nio mal. Feniks tob li ejahbe Krit. Edi jio li edi ji nfeb kil jo lohng ba.

Ebuku ji jo lim go aya, a nfeb a nfeb

¹³ Eji mmonfeb no nse bomo ellimi go ejang aya bio, ane bao kehm tiri re, bo li ma lim ana bo toobo no. Owo bo kehm wobo akuungu nya jolo

ana nlo, nya bo tubu kak alahb re egbang yiimi, jo fing nkpe egbuk nkpe egbuk nyi Krit.

¹⁴ Tvtv ona nfeb nyi nnen a nnen nyi bo jo lung re nfeb egbuk kehm soro lohng egbuk ba, kehm kehme ellimi.

¹⁵ Nfeb jo yehke na yehke egbang asongo. Bo joom kpe ma soongo esi egbang. E kehm fere yake elsoongo, tibre nfeb jo yehke na yehke egbang tv edi ajehng ajehng.

¹⁶ Eji e song rehng go mmojahbe no li go elka alahb, no bo kpo lung re Kloda, e kehm fere jo sehng nkpe egbuk nkpe egbuk. Owo nfeb kehm tele ntiil. Bo kehm noko, tahre egbang bi nse bi laake nkpe,

¹⁷ rod kak atahng egbang bi nnen. Bo kehm sebe alehke, te egbang bi nnen t'tahne t'tahne. Tibre bo jo ffahl re egbang li ma bahm go erikehndi ji li go nkpe egbuk nyi Libia. Owo bo kehm soro fanngge afara go egbang, yake egbang jo fab asongo.

¹⁸ Eji nfeb tahne sehng, egbang kehm kehme elgbiingi na gbiingi go alahb. Owo etoono efung behko bo kehm kehme nsol are nyi bo kake go egbang raade, tuubu kak go alahb.

¹⁹ Etoono efung behko bo kehm kehme nsol egbang raade, tuubu kak alahb fvfo.

²⁰ Afung tvv e kpeem jo nyehn njul, a alonlo. Nfeb jo limi na lim lim lim, tikem rahke. E joom kpe kunu ekpu re e bahke kpe kpin.

²¹ Eji ane bao ma ji njal ekidi ma lab. Pol kehm song bung tong bo re, "Ate ebame wahn, n jol-m wuku, eji n tong-n no re, wahn k'tahm go Krit,

kehn nsol ana nyia jolem tane, jol kehn erem ana bia e jolem nyehne.

²² N kp-n tongo re, wahn bob eltim. Nnene limm, no bahke tane elkpin ene, sehngem re egbang bi bahke tane.

²³ Nyaane atv, enjel nyi Esowo bi n tohk-e no, fere kp-e kake yiimi kohl-m,

²⁴ kehm bungu re, 'Pol, ka kpe fahl! A bahke tiki yiimi go esamahr ntul a Rom. Esowo ma-a ka elkpin ane baa kpee, ba wob a na go egbang, tib go ege a nnoobo.'

²⁵ Owo wahnge n kp-n tongo re, wahn bob eltim, ate ebame wahn. N kp'taame tv Esowo re, bahke lohko lim jang jang ana n wuku no.

²⁶ Nfeb bahke yehke egbang song rehng a nahre go ejahbe ji li go elka alahb."

²⁷ Eji ma kang ewuba nfung eni, ngare nyio egbang kpi nfabe nfabe asongo go aya ma bo kpo lung re Adria, nlum atv, abafingebbang kehm kehme eltiri re, bo yahke ba elrehnge go egbuk.

²⁸ Owo bo kehm gare, kahn ana alahb rahbe no. Jolo efut atahl arakera. Eji bo kpe fab ntiil rehng es'song, bo kehm yake nlehke, kpe kak, kehm sebe kahn re, jolo efut atahl ani a ngbahk ewubu.

²⁹ Bo kehm kehme elfahle re, egbang ebahre bahke fabe, song kahd kak atal. Owo bo kehm fanng ekuungu emni bi jolo ana nlo, kak alahb, kehm kake ero re, edi lub lennge.

³⁰ Abafingebbang kehm kehme elgare re bo weele ebo be. Ngare nyio nyi bo kehme mmogbang noo fanng re bo kak alahb, fere lim awak

re bo fi song fannge akuungu nyao nya li ana nlo go esi egbang, kak alahb.

³¹ Pol kehm bungu tong ntubesi a nsoja, a nsoja enye re, “Tohko tiki jol re abafingegbang baa, woomo go egbang bi nnen, n nehm ma tahre elkpín enahne.”

³² Nsoja nyio kehm soro kiimi alehke nya bo gbade egbang bi nse, egbang bi nse fooro yel alahb, fab tahm.

³³ Ngare nyio edi yahke lennge. Pol kehm tongo bo kpee re, bo li nsol alehke. Á kehm bungu re, “Lela ewubu a nfung eni nyi a, nyi m ma ji njal, n kala kpe li ejumjum.

³⁴ Anv, n kp-n gboongo re, wahn li nsol. Bahk-n eko ka. Jol ellv esi enahne anehng anehng nehm tan.”

³⁵ Á bungu kan ano mal me, á kehm soro rod ebred, kak Esowo saam go esamahr ane kpee, kehm kehme elbakke li.

³⁶ Bo ane kpee kehm bobo eltim, tob li nsol.

³⁷ E jolo ane atahl awubu atahl ara ane elku a nne awohng ba woomo go egbang bio.

³⁸ Ngare nyio eji nne awohng awohng ma li nsol wohngo, bo kehm yehke nkohl nyi bo kake egbang, saade kak go alahb, eji l'lim egbang yaare, k'ga kpe lub.

Ana egbang bio wa no

³⁹ Eji efungfu se no, bo tikem liingi edi ji bo yahke rehng. Ji bo nyehne no, bo nyehne edi ana nkpohko aya, a elga ona ni jolo erikehndi erikehndi. Owo bo kehm tiri re, bo l'fere mal, bo bahke fingi egbang song rehng go egbuk.

⁴⁰ Bo kehm soro kiimi alehke akuungu nyao nya jolo ana nlo, nya bo kake go alahb, fere song fanng'e alehke nya bo gbade ejum ji bo kpo ko soongo egbang, fere song tab afara nya jolo go esi egbang wahre, fere nyange, eji nfeb l'gbul egbang tahm a bi go elga.

⁴¹ Esi egbang kehm soro song bahm go erikehndi, joom kpe ma yuudu. Nnahb egbang kehm wake, tib go nsahm ebuku.

⁴² Nsoja nyio kehm toobo re bo wul aneb ag-bekobo bao, eji nne awohng awohng l'k'be ngare nyi bo l'kehme alahb nyok.

⁴³ Ntubesi a nsoja noo jo sebe re á tahre Pol. Owo á kehm soro sahde bo re, bo k'lim ano. Á kehm tongo ane ba jo mal alahb anyoko re, bo gbo mbang nyok song rehng go egbuk,

⁴⁴ fere tong egom jehka re, bo jabbe ajang nti, a ajang egbang toono bo. Ano wo jolo no, e kehm tahre elkpin enahre, rehng go egbuk.

28

Go Malta

¹ Eji wahr ane kpee, e ma nyok lohng, owo e kehm kahne re, ejahbe jio bo kpo lung re Malta.

² Afono ejahbe bao ona jo gbaam-r sehng. Bo kehm kono agun ka-r. Tibre ngare nyio elahb ebbom elnake, alohk jo f'fili.*

³ Eji Pol song rak nkun ba a nyi re á ba kak agun, nnyo kehm soro lohng nkun nyio, kpenng-e go ebo. Tibre agun nyao jo fubu sehng.

* 28:2 28:2 2 Kor 11:27

⁴ Eji afono ejahbe nyehne nnyo nyio m-e kpenge go ebo, bo kehm kehme elbungu atemtem re, “Nne noo lohko li nwulane, nfaabe anyehng anyehng limm. Jol eji á ma ffor aya, Esowo m-e demme na o.”

⁵ Pol kehm soro mahd nnyo nyio kak agun, jol ejumjum we limem.†

⁶ Ane bao jo siki re bo nyehn, joare Pol bahke tungu, fundiki á bahke tuulu gbo kpo. Eji bo ma seenge, ekidi ma lab, eji ejumjum kil-e eltiki lim, bo kehm fere yaange nnyo, fere jo bung re, “Ye esowo bi.”‡

⁷ Ebgbe jolo o kpidi kpidi, bi ntubesi ejahbe no bo jo lung-e re Publius bahme no. Á kehm-r gbaame, ko-r tahm a nahre go ege etahk. E kange nfung era a ne.

⁸ Ngare nyio nyi nde a Publius noongo go edilnong jo yam arumbum, fere jo yam ala alung. Pol kehm jeke song nyehn-e, fere kak ero, kun-e ebo, á nob eyam ebe.

⁹ Eji nkpokosi nyia limi no, aneb ayam bako kpee ba jolo ejahbe jio kehm bake, bo nobo ane kpee.

¹⁰ Bo kehm-r yare ka nsol gbalee. Re wahr kehm yele egbang tahm, bo kak-r nsol gbalee go egbang, nyi rin-r no.

Ana bo tahme go Malta asongo go Rom

¹¹ Eji ma kang nnyahng era, e kehm yele go egbang bi jolo o ngare elkoko, bi lohngo go Aleksandria ba. Egbang bio o bele elokelom ji bo jo lung re Ayafele.

† 28:5 28:5 Mak 16:18 ‡ 28:6 28:6 Elt 14:11

¹² Eji e rehng go Sirakus, e kehm kange o nfung era,

¹³ kehm wobo tahm song rehng go Regium. Etoono efung behko nfeb kehm kehme ellimi, nyi jo lohng go ejang Malta. Owo eji ma kang nfung ebal e kehm rehng go Puteoli.

¹⁴ E nyehne abon Esowo o, bo kehm-r tongo re, wahr kang a bo nfung esehma. Owo e kehm soro sehng, song rehng go Rom.

¹⁵ Abon Esowo ba jolo go Rom, eji bo wuku re, wahr ebba, bo kehm bake ba wan-r go are ma Appius. Bandiki wan-r go Tres Taberna. Eji Pol nyehne bo, á kehm kake Esowo saam, fere bob eltim.

Go Rom

¹⁶ Eji e song rehng go Rom, bo kehm yake Pol re á jol edi j'je eje eje, a nne a nsoja awohng no jo baab-e.

¹⁷ Eji ma kang nfung era, Pol kehm lungu atubesi Jus ba jolo go Rom. Bo ba kono kan edi ajehng, á kehm bungu tong bo re, “Abonanee, jol eji n ki l'lim ane ebahre ejumjum, jol atahm nya babnso ejahre n soodem, bo bohk na bohk bob-m kak go ngbekobo go Jeusalem, fere faak-m kak anebe Rom go ebo.

¹⁸ Eji bo ma lam elam ejame, bo kehm tahme re bo yehk-m yake, tibre bo sebe kahn re, ejumjum limm, ji bahke wahng bo wul-m.

¹⁹ Eji anebe Jus tene re bo ki-m yehke yake, jol eji ki-m k'kor re me n lennge elam ejame tv goji ntul a Rom, n lennge na lennge, jol ejumjum m belem ji m bake bungu tob ane ebame.

²⁰ Owo wahng ka, n sebe re me n nyehn-n fere bung a nahne. Tibre nne noo no Israel kp-e kunu ekpu, ye wo wahnge bo ma-m kak agbekobo nyaa.”

²¹ Bo kehm-e faange re, “E ka tiki bel nwer anyehng anyehng nyi lohng go Judea, nyi bungu bada na. Jol nne ejahbe ewahre awohng awohng limm, no ma lohng go ba ana ba bung eb'bi ajehng ajehng bada na.

²² E kp'sebe re wahr kahn ntir atahng enya. Tibre wahr kp'kahne re, edi ajehng ajehng ane kp'bungu tob mmollong ane bao ba a wob no.”§

²³ Bo kehm kunu afung, ellong ane gbalee kehm bake go etahk Pol. Á kehm kehme eltooro, bomo efungfu tete elgung ba, fere lennge atahm nya Moses, a awer nya abanyehnamahr Esowo nyono no, tong bo bade etul bi Esowo, eji á l'senng bo ntim, bo feere goji Jisos.

²⁴ Egom jindiki t'taame tv alum nya á jo bung. Egom jehko taamem.

²⁵ Jus kehm kehme nfaabe lim atemtem, eji Pol ma gohro bung alum nyaa re, “Etingi Etohko lohko bung etingitingi, eji á bungu sehng go nnyo mi nnyehnamahr Aisaya tong babnso ejahre re,

²⁶ “ ‘Song goji ane bao, wo song tong bo re, Etingitingi, m bahke jo wuk na wuk, n nehm kahn ana lohngo no.

Í bahke jo seenge na seenge, n nehm nyehn.

²⁷ Tibre asi ane bao ebfere tahne.

Bobsahde atung ebo.

Bobbulu amahr ebo.

Ki li ano, kehn bo kp'nyehne, fere jo wuk, kahn,
fere sennge,

feere go egame, eji n l'lim bo, bo nob.' ”*

²⁸ Pol kehm kpe bung re, “Nobo re wahn kahn
re, etib bia bi eltahre ni Esowo, bobtiingi ane
baka baka ba ki li Jus. Bo bahke wuungu atung.”

²⁹ Pol buntu kan ano mal me, Jus kehm tahme
a nfaaba nfaabe asongo.

³⁰ Pol kange nnya ebal go etahk ji á yaame no.
Á jo gbaame ane kpee ba jo ba, ba nyehn-e.

³¹ Á jo buntu alum Esowo bade etul bi Esowo,
fere jo tib ane bada Ntul a Jisos Kraist gbul gbul
gbuul. Nnene jolem no jo sahd-e.

* **28:27 28:27** Mat 13:14

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4